

萬 有 文 庫

第一集一千種

王雲五主編

四庫全書總目提要

(五十三)

永瑢等撰



商務印書館發行

萬有文庫

第一集一千種

總編纂者

王雲五

商務印書館發行

上海圖書館藏書




A541 212 0003 4391B

四庫全書總目提要

(五十三)

永瑤等撰



國學基本叢書

四庫全書總目提要

卷一百七十六

集部二十九

別集類存目三

【東嶠集十五卷】湖北巡撫採進本 明李承芳撰。承芳字茂卿，嘉魚人。宏治庚戌進士。官大理寺評事。

明史儒林傳。與其弟承箕同附陳獻章傳末。是集詩多俚俗。如詠馮道云：地獄剉燒春磨具。定將此賊謝天人。白頭吟云：恨殺相如非正氣。未曾焚却白頭吟。皆墮入下劣詩魔。文亦拙澀。曾璵序謂其識類許魯齋。志類范叔子。陸族類范文正。而詩文則甚自類。蓋譏其無所師法也。

【戒菴文集二十卷】兩江總督採進本 明靳貴撰。貴字充遂，號戒菴，丹徒人。宏治庚戌進士。官至武英

殿大學士。諡文僖。是集乃吳郡蔡羽所編。凡文十八卷，詩二卷。大半皆應俗之作。

【集古梅花詩四卷】浙江巡撫採進本 明童琥撰。琥字廷瑞，蘭谿人。宏治庚戌進士。官至工部郎中。是

編皆集句成詩。以咏梅花得五言律詩七言律詩七言絕句各百首。又旁及紅梅。得七言律詩十首。所採上自六代。下及明初。排比聯貫。往往巧合。然非詩家正格。徒弊精神於無用之地耳。

【白露山人遺藁二卷】浙江巡撫採進本 明黃傳撰。傳字夢弼，蘭谿人。宏治庚戌進士。官至監察御史。是編詩文各一卷。其居在邑之白露山陽。故以山自號。因以名集。傳受業章懋之門。清苦自持。不愧其師。

集中有死臥溪山鬼亦清句。可以見其志節。然年未四十而卒。文章則未成就也。

【鶴灘集六卷】

浙江巡撫探進本

明錢福撰。福字與謙。松江華亭人。宏治庚戌進士第一。官翰林院修

撰家。近鶴灘。因以自號。福少而穎悟。詩文以敏捷見長。故委巷鄙俚之詞。率以歸之。今觀是集。實少俳諧之作。知小說多附會也。末爲鶴灘紀事一卷。蓋後人綴緝遺聞。又多溢美。亦不盡可憑。

【勉齋遺藁二卷】

浙江巡撫探進本

明鄭滿撰。滿字守謙。慈谿人。宏治壬子舉人。官至山東濮州知州。

是集爲其仍孫梁敬所編。凡文二卷。詩一卷。大旨不詭於正。而頗乏修詞之功。

【毛文簡集二卷】

江蘇巡撫探進本

明毛澄撰。澄號三江。太倉人。宏治癸丑進士第一。官至禮部尙書。

嘉靖初議大禮不合。致仕歸。道卒。事蹟具明史本傳。是集皆所作雜文。前有李維楨序。稱澄沒十餘年。其子希原哀所作詩文爲三江集。未及剗削而散佚。後其從曾孫君明蒐拾鳩合。屬維楨校刊。更名曰遺藁。詩已無一存。文存者僅二卷耳。云云。此本題曰毛文簡集。與序不合。豈又經重刊歟。

【何燕泉詩四卷】

兩淮馬裕家藏本

明何孟春撰。孟春有何文簡疏議。已著錄。孟春少遊李東陽之門。

傳其詩派。而才力不及其富贍。故往往失之平衍。是編乃嘉靖間署郴州事蔣文化選錄刊行。亦非其全集也。

【吳文端集四十卷】

安徽巡撫探進本

明吳一鵬撰。一鵬字南夫。號白樓。長洲人。宏治癸丑進士。官至

南京吏部尙書。諡文端。事蹟具明史本傳。一鵬力爭大禮。抗張璁桂萼之鋒。頗著風節。而不以文章名。是集前有徐階序。稱其子純叔所編。而不著其名。朱彝尊靜志居詩話謂一鵬名位與守溪王鏊鼎峙。吳中

詩品亦在伯仲間。然整不以詩名。即一鵬之詩可知也。

【姚東泉文集八卷】兩淮鹽政採進本。明姚鎮撰。鎮字東泉。慈谿人。宏治癸丑進士。官至右都御史。總

督兩廣。中蜚語罷職。後復起爲兵部尙書。總制三邊。辭不赴。以規避落職。卒於家。事蹟具明史本傳。是集序記二卷。奏疏四卷。雜文一卷。學政事宜一卷。文皆擘緩。尤多吏牘之辭。蓋鎮本以武略見也。

【靜芳亭摘藁八卷】浙江孫仰曾家藏本。明陳洪謨撰。洪謨有治世餘聞。已著錄。是集爲洪謨所自定。

以致仕之後。居高吾山下。築亭山中。榜曰靜芳。故以名其集。又自稱高吾子。故亦曰高吾摘藁。其詩音節諧暢。而意境不深。蓋宏正之間。風氣初變。漸趨七子之派。而未盡離三楊之體也。明史藝文志有陳洪謨文集二卷。不載其詩。今乃獨有詩集。而文集未見本傳。考此本卷首標題之下。俱有詩集二字。知尙別有文集。故以示別。非史誤也。

【矩洲集十卷附檣亭集一卷】浙江汪汝霖家藏本。明黃衷撰。衷有海語。已著錄。考千頃堂書目。衷有

文集詩集各十卷。是編乃其詩集也。凡吳中藁一卷。南中藁一卷。閩中藁一卷。粵中藁一卷。湖中藁一卷。伐檀藁一卷。草堂前後藁二卷。續藁二卷。多描寫風景之作。末附檣亭集一卷。乃其弟駿所撰。篇帙不多。體格亦弱。

【仁峰文集二十四卷外集一卷】安徽巡撫採進本。明汪循撰。循字進之。休寧人。宏治丙辰進士。官至順天府通判。江南通志稱其遊莊景之門。與王守仁數相論辨。蓋亦講學之流。集中有荅程暉書云。朱子著書立言。皆欲使人明其理。反求於心。未嘗教人弄故紙糟粕。以資一己功利。後之習其學者。徒知排比。

章句而擴充變化之無功。辨析詞理而持守涵養之不力。專訓詁者。附會穿鑿。疊牀架屋。汨心思。亂耳目。工文詞者。飾筌蹄。取青紫。龍斷罔利。中立爲姦。朱子之學。果如是乎。其持論亦頗中流弊。然於曠之囂爭。門戶不一。糾正則猶未破癥結也。其文第取疏暢。不事翦裁。詩亦不出擊壤一派。是集凡文十七卷。日錄二卷。詩五卷。末附詩話數則。外集一卷。附錄敕命行實墓銘祭文之類。題嘉靖辛卯。書林劉氏刊行。其子戩跋。謂先刻其強半。蓋尙非全。刻本亦頗多脫佚。失於校正云。

【漢陂集十六卷續集二卷】陝西巡撫探進本

明王九思撰。九思字敬夫。鄠縣人。宏治丙辰進士。官至

吏部郎中。坐劉瑾黨降。壽州同知。尋勒致仕。九思爲宏治七子之一。明史文苑傳附見李夢陽傳中。是集前有自序。稱始爲翰林時。詩學靡麗。文體萎弱。其後德涵獻吉導予。易其習。獻吉改正予詩。今尙在。而文由德涵改正者尤多云云。是其平生相砥礪者。在李夢陽康海二人。故其詩體文格。與二人相似。而詩之富健。不及夢陽。文之粗率。尤甚於海。蓋樂府是其長技。他皆未稱其名也。正集十六卷。爲嘉靖癸巳。九思門人監察御史王獻所刊。續集二卷。乃九思晚年之作。嘉靖丙午。巡撫翁萬達續刊行之。

【南川稟十一卷】浙江汪汝璉家藏本

明陶諧撰。諧字世和。號南川。會稽人。宏治丙辰進士。改庶吉士。

授工科給事中。以忤劉瑾逮。訊誦戍肅州。後起江南按察司僉事。官至兵部侍郎。總督兩廣軍務。諡莊敏。事蹟具明史本傳。是編分爲十集。曰西行稟。北上稟。洪都稟。十州稟。再北上稟。題贈稟。行臺稟。草堂續稟。北遊稟。歸閒稟。各一卷。雜著奏疏二卷。正德三年。劉瑾所矯示姦黨敕諭一道。及諧下獄自辨一疏。亦附載於末。蓋其初刻之本。後乃重編爲莊敏集也。

【陶莊敏集八卷附蘭渚遺藁一卷】江蘇巡撫採進本 明陶諧撰。是集凡詩六卷。文二卷。據諧自序。但

自錄其詩。雜著奏疏。蓋其後人所續入。後附蘭渚遺藁。則其孫尙寶司丞允淳所撰也。諧以風節震一世。詩文直抒胸臆。明白坦易。不甚鎔鑄翦裁。允淳詩亦淺弱。而同日冊六妃四絕句。尤乖立言之體。以詩家

之法言之。不當如是徑直。以臣子之禮言之。亦不容如是褻嫫也。

【靜觀堂集十四卷】浙江朱彝尊家曝書亭藏本 明顧潛撰。潛字孔昭。崑山人。宏治丙辰進士。官至直

隸提學御史。以伉直忤尙書劉宇。宇讒之於劉瑾。出爲馬湖知府。未任罷歸。是集凡詩六卷。文八卷。俱平

正樸實。不事修飾。蓋當時風氣類然。蘇州府志稱所著尙有讀史新知。林下記聞。湖堧醉韻。惇史夢林等集。方鵬序。又稱其有稽古治要若干卷。蓋亦多所著述者。今皆不可見矣。

【華泉集選四卷】山東巡撫採進本 明邊貢撰。貢華泉集。已著錄。此本乃國朝王士禛所刪定。其序謂

濟南詩派。大昌於華泉。滄溟二氏。而葦路藍縷之功。又以邊氏爲首庸。其比之曹植謝靈運。雖不免夸飾。然於李攀龍集。終置不論。而獨加意於貢集。其去取之間。亦有微意也。

【陽明要書八卷附錄五卷】浙江巡撫採進本 明王守仁撰。葉紹容編。守仁有保甲法。已著錄。紹容吳

江人。是書成於崇禎乙亥。取守仁全書。摘其要語。前有小序八首。及凡例四條。皆著其刪纂之大意。浙江通志載宋儀望輯陽明文粹十一卷。王畿輯陽明文選八卷。而無此書之名。蓋偶未見也。

【王陽明集十六卷】浙江巡撫採進本 明王守仁撰。其五世孫貽樂重編。案守仁全集。刻於明嘉靖中。久而版佚。國朝康熙初。貽樂爲滕縣知縣。乃重爲掇拾。定爲此本。然視原集。已闕其半。其目分論學書南

贛書平濠書思田書雜著書亦頗瑣屑又因有李贄所作年譜而遂以卓吾鑒定題其前尤爲依託迥不及原本之完善也

【陽明文鈔二十卷】江西巡撫採進本 明王守仁撰是編康熙己巳江都張問達所編以傳習錄大學或問爲首奏疏序記諸講學書及論說雜著賦詩公移次之而終以陽明年譜

【陽明全集二十卷傳習錄一卷語錄一卷】浙江巡撫採進本 明王守仁撰此本爲康熙中餘姚俞嶠所編刪除錢德洪本正錄外錄別錄之目併爲一集更其舊第首載年譜次以書序記說諸體而以傳習錄語錄附焉

【張伎陵集七卷】浙江范懋柱家天一閣藏本 明張鳳翔撰鳳翔字光世號伎陵子洵陽人宏治己未進士官戶部主事是集前六卷爲詩附賦三篇後一卷爲雜文鳳翔年僅三十一卒文章本未成就與李夢陽爲同年夢陽爲作小傳至比之王勃當時頗以爲黨今觀集中所附夢陽評點惟白巖賦一篇稱揚過甚其他詩文率多譏彈之語則夢陽實未嘗心滿之也

【凌谿集十八卷】浙江巡撫採進本 明朱應登撰應登字升之寶應人宏治己未進士官至雲南布政司參政宏治七子之一也明史文苑傳附見顧璘傳中是集凡賦二卷詩十卷文五卷附錄碑文傳銘詩文一卷朱彝尊靜志居詩話云李何竝與李目空諸子自三秦而外得其門者蓋寡心摹手追凌谿一人而已其口占絕句云文章康李傳新體驅逐唐儒駕馬遷是其生平惟以北地爲宗故詩文格調相近然沈著頓挫處則才力不及夢陽顧璘爲作碑文稱其詩上準風雅下採沈宋磅礴蘊藉鬱興一代之體未

免諛墓之辭矣。

【貞翁淨臺十二卷】浙江汪汝璉家藏本。明周倫撰。倫字伯明，晚號貞翁，崑山人。宏治己未進士，官至南京刑部尚書。諡康僖。是集爲趙士英所刪定。其詩沿臺閣舊派，不免膚廓。士英序謂其有得於陶元亮、王摩詰兩家，非定論也。

【白齋竹里集七卷】浙江汪汝璉家藏本。明張琦撰。琦字君玉，鄞縣人。宏治己未進士，官至興化府知府。加布政使參政，致仕。是集前有嘉靖癸未自序，稱守莆陽日，旣梓平生所作，積數年，又得若干首，有相知君子贊予續梓之文。臺力繇不能盡刻，姑芟撫數十篇附詩之後。是琦尙有前集行世。此則歸田後所刻續集也。琦當何李盛時，別以獨造爲宗。自開蹊逕，王世貞藝苑卮言謂其如夜蛙鳴露，自極聲致，然不脫於泥中。蓋其用思雖苦，鍊骨未輕，有意生新，未免圭角太露。散體則縱筆所如，如遺稽行實一篇，至以案牘語入文，尤非體裁也。

【夢蕉存藁四卷】浙江汪汝璉家藏本。明游潛撰。潛有博物志補，已著錄。是集凡詩三卷，文一卷。其詩工拙互見。七言如薜蘿曉雨溼蝴蝶，楊柳晚風吹栗留，雲深野岸客稀到，天閣斜陽鴉亂啼等句，皆頗有作意。古詩則摹擬溫李，而才力未至，散體不多作，僅二三十篇，亦未入格。其集曰夢蕉者，案集中有夢蕉亭睡起詩，自註云亭在鍾城山隙處，蓋其別業云。

【對山集十九卷】陝西巡撫探進本。明康海撰。海有武功縣志，已著錄。海晚歲縱情聲伎，故樂府特爲擅長。詩文皆不甚留意，不免利鈍互陳。今已以孫景烈刪定之本繕入四庫。此本即張太微所編之原集。

附存其目不沒其哀輯之功云爾。

【王氏家藏集六十八卷】浙江汪汝琛家藏本

一曰浚川集。明王廷相撰。廷相有慎言。已著錄。其詩文

列名七子之中。然軌轍相循。亦不出北地信陽門戶。鄭善夫詩。所謂海內談詩王子衡。春風坐徧魯諸生。一時輿到之言。非篤論也。王士禎論詩絕句曰。三代而還盡好名。文人從古善相輕。君看少谷山人死。獨有平生王子衡。蓋善夫歿後。廷相始見是詩。賙恤其家。甚至也。亦頗有微詞矣。

【內臺集七卷】江蘇巡撫採進本

明王廷相撰。是編刻於嘉靖丙申。凡詩二卷。詞一卷。雜著一卷。奏疏

一卷。雜文二卷。又在家藏集之後者也。時廷相爲都御史。故以內臺爲名云。

【魯文恪存集十卷】浙江孫仰曾家藏本

明魯鐸撰。鐸字振之。號蓮北。景陵人。宏治壬戌進士。官至南

京國子監祭酒。卒。贈禮部侍郎。諡文恪。事蹟具明史本傳。是編爲其子彭嘉所編。前四卷皆詩。第五卷爲使交臺。鐸官編修時。嘗奉使安南。故也。第六卷以下爲雜文。史稱鐸爲司業日。與祭酒趙永。皆李東陽門生也。東陽生日。相約以二帕爲壽。索筭無有。有乾魚食過半矣。乃攜其半饋東陽云云。案司業秩六品。何至貧不能具二帕。無帕可徒往。何必以食殘之物爲敬。皆於事理爲不近。此殆世人欲著其清介。故甚其詞。史因而錄之。然亦足見其素行孤高。故致影造是語。不能不謂之賢者也。至於詩文。則皆不甚擅長。蓋其平生志趣。不在於斯耳。

【山堂萃臺十六卷】浙江汪汝琛家藏本

明徐問撰。問有讀書筭記。已著錄。是編詩六卷。文十卷。而奏

疏三篇。附詩之末。體例殊別。其詩文平正通達。而傷於淺易。中有孫偉方豪黃佐三人評語。蓋即以點勘

之本付雕亦非古式。

【白石野臺十七卷】兩江總督採進本。明林魁撰。魁自號白石山人。龍溪人。宏治壬戌進士。官至雲南兵備副使。是集賦詩詞六卷。序記雜言等十卷。前有自序。稱平生應酬雜藁。毋憂千首。審非作家。然亦一愚之發也。今觀集中。如上吏部揭帖。及與楊一清李東陽諸書。頗足覘其學行。詩亦俊逸。惟其稱心而談。不免乏鍛鍊之功耳。

【水南臺十九卷】浙江汪汝璫家藏本。明陳霆撰。霆有唐餘紀傳。已著錄。是集所載諸詩。意境頗爲蕭灑。而才氣空涌。信筆而成。故往往不暇檢點。古文大致樸直。而少波瀾頓挫之勝。惟詩餘一體較工。其豪邁激越。猶有蘇辛遺範。末附詩話一卷。中間論詞一條。謂明代騷人多不務此。閒有知者。十中之一二。則其自負亦不淺矣。

【周恭肅集十六卷】浙江汪汝璫家藏本。明周用撰。用字行之。吳江人。宏治壬戌進士。官至吏部尙書。諡恭肅。事蹟具明史本傳。是集爲其子國南所編。凡詩九卷。詩餘一卷。文六卷。其詩古體多擘緩之音。近體音節頗宏整。文則平實坦易。縱其筆之所如。

【樗林摘藁三卷附錄一卷】浙江汪汝璫家藏本。明秦鏜撰。鏜字國和。號樂易。又自號類樗子。無錫人。宏治甲子舉人。親沒後。不復進取。嘉靖中。召選人。不願試者。授以散銜致仕。遂循例授南京都察院都事。是集爲其子淮漳所刊。凡詩三卷。附錄贊銘誌文爲一卷。鏜隱居不仕。絕意時名。其於詩特以寄興。故附錄諸篇。皆叙其隱德。而不及其文章。朱彝尊明詩綜。亦未採錄一篇云。

【未齋集二十一卷】浙江巡撫探進本

明顧鼎臣撰。鼎臣字九和。崑山人。宏治乙丑進士第一。官至武

英殿大學士。諡文康。事蹟具明史本傳。初鼎臣以直講筵受世宗恩眷。世宗好長生術。內殿設齋醮。鼎臣進步虛詞七章。且列上壇中應行事宜。又享太廟。上命鼎臣及霍韜捧主。二人有期功常辭。鼎臣乃言古者諸侯絕期。今公卿即古諸侯。請得毋避。深爲清議所譏。惟其憫東南賦役失均。屢陳其弊。及請崑山築城。卒免倭患。爲其鄉人所稱。明史藝文志載鼎臣集二十四卷。今所存者凡二本。一爲其孫晉璠等輯。凡文臺六卷。詩六卷。續臺六卷。其題曰顧文康集。較史志少六卷。此本多三集四卷。亦止二十二卷。不足二十四卷之數。或集本殘闕。或史文偶誤。則莫之詳矣。

【鉛山堂集二十五卷】編修勵守謙家藏本

明嚴嵩撰。嵩字惟中。分宜人。宏治乙丑進士。官至大學士。

事蹟具明史。姦臣傳。嵩雖怙寵擅權。其詩在流輩之中。乃獨爲迥出。王世貞樂府變云。孔雀雖有毒。不能掩文章。亦公論也。然迹其所爲。究非他文士有才無行。可以節取者比。故吟咏雖工。僅存其目。以明彰瘡之義焉。

【洄詞別本十七卷附錄四卷】兩江總督探進本

明崔銑撰。銑有讀易餘言。已著錄。是集原本爲趙王

所刊。僅十二卷。編年排次。而不分體。此本乃嘉靖甲寅池州知府周鎬命貴池教諭范蒞所重編。始區別體裁。以類彙次。而其文則無所增損焉。

【甘泉集三十一卷】廣東巡撫探進本

明湛若水撰。若水有二禮經傳測。已著錄。據若水門人洪垣所

記。其集本四十八冊。刊以行世者十五冊。此本凡樵語一卷。新論一卷。雍語一卷。二業合一訓一卷。大科

訓規一卷。書一卷。新泉問辨錄一卷。新泉問辨續錄一卷。問疑錄一卷。問疑續錄一卷。金陵問答一卷。金臺問答一卷。書問二卷。古樂經傳或問一卷。序記章疏二卷。講章一卷。雜著一卷。約言一卷。語錄一卷。揚子折衷略一卷。非老子略一卷。詩二卷。歸來紀行略一卷。嶽游紀行略一卷。祭文碑銘二卷。外集一卷。蓋語錄居十之九。詩文其餘贅耳。

【梅國集四十一卷】浙江孫仰曾家藏本

明劉節撰。節有春秋列傳。已著錄。是集凡詩十二卷。附以詩餘雜文二十九卷。考節所輯廣文選。採摭浩博。而門目瑣碎。體例冗雜。頗有貪多務得之失。其所自作。亦惟取明白條暢。盡所欲言。往往下筆不能自休。故不免稍傷於蔓衍。

【寶制堂錄二卷】江西巡撫探進本

明劉節撰。是集乃節官副都御史時。其子魯掇拾雜藁而成。前有林庭楫呂柟方豪三序。皆題曰寶制堂私錄。以明非節所自編。此本標題。乃皆作寶制堂錄。蓋其曾孫一翼等重刻所改也。然節之著作。備於梅國集中。此未全之本也。

【石川集四卷附集一卷】浙江巡撫探進本

明殷雲霄撰。雲霄字近夫。壽張人。宏治乙丑進士。官至南京工科給事中。嘗疏論武宗納有娠女子馬姬事。以峭直稱。明史文苑傳附載鄭善夫傳中。是集分二種。又各分詩文爲二卷。曰瀛洲集者。官靖江知縣時作。曰芝田集者。官青田知縣時作。附一卷。曰金陵藁者。則官南京時作也。史稱雲霄嘗作蓄艾堂聚書數千卷。以作者自命。多與孫一元唱和。詩派亦與相近。然大抵才情富贍。而骨格未堅。

【孟有涯集十七卷】浙江孫仰曾家藏本

明孟洋撰。洋字望之。一字有涯。信陽人。宏治乙丑進士。官至

監察御史。以論張瓊桂萼下獄。謫桂林府教授。移知汝上縣。終南京大理寺卿。是集詩十三卷。文四卷。洋娶於何氏。故其詩格多効何景明。而才則不逮。景明之沒。洋誌其墓。其文亦不甚工。

【玉巖集九卷附錄一卷】兩江總督採進本。明周廣撰。廣有江西通志。已著錄。所著詩文。自釋褐以前。曰初稟。官縣令時曰鳴琴稟。御史時曰排雲稟。謫懷遠時曰啖荔稟。官建昌時曰量移稟。曰乞骸稟。謫竹寨時曰沅芷稟。官江西時曰攬轡稟。曰閱江稟。視學福建時曰外臺稟。官巡撫時曰內臺稟。官刑部時曰邦禁稟。篇帙甚富。後其子甸同邑周鳳鳴。簡汰編次。定爲此集。凡詩六卷。文三卷。卷中仍註原集諸名。附錄一卷。則誌狀之屬也。廣在正德中。疏攻錢寧。直聲動海內。而文名不甚著。故歸有光序。止著其生平大節。而不論其詩文之工拙云。

【倪小野集二十二卷】江蘇巡撫採進本

明倪宗正撰。宗正字本端。餘姚人。宏治乙丑進士。官兵部武

選司員外郎時。嘗以言事廷杖。後終於南雄府知府。嘉靖中。賜祭葬。贈學士。諡文忠。所著有豐富集。突兀。觀海集。太倉稟。晚年復有小野集十六卷。此本二十二卷。蓋國朝康熙中。其七世孫健宗彙輯重刻。而題以最後之名者也。謝遷豐富集序。述李東陽之言。謂明之詩文。至宗正而集大成。未免推之已甚。宗正嘗有詩云。偶入棠陵眼。難齊少谷肩。棠陵方豪別號。少谷鄭善夫別號也。可謂自知之審矣。

【治齋集十七卷】浙江孫仰曾家藏本

明萬鏜撰。鏜字仕鳴。進賢人。宏治乙丑進士。官至吏部尙書。事

蹟附見明史李默傳。是編凡奏議十卷。分順天南京南臺勘夷北兵吏部辭謝稱賀八集。文集四卷。詩詞三卷。每集冠以自序。而其文一字不易。蓋其後人印行之時。分冠每集之首。而忘其合而編之。遂致複出。

也。史載鏜爲南京都御史時，以星變上言八事除名，頗著丰采。後爲嚴嵩汲引，起爲副都御史，征湖廣蜡爾山蠻，勦撫失宜，暫平復叛，委罪於偏裨以解。及居吏部，委曲以順嵩，反爲趙文華斥，擠罷官。則是集所載奏議未必盡爲可據，詩文則更其餘事矣。

【南原集七卷】

江蘇周厚堉家藏本

明王韋撰。韋字欽佩，上元人。宏治乙丑進士，官至太僕寺少卿。明

史文苑傳附見顧璘傳中。韋與璘及朱應登、陳沂相友善。時有朱顧、陳王之目，朱顧皆羽翼北地，共立壇墀，而韋與陳沂獨心懲勦襲之，非頗欲自出手眼。閣試春陰一篇，當時至謂有神助。然所作多尙穠麗，亦未能突過李何。是編璘所選定，凡詩三卷，文四卷。前有璘所作小傳一篇。

【西樵遺藁八卷】

浙江巡撫採進本

明方獻夫撰。獻夫有周易傳義約說，已著錄。是集名曰西樵，以早

年讀書西樵山也。獻夫緣議禮驟貴，故開卷即冠所上大禮疏。明史本傳謂其雖執大政，氣厭厭不振。入閣之初，攻者四起，故集中多引疾求退之章，無所謂嘉言碩畫云。

【行遠集行遠外集】

皆無卷數，內府藏本

明陸深撰。深有南巡錄，已著錄。其文集續集，刻於嘉靖中。此

集則崇禎庚午，其曾孫休寧縣知縣起龍所編。前有起龍述言一篇，稱深隨地著述，散見四方者，邈不可購。所鐫正續集一百五十卷，有奇，十不得五。迄今模糊散佚，又十之二三。起龍睠懷先澤，多方搜購，見輒筆之。又積至二十餘卷，以次校編，又稱附以年譜，重開生面云云。今考此本所載，皆文裕集所已收。蓋其時舊刻散佚，因掇拾所存，重刻此版，故稱蒐購。實則非續獲於正續二集之外也。所稱年譜，今亦不存。或瘕緝偶漏，或歲久版又佚缺歟。

【雪窗詩六卷】浙江汪汝瑛家藏本

明吳爰撰。爰字翼夫。上海人。本姓陸。以父贅於吳。故冒其姓。本名

瑗。後去玉旁名爰。則不知其何故也。是集爲其門人高介所編。淺弱殊甚。如謝定翁招聯句詩云。舊雨不來新雨至。繡衣寧豈布衣嫌。寧豈二字。殆不成語。又附載其里人張衍評語。如朱隱翁易齋詩曰。庖犧王天下。龍馬負河圖。夏禹治水成。元龜呈洛書。即密點其旁。批於句下曰。味易之深。有此等語。通集大抵此類。殆故相侮弄耶。

【霞城集二十四卷】浙江汪汝瑛家藏本

明程誥撰。誥字自邑。歙縣人。生平好遊。所至山川都邑。輒紀

以詩。卷帙雖多。亦瑕瑜互見。朱彝尊靜志居詩話云。誥詩氣格專學空同。第才情稍鈍。色澤未鮮。五言庶稱具體耳。其論當矣。

【類彙十卷】江西巡撫採進本

明涂幾撰。幾字守約。又字孟規。宜黃人。以隱居著述稱。然朱彝尊靜志

居詩話。謂幾嘗撰時事策十九篇。上言孝廟。大言不怍。蓋非安於遜世者云云。今觀其集。亦不甚講經世之學也。

【士齋集三卷】兩淮鹽政採進本

明女子鄒賽貞撰。賽貞當塗人。贈監察御史謙之女。翰林院編修溧

韶之母也。當時稱爲女士。故自號曰士齋。是集凡詩二卷。雜文一卷。其壻大學士費宏爲之序。考明宏治中有御史鄒魯。謫官蕭山令。以私憾害何舜賓。其子競結客復仇。毆魯幾死。遣官鞫實。競與魯皆抵罪。見於明史。孝義傳。今以賽貞所作其父謙行狀證之。則賽貞即魯之妹也。

【丹巖集十卷】浙江孫仰曾家藏本

明黃雲撰。雲字應龍。丹巖其別號也。崑山人。宏治中。以歲貢授瑞

州訓導是集凡詩四卷文六卷其門人巡按御史高安朱實昌所編中多與沈周文徵明諸人往來題咏之作。

【東壁遺藁二卷】浙江孫仰曾家藏本 明蔣燾撰燾字仰仁長洲人徐有貞之外孫也九歲能究經史

百家言十一歲補郡學生十七歲而卒祝允明爲作遺文後序載其死爲丹臺記事甚怪燾外舅程遵爲作墓誌墓碣集序乃無一語及之允明故好奇所作野記志怪諸書朱孟震河上楮談稱其百無一信則所述燾事殆影附李賀小傳爲之未必有據矣是編乃燾沒之後遵所編次凡論十五篇策五篇表四篇皆其揣摩科舉之文大抵才氣溢發有蘇氏父子遺意而神鋒太雋義蘊未深則天限其年學問未足副之也遵序稱燾在時嘗題其文曰東壁錄故因其志題曰東壁遺藁云

【尋樂堂集十一卷】江西巡撫採進本 明王烈撰烈字正邦樂安人尋樂其別號也成化宏治間諸生是集文五卷詩六卷末附其族孫澂江府經歷素節所撰行實一篇載其論文論經史之語蓋志大而學則未廣者也

【康谷子集六卷】湖南巡撫採進本 明劉養微撰養微字敬伯廣濟人是集前三卷爲樂府及詩四卷則其說鈴及自譜四則其詩宗李夢陽而才力薄弱頗窘於邊幅其說鈴內極推夢陽謂古色過於子美未免爲偏好之言五卷以下附其弟養言詩文及其遠祖天行文煥等傳又附劉秉鈔石浪詩鈔劉醇駿盟鷗集劉鷗化味閒軒遺藁數種皆寥寥數篇姑備劉氏一家之書而已

【句曲紀遊詩一卷】兩淮馬裕家藏本 明朱凱撰凱字堯民長洲人與同里朱存理齊名稱爲二朱先

生所著有堯民集久已散佚。故朱彝尊明詩綜不載其詩。但附其名於存理之下。且云有句曲紀遊一卷。亦不傳。此本乃馬裕家所藏。未有馬人伯跋。謂崇禎己巳仲秋。摹錄成宏諸先哲詩。因凱度先生談及。借得此本。鈔於雙橋齋中。云云。則明末尚有傳本。彝尊偶未見耳。編中古體八首。近體十七首。乃正德丁卯三月十三日。凱與東陽沈用之。沈宜永兄弟同遊三茅山而作。前有凱自序。末有凱友吳奕跋。

【謙光堂詩集八卷】兩廣總督採進本

明文城王朱彌鉗撰。彌鉗號秋江翁。唐莊王芝趾次子。初封文

城王。後以子宇溫嗣。封唐王。彌鉗亦追封唐王。諡曰恭。明史附見唐王。梃傳。稱其有學行。孝友。篤至。是集諸體詩凡八卷。而賦物居其大半。詠梅一韻至百首。頗見才氣。而骨格尙未成就。集爲正德戊寅。彌鉗所自編。卷首有嘉靖辛丑。思誠子序。思誠子即宇溫自號也。親藩尊貴。筆札例不署名。然子序父集。則又不當拘此格。此亦於禮未協者矣。

【省愆彙五卷】江西巡撫採進本

明劉魁撰。魁字煥吾。泰和人。正德丁卯舉人。官至工部員外郎。嘉靖

初。疏諫雷壇工作太急。忤旨。廷杖。與楊爵周怡同長繫鎮撫司獄。久之。釋歸而卒。隆慶初。贈太常寺少卿。事蹟具明史本傳。所著有晴川集。仁恩錄。今皆不傳。此編乃其詩集。其六世族孫承琦所編。與黃淮省愆集同名。蓋亦獄中作也。魁少從王守仁游。講良知之學。登朝以氣節著。吟咏非所注意。大抵皆一時遣興之作而已。

【禺山文集一卷詩集四卷】江蘇巡撫採進本

明張含撰。含字愈光。永昌衛人。正德丁卯舉人。其學出

於李夢陽。又與楊慎最契。故詩文皆慎所評定。慎序有曰。張子自少不喜爲時文。舉子語。見宋人厭棄之。

猶賦也。其爲文必弓左字必蒼雅。其推挹甚至。然其病正坐於此。故襍積字句。而乏鎔鑄運化之功。明人別有雕鏤堆砌一派。含其先聲歟。蓋慎在雲南。無可共語。得一好奇之士。遂爲空谷足音。不覺譽之過當。且慎名旣重。聞者咸推波助瀾。而贗古之文。又足以駭俗目。含遂盛爲文士所稱。實則塗飾之學。與其師同一病源。各現變證也。

【涇野集二十六卷】浙江汪汝璫家藏本。明呂構撰。構有周易說翼。已著錄。其集初刻於西安。旣而佚闕。其門人徐紳吳遵陶欽重爲刪補編次。刻於真定。此本即真定刻也。紳之學出薛敬之。敬之之學出於薛瑄。授受有源。故大旨不失醇正。然頗刻意於字句。好以詰屈奧澀爲高古。往往離奇不常。掩抑不盡。貌似周秦閒子書。其亦漸漬於空同之說者歟。

【矯亭存藁十八卷續藁八卷】兩淮馬裕家藏本。明方鵬撰。鵬有續觀感錄。已著錄。是集詩文多應酬之作。所載筆記亦無所發明。

【韓五泉詩集四卷附錄二卷】浙江汪汝璫家藏本。明韓邦靖撰。邦靖有朝邑縣志。已著錄。是集乃其兄邦奇所編。以誌傳二卷附錄於後。邦靖兄弟負重名。時有關中二韓之目。而詩則不出當日之風氣。王九思云。五泉子七言絕句詩。絕類少陵古歌詞。浸淫唐初。逼漢魏矣。標榜之詞。未免溢美。朱彝尊靜志居詩話曰。五泉心摹手追。乃在大復。比於西原南冷不足。方之孟有渥李嵩渚。似勝一籌。斯爲平允之論矣。

【烏鼠山人集二十九卷】兩淮馬裕家藏本。明胡纘宗撰。纘宗有安慶府志。已著錄。是編凡正德集四卷。嘉靖集七卷。烏鼠山人小集十六卷。後集二卷。其詩激昂悲壯。頗近秦聲。無斌媚之態。是其所長。多粗

厲之音。是其所短。

【擬涯翁擬古樂府二卷】陝西巡撫探進本 明胡纘宗撰。纘宗游李東陽之門。乃取東陽古樂府二卷。

以次屬和。立題指事。率由東陽之舊。亦間有所釐正。凡一百八首。太康張光孝爲之評。而其弟統宗爲之註。

【擬漢樂府八卷】陝西巡撫探進本 明胡纘宗撰。一名輿上集。以其多成之輿上也。漢樂府多聲詞合

寫。不能復辨。沈約宋書言之甚明。纘宗乃揣摩題意爲之。殊類於刻舟求劍。況唐人歌詩之法。宋人不傳。惟小秦王一調。勉強歌之。尙須雜以虛聲。乃能入律。宋人歌詞之法。元人亦不傳。白石道人歌曲。自度諸腔。所注節拍。今皆不省爲何等事矣。纘宗乃於千年以外。求漢樂府之音節。不愈難而愈遠乎。

【邃谷集十二卷】兩淮馬裕家藏本 明戴冠撰。案明有兩戴冠。其一長洲人。有禮記集說辨疑。已著錄。

此戴冠字仲鸞。信陽人。正德戊辰進士。官至山東提學副使。事蹟具明史本傳。或混爲一人。非也。冠受業於鄉人何景明。詩亦似之。然景明詩雖風姿俊逸。而醞釀猶深。冠才學皆遜於師。而徒守其格調。殆所謂時女步春。終傷婉弱者矣。

【少岷拾存彙四卷附司徒大事記一卷】兩廣總督探進本 明曾璵撰。璵字東玉。瀘州人。正德戊辰進

士官。至建昌府知府。宸濠之叛。璵率屬引兵。從王守仁破賊。收復南康。集中有平江凱歌。即記是事也。璵號少岷山人。其集本曰少岷存彙。此本乃隆慶辛未南京工部主事章懋所選定。故曰拾存。後載司徒大事記一卷。自裁冗食。至重漕政。凡十條。皆陳當世時務。題曰戶部江西司郎中臣曾璵修。蓋奏進之書。附

刻集末者也。

【毛襄懋集十八卷】江西巡撫探進本。明毛伯溫撰。伯溫有奏議已著錄。此本凡詩十卷。文八卷。文格頗疎暢。詩則所造不深。詞多淺易。蓋伯溫北拒蒙古。南服安南。以功名自見於世。文章非所專營。童承欽序稱正德間李何首倡雅頌。復振嗣響。有唐伯溫亦其一。乃自尊其師之詞。非公論也。

【東塘詩集十卷】浙江范懋柱家天一閣藏本。明毛伯溫撰。是集爲伯溫所自編。後併入全集。此乃其初出別行之本。

【歐陽恭簡集二十二卷】浙江巡撫探進本。明歐陽鐸撰。鐸字崇道。泰和人。正德戊辰進士。官至吏部右侍郎。諡恭簡。事蹟具明史本傳。史稱鐸清介自持。內行修飭。嘗知延平。毀淫祠百十所。以其材葺學宮。壇廟。今考集中延平改建山川壇記。具載其事。與史相符。集中又有上嚴嵩書。然祇敘述榮遇。而無一字及其相業。猶異於稱功頌德之流。其文娟秀自喜。而邊幅頗狹。詩多近體。又遜於文。

【東畬集十四卷】浙江汪汝璥家藏本。明錢琦撰。琦有錢子測語已著錄。是集爲其子蕭蓀等所編。其文如申請設縣事宜。以及論禦寇勸捕蝗諸作。皆能留心世務。詩則氣味和粹。而警策者稀。陸師道稱其七言絕句云。江北滁南數日程。蕭蕭落木送秋聲。夕陽滿地鳥飛絕。人在亂山堆裏行。頗亦瀟灑有致。然集中似此者。正不多觀也。

【峯溪集五卷外集一卷】浙江孫仰曾家藏本。明孫璽撰。璽字朝信。平湖人。正德戊辰進士。官至山西按察司僉事。是集乃其子刑部尚書植所編。璽先世居松江之華亭。南有九峯。東有盛溪。自號曰峯溪道。

人併以名集。卷一至卷四爲詩。多往來滇晉道中。游覽之作。卷五爲文。不過試策書啓之類。外集則其任揚州時所頒條令也。

【棠陵集八卷】浙江汪汝璫家藏本。明方豪撰。豪有斷碑集。已著錄。是集前六卷爲文。後二卷爲詩。豪

與鄭善夫友善。集中有祭鄭繼之文。叙交情極爲篤摯。而詩則不及善夫遠甚。

【鍾筠溪家藏集二十卷】浙江范懋柱家天一閣藏本。明鍾芳撰。芳有春秋集要。已著錄。瓊州府志載

芳詩文集二十卷。此集文二十四卷。詩六卷。與志不符。蓋志誤三爲二也。第二十卷。第二十一卷。爲讀書

札記。第二十二卷。爲皇極經世圖續。所推起宋神宗迄明嘉靖。第二十三卷。爲雜著。第二十四卷。爲夷情

要覽。蓋皆各自爲書者。附編於文集中云。

【丁吏部文選八卷】江蘇巡撫採進本。明丁奉撰。奉字獻之。常熟人。正德戊辰進士。官至南京吏部郎

中。著有南湖留臺。南湖逸臺。此集則宣城梅守箕合二臺選輯者也。凡詩四卷。文四卷。而詩末附以史贊。

文末又附詩三首。體例頗爲叢脞。詩文皆未成家。史論二卷。亦大半陳因之語。

【漁石集四卷】兩淮鹽政採進本。明唐龍撰。龍有易經大旨。已著錄。龍歟歷中外。所著有黔南集。江右

集。關中集。晉陽集。淮陽集。陝西提學僉事王維賢爲合而刻之。以成此集。其文頗具浩瀚之氣。詩尤長於

五言。然集中自朱彝尊詩話所摘數聯以外。亦復罕逢佳句矣。

【涂水集八卷】浙江朱彝尊家曝書亭藏本。明寇天叙撰。天叙字子惇。榆次人。正德戊辰進士。官至兵

部侍郎。事蹟具明史本傳。是集凡詩文三卷。巡撫陝西時奏疏五卷。天叙爲應天府丞時。值武宗南征宸

濠力抗權倖。以風節著。後巡撫甘肅。又屢以戰功顯。詞采則非所擅長。故郭璽序亦稱其平日未嘗肆志於文章云。

【東廓集十二卷】江西巡撫探進本 明鄒守益撰。守益字謙之。安福人。正德辛未進士。官至南京國子

監祭酒。隆慶初。追諡文莊。事蹟具明史儒林傳。守益傳。王守仁之學。詩文皆闡發心性之語。其門人陳辰始編錄所作爲東廓初稟。東廓山名。守益講學處也。諸門人又梓其切要者一百二十四篇。名曰摘稟。而晚年著述則未之備。是編爲嘉靖中所刊。題建寧府知府劉佃彙選。同知董燧編次。通判黃文明掄集。又題門人周怡宋儀望邵廉續編。孫德涵等十八人重輯。錯互顛舛。莫知竟出誰手也。史稱世宗欲去興獻帝。本生之稱。守益疏諫。下獄拷掠。嘉靖二十九年。九廟災。守益疏陳。上下交修之道。又忤旨落職。其疏具載本傳。今集中乃不載。考千頃堂書目。此集之外。尚有東廓遺稟十三卷。今未見其本。或別收於遺稟中歟。

【陽峰家藏集二十五卷】浙江孫仰曾家藏本 明張璧撰。璧字崇象。石首人。正德辛未進士。官至禮部

尙書。東閣大學士。諡文簡。是集爲璧居內閣時所自編。首以經筵講章及議典禮之文。次爲應制諸詩。及誥敕賦頌表疏。次爲古今體詩。及雜文。璧當夏言嚴嵩相持之時。入閣不及一年而卒。明史不爲立傳。其人蓋無所短長者。今觀其詩文。殆亦如其爲人焉。

【黼菴遺藁十卷】江蘇巡撫探進本 明柴奇撰。奇字德美。崑山人。正德辛未進士。官至應天府尹。奇在

正德時。諫南巡。劾權倖。及上邊儲屯政諸疏。頗著直聲。以當時自焚其草。故集中不載。是編前有正德辛

已題識稱舊有石池詩藁石池文藁嘉樹軒紀聞各一冊己卯轉南光祿失之重置一冊錄後來之作時有所憶或就人錄得亦錯置其閒云云蓋猶奇所手編也凡詩六卷雜文四卷皆平易有餘精深不足鄒守益序稱其詩文典雅雄健不落軌轍不矜刻峭友朋推挹之詞耳

【巽峰集十二卷附錄一卷】兩淮鹽政採進本 明尹襄撰襄字舜弼號巽峰永新人正德辛未進士官至司經局洗馬是集凡詩五卷文七卷後有其子祖懋題識謂原集十卷刻於閩中繼復收輯得十二卷其文持論頗純正而波瀾結構則未造古人

【平田詩集二卷】陝西巡撫採進本 明管楫撰楫字汝濟號平田又號竹木山人咸寧人正德辛未進士官至右副都御史巡撫山東因與嚴嵩相忤辭疾家居二十年文徵明嘗畫平田草堂杜曲山房二圖竝詩貽之重其人也此集前有張治道序稱驪邑令刻諸縣齋楫不知也又有楫自序稱再閱舊藁又刪其十之三然其本今皆不傳故朱彝尊作明詩綜不列其名此本乃乾隆初其裔孫錫綬所輯其詩頗沿七子之派蓋楫與薛蕙何景明高叔嗣諸人相倡和漸染而然也

【費文通集選要六卷】江蘇巡撫採進本 明費察撰察有廣信府志已著錄所著文名鍾石集本二十四卷此本乃劉同升許穀所選與其兄宏詩文合刻之本也

【東巖詩集八卷】浙江巡撫採進本 明夏尙樸撰尙樸有東巖文集已著錄此編乃其詩集多涉理語近白沙定山流派集中讀擊壤集絕句云閒中風月吟邊見始信堯夫是我師其宗法可知也

【古菴文集十卷】兩江總督採進本 明毛憲撰憲有諫垣奏草已著錄是集乃其子訢所編凡文八卷

詩二卷。憲居言路。以憲直稱。故所作頗有剛勁之氣。以耳疾謝歸。後與王守仁湛若水諸人講學。繩墨自守。務爲篤實。故亦不恣意高談。然以文章而論。則於是事非當家也。

【蓉川集七卷】

兩江總督探進本

明齊之鸞撰之鸞字瑞卿桐城人。正德辛未進士。官至河南按察使。

事蹟具明史本傳。是集爲其曾孫山所編。凡五種。一曰南征紀行。爲其從征宸濠時所作。雜詩後附賦一首。一曰悠然亭雜詩。爲其官南京時作。後附記序三首。一曰開堰集。爲其在安慶時所作。一曰歷官疏草。皆其奏議。起正德九年。訖嘉靖八年。每種爲一卷。一曰入夏錄。析爲三卷。乃其僉事寧夏時作。前二卷皆詩。後一卷則雜文。別以汪元錫等贈言附於末。而總冠以小傳行狀年譜。後有山跋語。稱閒遊市闈。得遺藁數篇。已而徧歷茶坊藥肆。恣意搜輯。編次成帙。因康熙己未詔修明史。檄取入夏錄送官。遂哀而付諸剞劂。蓋之鸞位雖不顯。然在正嘉之間。卓卓稱名臣。故史館徵其著作。以備採擇。今觀其奏疏詞多剴切。猶可想見風采。詩則非所擅長也。

【節愛汪府君詩集二卷】

浙江范懋柱家天一閣藏本

明汪文盛撰。文盛字希周。崇陽人。正德辛未進

士。除饒州推官。入爲兵部武選司主事。諫南巡廷杖。嘉靖初出知福州。歷官按察使。以僉都御史巡撫雲南。進大理卿。事蹟附見明史。毛伯溫傳。伯溫之官安南也。文盛功居多。顧不得優叙。論者惜之。其知福州也。有惠政。郡人爲立節愛祠。故傅海舟編次其詩。即以名集。詩多虛響。不出北地信陽門徑。朱彝尊明詩綜。所選萬年枝上露清華一首。題曰西苑。今考此集。實爲擬古八首之一。不知彝尊何以改其原題。其偶誤也歟。

【後齋遺藁二卷】浙江汪汝璉家藏本

明陳憲撰。憲字伯度。後齋其號也。餘干人。正德辛未進士。官至

貴州布政使司參議。是集公餘紀拙一卷。粵江行藁一卷。乃憲之子鄞縣丞照所編。首有鄞縣人戴鰲序。謂其得鄉先哲胡居仁之傳。故詩多理語。鮮風人之致云。蓋當時本以理學推之也。

【桃谷遺藁一卷】兩淮馬裕家藏本

明陸倅撰。倅字天爵。吳縣人。正德辛未進士。官刑部時。嘗以諫南

巡廷杖。後終於寶慶府知府。其詩多應酬牽率之作。而時露風格。岳岱今雨瑤華。謂其晚就操觚。靈心夙構。穎悟居多。蓋天姿高而學力未至者也。

【漸齋詩草二卷】浙江巡撫探進本

明趙漢撰。漢字鴻達。平湖人。正德辛未進士。官至山西布政司參

政。是集刻於嘉靖乙卯。詩學江西。於爾時爲別調。然風格雖異。與象未深。究不能獨絕一時也。

【襄敏集四卷】浙江汪啓淑家藏本

明王以旂撰。以旂有漕河奏議。已著錄。是集爲其子齋所編。凡詩

二卷。文二卷。以旂治河按邊。皆以功見。而詞章不著於當時。此集所存。大抵皆應酬作也。

【琴溪集八卷】兩淮鹽政探進本

明陳寰撰。寰字原大。常熟人。正德辛未進士。官至南京國子監祭酒。

寰與桂萼爲同年。官翰林時。乃力斥萼議大禮之非。坐是移南京。旋告歸。其人足重。詩文則皆不入格。

【八厓集十三卷】浙江巡撫探進本

明周廷用撰。廷用字子賢。華容人。正德辛未進士。官至江西按察

使。是集賦一卷。詩六卷。文二卷。後附緒論四卷。則其訓飭士民之說。顧璘國寶新編。以廷用爲殿。其贊云。

按察人豪。闊視放言。文藻性成。早垂鉅篇。然廷用自以耿直傳。不必以文藻著也。

【常評事集一卷】山西巡撫探進本

明常倫撰。倫字明卿。號樓居子。沁水人。正德辛未進士。除大理寺

評事謫壽州州判。遷知寧羌州。負才凌傲。屢爲忌者所中。後因跨馬疾馳。馬渴赴飲。墮水死。年僅三十。有四是集賦五首。樂府二十一首。各體詩百餘首。傳贊等雜著數篇附之。王世貞謂其詩如沙苑兒駒。驕嘶自賞。未諧步驟。陳子龍則謂其氣骨高朗。頗能自運。今觀是編。合二人之論。乃爲定評。國朝王士禛分廿餘話云。明詩人有早慧而年不得四十者。如陳后岡。董中峰。與明卿之屬。汗血方新。而筋骨未就。秀而不實。殊可惜也。

【鷗汀長古集二卷前集二卷別集二卷續集一卷漁嘯集二卷頓詩一卷】直隸總督探進本 明頓銳撰。銳字叔養。涿州人。正德辛未進士。官代府右長史。銳少負詩名。當時稱涿郡有才一石。銳得其八斗。晚年卜居懷玉山。吟咏自適。其五言古詩。氣韻清拔。頗爲入格。七言古詩。跌蕩自喜。而少剪裁。近體專尙音節。數篇以外。意境多同。蓋變化之功。猶未至也。

【杏東集十卷】浙江孫仰曾家藏本 明郭維藩撰。維藩字价夫。正德辛未進士。官至太常寺少卿。兼翰林院侍讀學士。掌院事。是集詩文各五卷。皆乏深湛之思。其門人河南巡撫蔡汝棹序。稱所著經筵南雍二稟。俱不可見。此集已非完書。由維藩存日。無意傳其詞章。蓋亦道其實也。

【海涯集十卷】浙江汪汝璫家藏本 明顧磐撰。磐字子安。南直隸通州人。正德癸酉舉人。是集詩四卷。詩餘附焉。文六卷。集中如考正鄉賢祠典。以及水利馬政諸作。於鄉邑利病。亦頗爲詳核。然大致以流利爲主。故不爲詰屈。亦不造精深。

【南湖詩集四卷】浙江汪汝璫家藏本 明張纒撰。纒有杜詩通。已著錄。是集詩多豔體。頗涉佻薄。殆玉

臺香奩之末流。每卷皆附詞數闋。考繩嘗作填詞圖譜。蓋刻意於倚聲者。宜其詩皆如詞矣。

【古山集四卷】江西巡撫探進本

明桂華撰。華字子樸。安仁人。正德癸酉舉人。大學士夢之兄也。嘗從

胡居仁門人張正游。故所學頗爲醇正。詩文則尙未成家。

【渭厓文集十卷】江蘇巡撫探進本

明霍韜撰。韜有明良集。已著錄。是編爲其子與瑕與琦所編。皆所

作雜文。惟七卷有詩數十首。韜性強執。謬戾不顧。是非議尊。典獻爲皇考。則斥司馬光不知忠孝。不當從祀孔廟。議合祀天地。則竝詆及周禮。可謂無忌憚者。其他文亦皆爭辨迫急。異乎有德之言。前有倫以諒金立敬二序。譽之甚力。蓋一其鄉曲。一其年家子也。

【西原遺書二卷】直隸總督探進本

明薛蕙撰。蕙有約言。已著錄。是編乃戶部侍郎南充王廷所輯。嘉

靖癸亥。刻於揚州。皆其與人講學往復書札也。其闡中庸中和之說。孟子性善之旨。研析頗至。惟推崇釋道太甚。如云空寂者。即吾未發之本心。定慧者。即古聖人之誠明。又云禪學不惟賢於後世之仙學。雖吾後儒之學。亦非其倫。又於論黃庭大洞諸經。俱自謂得其要妙。皆不免參雜二氏。未能粹然一出於正。蕙本詩人。考功一集。馳驟於何景明徐禎卿高叔嗣閒。竝驚爭先。原足以自傳不朽。乃求名不已。晚年忽遁而講學。所講之學。又蹉駁如是。反貽嗤點於後來。蛇本無足。子爲之足。其蕙之謂乎。

【谿田文集十一卷補遺一卷】兩江總督探進本

明馬理撰。理有周易贊義。已著錄。是集凡文六卷。詩

五卷。補遺一卷。則有文無詩。理少從王恕游。務爲篤實之學。故所詁諸經。亦多所闡發。惟其文喜摹尙書。似夏侯湛昆弟誥之體。遺詞宅句。塗飾瑣刻。其爲贗古視李夢陽又甚焉。明史儒林傳。載楊一清督學關

中見理及呂柟康海文大奇之曰康生之文章馬生呂生之經術皆天下士也則一清雖賞識之已不以文章許理與柟矣史又稱理名震都下高麗使者慕之錄其文以去蓋亦以其人重之耳

【頤山私藁十卷】副都御史黃登賢家藏本 明吳仕撰仕字克學號頤山宜興人正德甲戌進士官至

四川布政司參政是編凡詩三卷文七卷皆意境平淺不耐尋繹

【南泠集十一卷】兩江總督採進本 明蔣山卿撰山卿字子雲千頃堂書目作字仙卿傳寫誤也儀真

人正德甲戌進士官至廣西布政司參政是集爲山卿所自訂其門人喬佑校刻前有自序云弱冠見東

吳顧吏部寶應朱戶曹教以讀漢魏晉宋唐人之詩年二十九舉進士好與同年亳州薛子蕙研攻古作

是時信陽何子景明與薛鄰嘗聞其緒論焉其學詩大旨已盡於此顧璘序稱其下筆千言才情煥發朋

輩每爲斂手而王世貞又以不堪咀嚼少之持論互異今觀其集正韓愈所謂無好無惡之詩耳

【函山集十卷】山東巡撫採進本 明劉天民撰天民字希尹號函山歷城人正德甲戌進士除戶部主

事諫武宗南征廷杖改禮部諫大禮復廷杖遷吏部郎中出知壽州歷官按察司副使朱彝尊詩話稱天

民晚以計吏罷憤懣不平恒逃於詞曲而顧璘序則稱其內境春融神遊太古無芥蒂於得失今觀其集

中如擬宮詞五十首古別離宿楚相祠等作尙可謂怨而不怒者特其摹仿太多不能卓然自成一家耳

所著本有蟲吟草閒集刺壽臺遊蜀臺田閒集諸目其孫亮采彙而刻之共爲此集云

【嵩渚集一百卷】浙江汪汝璫家藏本 明李濂撰濂有祥符先賢傳已著錄明史文苑傳載濂少年嘗

作理情賦其友左國璣持以示李夢陽夢陽大嗟賞訪之吹臺濂自此聲馳河洛閒旣罷歸益肆力於學

遂以古文名於時。又稱濂初受知夢陽。後不屑附和。此集詩三十八卷。文六十二卷。乃濂所自訂。皆於七子之外。挺然自爲一格。大抵筆鋒踔厲。泉湧鸞馳。而裁翦尙疎。不免才多之患。濂跋石瑤熊峯集。謂詩文傳世。豈貴於多。其說良是。而自定己作。乃不能盡翦榛楛。信乎割愛之難也。

【觀政集一卷】浙江范懋柱家天一閣藏本。明李濂撰。濂是集。乃其正德乙亥在京觀政時所作。故以

爲名。凡賦二篇。各體詩二百五十四首。雜著八篇。考濂爲正德甲戌進士。乙亥爲登第之次年。猶少作也。

【洞陽詩集二十卷】浙江汪汝璫家藏本。明顧可久撰。可久字與新。無錫人。正德甲戌進士。官至廣東

按察司副使。是編標曰洞陽詩集。而子目俱題曰在澗集。考千頃堂書目。可久有在署草八卷。在疚草二

卷。溫陵集六卷。虔州草一卷。珠崖草一卷。在澗集十九卷。無洞陽集之名。蓋總彙諸集。名曰洞陽。而仍各

自爲書也。此集凡二十卷。首尾完具。而黃虞稷作十九卷。豈所見之本。偶未全歟。其詩古體頗散漫。律體

多乏。堅老七言絕句。尤學質樸而不成。

【人瑞翁集一卷】浙江巡撫探進本。明林春澤撰。春澤字德敷。侯官人。正德甲戌進士。官至平番府知

府。年百有四歲。有司爲建人瑞坊。故以人瑞翁名其集。原本十二卷。今未見傳本。此本其曾孫慎所重編

也。春澤少與鄭善夫游。互相切磋。故其詩頗有體裁。但乏深思厚力耳。

【谷平文集五卷】江西巡撫探進本。明李中撰。中字子庸。吉水人。正德甲戌進士。官至總督南京糧儲

都察院副都御史。諡莊介。事蹟具明史本傳。是集爲其門人羅洪先所編。其曰谷平者。以其所居之里名

之也。凡疏二十有八。日錄三百九十六。書問三十有三。詩文一百六十有五。大抵講學者爲多。

【石居漫興臺二卷】浙江汪汝璉家藏本。明陳器撰。器字德器。臨海人。正德甲戌進士。官至刑部郎中。嘗得三奇石。置之別業。晨夕臨玩。遂自號三石山人。而其孫承翁編次遺藁。亦遂名曰石居。詞多淺易。尙未成家。

【明水文集十四卷】兩江總督採進本。明陳九川撰。九川字惟濬。號竹亭。臨川人。正德甲戌進士。官太常寺博士。時以直諫。廷杖。嘉靖初爲禮部主客司郎中。復以事謫戍放還。居明水山。遂易號明水。初九川釋褐時。告歸謁王守仁。講無善無惡之旨。遂稱弟子。撫州爲姚江之學者。自九川始。是集乃其門人董君和所編。凡文八卷。大抵皆講學之語。詩六卷。小有韻致。而不免薄弱。

【鹿原存藁九卷】浙江汪汝璉家藏本。明戴欽撰。欽字時亮。馬平人。正德甲戌進士。官至刑部郎中。以諫大禮。廷杖創重而卒。其集刻於閩者八卷。曰玉溪存藁。刻於滇者二卷。曰戴秋官集。此則其姪希顥所合輯。凡文二卷。詩七卷。欽與何景明、李濂、薛蕙等同時友善。所作頗刻意摹古。然不越北地之餘派。

【黃洛邨集二卷】兩江總督採進本。明黃宏綱撰。宏綱字正之。鄂都人。正德丙子舉人。官至刑部主事。是集乃其孫宜璞所刻。上卷書翰。多與鄒守益、羅洪先、聶豹輩講學之語。蓋宏綱師事王守仁。傳良知之說也。下卷雜著及詩數十首。則率皆應俗之作。

【雙江文集十四卷】江西巡撫採進本。明聶豹撰。豹有困辨錄。已著錄。是集乃其姪禮部郎中靜所編。第一卷至第十一卷皆文。第十二卷爲詩。第十三卷又爲壽文雜著。而註曰。即困辨錄。疑靜所編。本十二卷。其後人又摭壽文及困辨錄。附見其後也。

【東洲集二十卷續集十卷】江蘇巡撫採進本 明崔桐撰。桐字來鳳。海門人。正德丁丑進士。官至禮部

右侍郎。事蹟附見明史。舒芬傳。以與芬俱以疏諫南巡。廷杖故也。是集凡詩九卷。詞一卷。文十卷。續集詩

六卷。文四卷。江南通志所載卷帙。與此相同。千頃堂書目作東洲集三十卷。續集十卷。明史藝文志作東

洲集四十卷。疑黃虞稷誤。二十爲三十。明志據虞稷之目合而計之。共爲四十卷也。

【東麓臺十卷】兩淮鹽政採進本 明汪佃撰。佃字友之。弋陽人。正德丁丑進士。官至翰林院編修。後出

爲建寧府通判。其集無大疵累。亦無所見長。

【青湖文集十四卷】浙江巡撫採進本 明汪應軫撰。應軫字子宿。浙江山陰人。正德丁丑進士。官至江

西提學僉事。事蹟具明史本傳。是集爲其子延良所編。前七卷爲文。後七卷爲詩。應軫有吏才。兼以氣節

著。史稱其在戶科歲餘。所上凡三十餘疏。皆切時弊。今觀集中諸奏牘。多侃直之言。頗見風采。詩文則率

皆樸實。猶守成宏之舊格。

【紫峯集十三卷】福建巡撫採進本 明陳琛撰。琛有易經淺說。已著錄。是集詩五卷。文七卷。正學編一

卷。末以年譜附焉。初刻於嘉靖中。此其裔孫所重刻也。明史儒林傳附見蔡清傳末。稱琛杜門獨學。清見

其文異之。曰。吾得友此人足矣。琛因介友人以見清。云云。今觀其詩。皆濂洛風雅一派。其文亦類語錄講

義。蓋其淵源如是云。

【青羅文集二十卷】兩江總督採進本 明王漸逵撰。漸逵字用儀。號青羅子。番禺人。正德丁丑進士。官

刑部主事。家居十餘年。以薦起官。言事不報。復乞歸。是集文八卷。首載陳愚見以裨聖化。乞創立以存根

本兩疏。即其復起時所上詩。分北遊、大隱、羅浮、靈洲、中洞、樾森、雙魚、深明、洛澄、越山、白雲、羅山十二稟。爲一卷。其鐵橋一絕。朱彝尊詩話謂其追蹤唐許碁園。苑花前之作。然沙中金屑。正復不能多觀也。

【西元集八卷】浙江汪汝璫家藏本。明馬汝驥撰。汝驥字仲房。綏德人。正德丁丑進士。改庶吉士。以諫

南巡廷杖。出爲澤州知州。世宗立。召還。授編修。官至禮部右侍郎。謚文簡。事蹟附見明史。舒芬傳。是集古體二卷。今體六卷。蔣一葵云。仲房詩有沈理而無元趣。黃青甫謂其詩整鍊似法顏謝。隊仗森然。求之聲律。未造其深。亦不失爲高流。蓋汝驥刻意鎔鍊。務求典實。其長短皆在於是也。

【戴中丞遺集八卷】兩江總督探進本。明戴賢撰。賢字時重。或作時量。字之譌也。號東石。鄞縣人。正德

丁丑進士。官至四川巡撫。是集千頃堂書目。作東石遺稟。凡詩四卷。雜文五卷。其子士充所編。張時徹序。謂其負恢廓之才。不屑屑爭雄鉛槧。或有句請。輒伸紙濡毫應之。故集中諸作。多傷率易。獨鄞水利三敘及海防策。以情形目擊。言之較爲確鑿云。

【筆峯存稟五卷】福建巡撫探進本。明王鳳靈撰。鳳靈字應時。莆田人。筆峯其自號也。正德丁丑進士。

官至廣西布政司參政。鳳靈官刑曹時。曾疏論宦官張銳都督錢安大辟之不當贖。及給事中陳洸顯罪之無可曲宥。其言甚直。朝議莫能奪。守淮時救災疏六十上。卒以好激論天下事。見忌罷歸。死於倭難。生平所著有淮陽急稟及漫稟、彙稟、淨稟各二十卷。旋皆散佚。茲集乃其孫介所蒐輯。至崇禎時版漣。玄孫夢陽又重刊之。凡文四卷。賦詩一卷。

【桂洲集十八卷】江西巡撫探進本。明夏言撰。言有南宮奏稟已著錄。此集凡賦詩詞八卷。文十卷。首

有年譜。言未相時以詞曲擅名。然集內詞亦未甚工。詩文宏整而平易。猶明中葉之舊格。

【朱福州集六卷】浙江汪汝璩家藏本。明朱豹撰。豹字子文。上海人。正德丁丑進士。官至福州府知府。

是集爲其子察卿及其友馮遷所編。凡詩三卷。奏疏三卷。詩學中唐。以流麗清切爲主。

【過庭私錄七卷外集一卷】江西巡撫採進本。明吳鼎撰。鼎字維新。號泉亭。又自號支離子。錢塘人。正

德丁丑進士。官至廣西布政司參議。是集其仲子遵晦所錄。故以過庭爲名。皆散體之文。未附賦騷古詩。數首。外集則皆詩也。文有整飭平雅者。亦有微近俗調者。金石文字。頗失剪裁。有韻之文。則更遜矣。

【半洲彙四卷】浙江孫仰曾家藏本。明張經撰。卷首題曰蔡經。蓋其未復姓時所刊也。經字廷彝。侯官

人。正德丁丑進士。累官南京兵部尙書。總督軍務。改左都御史。爲嚴嵩構陷。坐以失律棄市。後追諡襄愍。

事蹟具明史本傳。是集第一卷爲北寓彙。乃經官御史時所著。次爲南行彙。爲嘉興府知府時所著。次爲

西征彙。爲大理寺卿奉命安輯關西時所著。次爲東巡彙。巡撫山東時所著。詩多五七言近體。頗摹唐調。

蓋正當太倉歷下初變風氣之時也。

【鄭思齋文集一卷】浙江范懋柱家天一閣藏本。明鄭洛書撰。洛書字啓範。思齋其號也。莆田人。正德

丁丑進士。官至監察御史。提督南直隸學政。事蹟附見明史解一貫傳。是集前後無序跋。不知誰所編次。

亦無目錄。僅序九篇。記三篇。賦二篇。寥寥不成卷帙。又皆應酬之作。殆非完本。

【林次崖集十八卷】福建巡撫採進本。明林希元撰。希元有易經存疑。已著錄。是集爲其子有梧所編。

凡奏疏四卷。書二卷。揭帖附焉。序三卷。記碑共一卷。論說議共一卷。雜著一卷。誌表一卷。傳行狀一卷。祭

文哀詞二卷。詩二卷。詞附焉。希元之學宗其鄉人蔡清。故於明代諸儒。惟推薛瑄。胡居仁。與王守仁同時。而排其傳習錄最力。雖與守仁門人季本同年相善。而與本之書亦不少假借其師。其祭守仁文。但推其功業而已。無一字及其學問也。至其氣質剛急。銳於用世。則類其鄉人陳真晟。故其爲南京大理寺評事。則忤江彬。忤御史譚會。忤大理寺卿陳琳。坐謫泗州州判。及爲大理寺丞。又請勦遼東叛兵。坐謫欽州知州。官廣東時。值安南莫登庸篡國。力請討之。疏凡六上。竟坐是中計典歸。歸後又以爭郡邑利病。幾中危法。其負氣喜任事。蓋可想見。其由泗州再入大理也。蓋方獻夫霍韜薦之。故與二人頗相契。集中與周石厓書。亦自稱氣味與兀厓相似。又自稱大禮安南之議。所見與兀厓同。兀厓者韜別號也。然在泗州時。張璁桂萼欲援之同議大禮。終謝不行。則諸人固不足爲希元累矣。集中有與汪可亭書曰。今海內推大家者二人。曰李崆峒。何大復。二子雕詞鑄意。刮陳去新。力挽頹風。以還之古。似爲一時文人也。然考其所得。典謨已乎盤詰已乎。余皆未能知也。云云。則非惟學問關姚江。即文章亦關北地信陽。故其詩文皆惟意所如。務盡所欲言乃止。往往俚語與雅詞相參。儷句與散體閒用。蓋其素志原不欲以是見長云。

【玩鹿亭彙八卷附錄一卷】浙江巡撫採進本

明萬表撰。表有海寇議。已著錄。萬氏世以勳績顯。表獨

才兼文武。每與唐順之等講學。禦倭亦有功績。號爲儒將。然其詩文氣格稍弱。故終不能與一時文士角。逐詞壇。是集凡詩二卷。文六卷。末附錄贈答詩啓。及行狀墓誌。乃其子達甫所編。其孫邦孚所刻。達甫有皆非集。邦孚有一枝軒彙。皆能傳其家學云。

【少石集十三卷】兩淮馬裕家藏本

明陸欽撰。欽有山東通志。已著錄。是集詩五卷。文七卷。雜著一卷。

前有張時徹序稱其華不近浮質不近俚而惜其志之未艾蓋具體而未成家者故序有微詞云

【少華集四卷】浙江孫仰曾家藏本 明詹泮撰泮字少華玉山人正德辛巳進士官至禮科給事中乞

養歸泮嘗從章懋游以講學自任其詩文亦別爲一格是集乃其子長至長生所編雜文詩詞共三卷外錄一卷則皆他人之贈言也

【介塘文略一卷】浙江范懋柱家天一閣藏本 明王相撰相號介塘鄞縣人正德辛巳進士官翰林院

編修嘉靖初以爭大禮廷杖卒事蹟附見明史王思傳是冊僅雜文十八篇且多酬贈之作所著歲月皆在嘉靖二三年蓋叢殘鈔本非其遺集文格頗傷於雕琢亦七子流派也

【棟峯遺藁二卷】浙江孫仰曾家藏本 明曾梧撰梧字子易江西廣昌人正德辛巳進士官至常州府

知府是集凡文一卷詩一卷文冠以應詔疏反復申明合祀天地之說蓋是事古今聚訟儒者各尊其所聞不足異也初燬於嘉靖中後燬於火天啓辛酉其曾孫邦泰又重刻焉

【龍湖文集十五卷】浙江巡撫探進本 明張治撰治字文邦茶陵人正德辛巳進士官至文淵閣大學

士諡文隱改諡文毅萬歷初復改諡文肅是集凡文十卷詩五卷乃豐城雷禮與治壻彭宣所編刊版久漫漶雍正丙午宣之從曾孫思眷得舊刻校正屬其子維新重刊於浙江治明史無傳獻徵錄稱其臨事

不阿以是失世宗旨及其卒也命與中諡隆慶改元始更諡焉然觀何喬遠所撰小傳不能舉其相業集中奏疏於時事亦罕指陳喬遠所稱爲輔臣時默默不自得冀乘閒爭諫殆亦曲解之詞歟歸有光薛應

旂皆治所取士當時以識鑒稱而詩文則未能自爲一家朱彝尊靜志居詩話嘗摘其夜過洞庭詩云曉

發吳閶門。夕渡廣陵。日暮江帆遲。洞庭三百里。微風澹無波。明月照天水。隱隱見君山。鐘聲翠微裏。以吳地而混於楚。且云文肅家茶陵。與洞庭湖密邇。豈得以君山屬吳耶。今觀集中是詩。曉發吳閶門。作武昌門。夕渡廣陵。作黃陵。洞庭三百里。作八百里。則固未嘗涉於吳地。豈彝尊所見之本。乃思眷序所謂翻本雜淆。或思眷重校。因彝尊是語而改之歟。

【張水南集十一卷】江蘇巡撫探進本 明張袞撰。袞字補之。江陰人。正德辛巳進士。歷官至南京光祿

寺卿。是集凡詩二卷。文九卷。袞在諫垣。頗多建白。嘉靖中。倭擾東南。袞家居在危城中。馳書政府。條上禦倭五事。蓋亦留心於經世者。詞章則又當別論焉。

【張文忠集十九卷】浙江巡撫探進本 明張孚敬撰。孚敬有論對錄。已著錄。是集凡奏疏八卷。詩彙四卷。續彙一卷。文彙六卷。孚敬以議禮得君。故其著述。強半皆考禮之詞。不惟議興獻王禮。而且議郊祀禮。議孔廟禮。不惟撰明倫大典。而且撰禮記章句。自謂有明一主持禮教之人。其閒所論。未必百無一當。然穿鑿附會。以遷就時局者。比比然也。

【宏藝錄三十一卷】江蘇巡撫探進本 明邵經邦撰。經邦字仲德。仁和人。正德辛巳進士。官至刑部員外郎。以論劾張孚敬。下獄謫戍。事蹟具明史本傳。經邦以講學自任。嘗探古今論學語。發明其旨。爲宏道錄。又刪掇諸史爲宏簡錄。所著詩文。則別爲此錄。經邦自作誌銘。所云三宏集成。譬開聾鳴者是也。考其自作小傳。稱權稅荊州。時哀所著爲宏藝錄。故卷首自序。題嘉靖四年乙酉。而集中所載。併及於暮年絕筆。則又後人續編。非其手定之本矣。經邦上武宗疏。及中興保治日食建言諸疏。皆慷慨激烈。足以見其

志節。其他詩文。則類皆抒寫胸臆。不屑屑以研鍊爲工。卷首藝苑元機七十三條。專明作詩之法。以嚴羽詩有別才。非關學之說爲不然。且謂清廟緝熙。莫非至理所寓。未可不謂之詩人。惟狃於習俗。謂與經生不同。故往往黏皮帶骨。觀其持論。其宗旨槩可知也。

【羣玉樓集八卷】山西巡撫採進本。明李默撰。默有建陽人物傳。已著錄。是集凡文五卷。詩三卷。乃其

子太學生培所編。康太和序。稱其鎔意鑄詞。不涉蹊徑。然少傷於樸直。原集刊於萬歷元年。此本爲其裔孫重刊。默爲趙文華借策題。謗訕構陷下獄以死。有孝廉江宗者力爭之。故卷末以江舉人上侍郎趙文華書附焉。其事蓋史所未及也。

【柘山藁一卷】浙江巡撫採進本。明田頊撰。頊字太素。龍溪人。正德辛巳進士。官至貴州提學副使。是集前半卷爲雜文。後半卷爲詩。大抵皆應酬之作。文格頗淺弱。惟詩頗爽朗。蓋沿前七子之流波。有意規撫唐人。而模擬未免有迹也。

【甓餘集十二卷】江蘇巡撫採進本。明朱紉撰。紉有茂邊紀事。已著錄。是集九卷以前。皆其在官時章疏公移。十卷曰海道紀言。其巡撫閩浙時所著詩文。十一卷即茂邊紀事。其整飭威茂兵備時所著平寇始末。并詩數十首。末卷曰永感錄。則其先人行述誌銘。及諸人贈言也。

【李徵伯存藁十三卷】兩淮鹽政採進本。明李兆先撰。兆先字徵伯。茶陵人。大學士東陽之子。以廕爲國子生。年二十七而卒。懷麓堂詩話載兆先論詩之語。可云夙慧。東陽所作兆先誌文。亦悼惜特甚。而沈周客座新聞。乃載其父子相謔一事。則狂縱無復人理。雖晉人放達。不至於斯。平心而論。殆才雋而不修。

行檢譽之者有所粉飾。毀之者亦有所附會耳。是集凡詩賦雜文十一卷。又東行稟一卷。乃其自京師赴山東之作。附錄一卷。則東陽所爲兆先誌。及同時諸人慰問詩具在焉。

【董從吾稟一卷】浙江汪啓淑家藏本

明董灃撰。灃字復宗。一字子壽。號羅石。海鹽人。明史儒林傳。附

載錢德洪傳末。嘉靖甲申。灃年六十八。始遊會稽。從王守仁講學。或沮之。灃曰。吾從吾所好耳。遂又自號從吾。其集以詩與語錄雜文共爲一編。而附守仁和贈諸作。大抵皆暮年談理之詞也。卷末有其子穀跋。稱尙有詩文若干卷未刻。蓋講學以後。轉以早年之作爲不足存云。

【嗜泉詩存二卷附錄一卷】浙江巡撫探進本

明李璋撰。璋字政虹。海鹽人。是集前有正德四年璋自

序。稱取舊刻痛加刊削。存十之一。竝及近作爲二卷。雜著詩餘爲一卷。易其名曰詩存。此本爲其十世孫鳳藻所刊。上卷爲古體。下卷爲近體。附錄詩說五則。而獨無詩餘雜著。據其九世族孫續祖後序。蓋舊刊已佚。此重刻者殘本耳。卷末摘句三十四聯。同時諸人和章。及小傳墓誌銘。皆鳳藻所續也。續祖跋。又稱尙有重刊殘本詩鈔第八第九兩卷。今未見傳本。其存佚不可知矣。

【譚樵海集六卷附幽谷集一卷霜巖集一卷】江西巡撫探進本

明譚寶煥撰。寶煥江西樂安人。樵海

其號也。集凡文三卷。詩三卷。寶煥少好講學。爲文多涉理趣。詩尤沿擊壤集流派。如自示云。從今脊骨剛如鐵。一擔綱常勿放肩。寄鄧九邱云。還與先生磨太極。乾坤寫負苦心人。較定山集。抑又甚矣。末附幽谷集一卷。其孫欽瑗作霜巖集一卷。其曾孫清嚴作也。

【性理吟二卷】江西巡撫探進本

明譚寶煥撰。是集成於正德壬申。前有自序。皆以四書及性理中字

句爲題。前列朱子之說。而以一詩括其意。前集一卷。爲七言絕句。後集一卷。爲七言律詩。其意不在於詩。亦遂難以詩論也。

【鴻泥堂小彙八卷續彙十卷】浙江孫仰曾家藏本 明薛章憲撰。章憲字堯卿。自號浮休居士。江陰人。

小彙刻於正德丁丑。其子布所編。續彙刻於嘉靖庚申。邑人沈翰卿所編。詩文皆乏神韻。蓋摹古而僅得其貌也。

【東原集七卷】兩江總督採進本 明杜瓊撰。瓊有紀善錄。已著錄。其詩以平正暢達爲宗。而傷於樸儻。

後有正德己卯俞弁跋。稱刻本體製未備。此集乃其鄉人僉都御史張企翽所輯補云。

【佘山人詩集四卷】浙江孫仰曾家藏本 明佘世亨撰。卷首題嶺南不著郡邑。廣東通志亦失載其姓名。

惟歐大任序稱其在正德嘉靖閒。好游名山。去家數載而歸。卜居粵秀山下。粵秀爲廣州山名。則當爲

廣州人矣。大任又稱山人有子嘉詔。旣成進士。試令合肥。手錄山人詩四卷。即縣齋刻之。案太學題名碑。

嘉靖乙丑科有三甲進士佘嘉詔。廣東順德縣人。蓋即世亨之子也。其詩近體居多。古體僅寥寥數篇耳。

【雅宜集十卷】兩淮馬裕家藏本 明王寵撰。寵字履吉。自號雅宜山人。長洲人。入舉不第。終於諸生。明

史文苑傳附見。文徵明傳中是集詩八卷。文二卷。詩分體編列。而各以正德嘉靖彙字繫標題之下。蓋

約略編年之意。以自記所造淺深。大抵才力富贍。而抑鬱之氣。激爲亢厲。亦往往失之過情。文則非所留

意。姑附存詩後云爾。

卷一百七十七

集部三十

別集類存目四

【少鶴詩集八卷】兩江總督探進本

明武岡王顯槐撰。顯槐楚端王榮滅第三子。愍王顯榕之弟。嘉靖

十七年封榮滅嘗自稱黃鶴道人。故顯槐自號曰少鶴。嘉靖乙巳。顯榕爲其世子英耀所弑。世宗命顯槐攝國事。事蹟附見明史。楚王植傳此集乃其解政後所自編也。千頃堂書目載顯槐尙有文集及續集八卷。今未之見。惟此集存。

【雁湖釣叟自在吟九卷附錄一卷】浙江孫仰曾家藏本

明王周撰。周字質齋。嘉興人。屢試不售。自號

雁湖釣叟。是集以年月先後編次。其詩皆率意直書。不拘格律。故名曰自在吟。末附錄同時題贈一卷。并前序後跋。皆稱其子爲觀察。而不著其名。據王錫命張大忠等題詞。咸自稱年姪。證以太學題名碑所載。知其子乃嘉靖乙未進士王倅。後官至都御史。是編前四卷所稱北上寓京諸詩。即倅官京師迎養時作也。

【十岳山人詩集四卷】浙江孫仰曾家藏本

明王寅撰。寅字仲房。一字亮卿。歙縣人。嘗北走大梁。問詩

於李夢陽。中年習禪事。古峯和尚。古峯曰。吾徧遊海內五岳。今將徧歷海外五岳。而後出世。寅聞其語而悅之。因自號十岳山人。是集寅所自編。其詩音節宏亮。皆步趨北地之派。而鑄語未堅。時多累句。

【邊仲子詩一卷】山東巡撫探進本

明邊習撰。習字仲學。濟南人。戶部尙書貢之次子。王士禎論詩絕

句。所謂不及尙書有邊習。猶傳林雨忽霑衣者是也。賁雖仕宦通顯。而圖籍以外無餘資。習竟貧困以沒。僅存其七十歲客孫氏時詩一卷。本名睡足軒集。士禎與徐夜共選定之。附刻其父詩集後。改題今名。習詩遠不及其父。尤多應俗之作。其輓李東陽二詩。論雖公而評太訐。亦乖詩品。夜等特以名父之子重之耳。

【世經堂集二十六卷】安徽巡撫探進本 明徐階撰。階所編武穆集已著錄。是集文二十四卷。賦頌詩

詞二卷。其中敷陳治體之文。皆能不詭於正。餘則未見所長。

【少湖文集七卷】兩江總督探進本 明徐階撰。是集乃階外謫延平府推官時。三年秩滿北上。延平士

人哀其前後諸作爲之付梓。凡文五卷。語錄一卷。詩一卷。大都應酬之文。十居六七。皆不足以傳。持用誌

遺愛云爾。

【歐陽南野集三十卷】江蘇巡撫探進本 明歐陽德撰。德字崇一。泰和人。嘉靖癸未進士。官至禮部尙

書。卒諡文莊。事蹟具明史儒林傳。是集爲其門人王宗沐所編。凡內集十卷。皆講學之文。外集六卷。皆應

制及章奏案牘之文。別集十四卷。則應俗之詩文也。德之學宗法姚江。故惟以提唱良知者爲內。而餘則

外之別之云。

【南野文選四卷】江西巡撫探進本 明歐陽德撰。此本爲隆慶中其門人馮惟訥等所編。於全集僅十

分取一。然德在朝著。述如建儲災異諸疏。皆能言人所不能言。而是編不載。則惟訥等所錄。皆講學之文

故也。是可以觀明儒之所尙矣。

【笠江集十二卷】浙江孫仰曾家藏本。明潘恩撰。恩字子仁，上海人。嘉靖癸未進士，官至左都御史。諡恭定。事蹟附見明史周延傳。是集爲諸生聶叔頤所編。凡賦詩五卷，策表箋序碑記四卷，說對贊誌銘祭文及雜述三卷。前有陸樹聲序，稱恩所著有笠江集、笠江近藁，皆已梓行。旣沒而其子允哲允端合前後刻彙爲恭定全集。今此本仍題笠江集。始當時編集未成，故以新序冠於舊本歟。

【章介菴集十一卷】江西巡撫採進本。明章袞撰。袞字汝明，臨川人。嘉靖癸未進士，官至陝西按察司副使。是集首載大學口義、中庸口義，各一卷，皆訓釋章句之語。三卷以下皆雜文，十卷爲各體詩，而以隨筆瑣言終焉。瑣言者，袞所作語錄也。其文疎爽而頗乏體要。序王臨川集幾萬言，極論新法之善，謂元祐若能守而不變，孰非繼述之善。又論公以瞑眩之藥攻治之於先，司馬公又以瞑眩之藥潰亂之於後，遂使國論屢搖，民心再擾。云云。毅然翻久定之案，可謂桑梓情深矣。

【芝園定集五十一卷別集十一卷】浙江汪汝璫家藏本。明張時徹撰。時徹有善行錄，已著錄。是集凡分二編。一曰定集，爲賦詩二十卷，雜文二十七卷，史論四卷。一曰別集，爲奏議五卷，公移六卷，詩文皆分體。而律詩中又分兩京藩臬歸田三藁。明史藝文志載芝園全集八十五卷，考浙江通志，時徹尙有芝園外集，史蓋合而總計之。然浙江通志載芝園定集五十六卷，別集十一卷，外集二十四卷，與此卷數亦不合。或定集當爲五十一卷，別集當爲十一卷，外集當爲二十四卷，共八十六卷。史誤八十六爲八十五，通志誤五十一爲五十六歟。其詩文不出常格，樂府喜用古題，而所擬諸篇皆舍其本詞，而擬其增減入樂之詞，未免逐影而失形。史論尤多偏駁。

【疣贅錄九卷續錄二卷】江蘇巡撫探進本

明顧夢圭撰。夢圭字武祥，號雍里，崑山人。嘉靖癸未進士。

官至江西右布政使。此集爲夢圭所自編，同里歸有光序之。末載府志列傳，及有光所撰墓誌。則其五世孫登重刊時所附入也。首二卷爲就正編，乃其讀書節記之語。上卷論五經四書，下卷皆雜論，而說經講學者居多。大旨以心學爲宗。闡王守仁之餘緒。考有光序中稱夢圭暇日以所爲文名之曰疣贅錄。則疣贅但其文集之名，不應冠於此書。蘇州府志載其有北海齊梁武平還山諸藁，集中亦不標此名。意者四藁乃其詩集，與就正編皆別行。登重刊時始合爲一編，而仍襲其文集之名歟。文凡五卷。詩凡四卷。續錄則文一卷，有奇，而詩附焉。詩文皆平正通達，直抒胸臆，無鉤章棘句之習。惟詩有捶字未堅者，蓋當有明中葉風氣初更，學問移於姚江，而文章未移於北地，猶沿長沙舊格者也。

【北泉集】無卷數

副都御史黃登賢家藏本

明藍田撰。田字玉甫，號北泉，即墨人。嘉靖癸未進士，官

至河南道監察御史。事蹟附見明史。葉應驄傳當張璁等希旨議大禮，田反覆抗論，凡七上章，受廷杖幾殆。復糾劾陳洸不法事，直聲動一時。今集中惟錄劾禮部尙書席書一疏，不知何故。其他古近體詩及書記雜文，亦未分卷。考千頃堂書目：田有侍御集十卷，又東歸倡和一卷。則此本已非完書。且田生平可傳者在諸諫草。今章疏闕佚，則此本非菁華所在矣。

【石比部集八卷】江蘇周厚壇家藏本

明石英中撰。英中字子珍，上海人。嘉靖癸未進士，官刑部主事。

是集凡詩三卷，文四卷。英在西曹，以受誣被囚，其七宣紀夢，及古樂府等篇，皆獄中所作，頗磊落有氣，嘗自評其文如赤手捕龍蛇，蓋才情俊逸，而未能斂才就法者也。

【飛鴻亭集二十卷】兩淮鹽政探進本 明吳鵬撰。鵬字萬里，秀水人。嘉靖癸未進士，官至吏部尚書。飛鴻亭者，鵬謝事娛老之所，因以名集。千頃堂書目作十二卷，此本實二十卷。蓋黃虞稷誤倒其文也。鵬常使安南，故集中有征南行諸篇。其詩文多應酬之作，未能精汰。後有其孫維貞跋，稱於奏疏外檢得若干首，又云先有狀譜之作，今是集俱不載，豈尚有闕佚耶？

【葉海峯文一卷】浙江范懋柱家天一閣藏本 明葉良佩撰。良佩有周易義叢，已著錄。天台志稱良佩

所著有海峯堂前臺十八卷，此冊乃天一閣鈔本，所載皆雜文，僅四十二頁。蓋後人所摘錄，非其全集也。

【兩崖集八卷】湖北巡撫探進本 明朱廷立撰。廷立有鹽政志，已著錄。是集凡詩四卷，文四卷。其門人兵部尚書劉體乾撰墓誌，稱其學出於姚江，而擠之者復出自姚江之流。今其文集內推尊王守仁，甚至而詩集中東隣女西隣婦二首，詳其詞意，實有所託諷。意則指所謂擠之者歟。講學而至相傾軋，不知所講何學也。

【水西居士集八卷】山東巡撫探進本 明華鑰撰。鑰字德啓，號水西，無錫人。嘉靖癸未進士，官至兵部郎中。是集詩二卷，文六卷。其詩多慶賀贈答之什，流麗有餘，而深厚不足。其文亦尙未成就。

【春谿詩集四卷】浙江朱彝尊家曝書亭藏本 明狄冲撰。冲字仲虛，溧陽人。嘉靖癸未進士，官至南京工部郎中。是集分未達、筮仕、南行、移滇、居筠、近遊、金陵七彙。其擬李東陽樂府一百二首，自謂神似。然全襲原題，篇模句仿，實牀上牀屋下屋也。

【王鳳林文集四卷詩集二卷】浙江汪汝璥家藏本 明王從善撰。從善字承吉，號鳳林，襄陽人。嘉靖癸

未進士。官吏部考功司主事。是編乃其子之瑞所編。多牽率應酬之作。千頃堂書目不著錄。殆偶未見歟。
【中川遺藁三十三卷】浙江巡撫探進本。明王教撰。教字庸之。祥符人。嘉靖癸未進士。官至南京兵部右侍郎。是集乃其子在阡所編。凡賦二卷。古今體詩十三卷。樂章及詩餘一卷。雜文十九卷。前有李濂序。稱其學窺本原。志在康濟。居嘗語人曰。吾賦性蹇拙。詞翰誠非所長。是教平日本不以詩文自命。故所作卷帙雖富。大抵縱筆所之。不甚翦裁結構也。

【水洲文集四卷】兩江總督探進本。明魏良弼撰。良弼字師說。別號水洲。新建人。嘉靖癸未進士。官至禮科都給事中。以劾張璠爲所中。削籍歸。隆慶初。即家晉太常寺少卿。致仕。天啓初。追諡忠簡。事蹟具明史本傳。是集爲南昌劉曰寧所刪訂。豐城熊劍化爲刻於華亭。據其原目。凡奏議書簡語錄。撰述詩賦等五卷。附錄碑記行略一卷。此本佚其第三卷之語錄。與其第四卷之撰述。僅存四卷。非完帙矣。原序稱其學爲陽明高弟。建言受杖者三。今疏藁具載一二卷中。蓋亦剛直之士。詞章則非所長也。

【東遊集一卷】浙江汪啓淑家藏本。明黃金撰。金號莘溪。莆田人。嘉靖癸未進士。官山東新城縣知縣。是集即其赴新城時所作。自出京至濟南。凡所遊歷。俱紀以詩。率皆淺易。又閒以應酬雜著。若賀施少府。榮膺旌獎序之類。錯載於詩之前後。尤無體例。

【北海野人藁一卷】兩江總督探進本。明黃禎撰。禎字德兆。號北海野人。安邱人。嘉靖癸未進士。官至吏部文選司郎中。府志稱其免官歸。日事吟咏。爲文力追古作者。與李舜臣齊名。海內謂之李黃。然明代他書不甚著李黃之名。疑輿記夸飾之詞。未必確也。朱弼山左明詩鈔。謂禎有北上及戶部符臺諸集。是

編僅鈔存騷賦九首。五言古詩數十首。前後無序跋。蓋非全帙矣。

【漳棼文集八卷】兩江總督探進本

明李新芳撰。新芳字元德。別號漳棼。潞州人。嘉靖癸未進士。官至監察御史。是集爲其門人楊世卿所編。前六卷爲雜文。後二卷爲詩賦。以行狀墓誌附於後。其文講學之作。多至三卷。而他文宗旨。亦不離乎是。其詩亦濂洛風雅之派也。

【端簡文集十二卷】兩江總督探進本

明鄭曉撰。曉有禹貢圖說。已著錄。是編第一卷爲說經。第二卷爲詩。第三卷至八卷爲雜文。第九卷至十二卷爲奏疏。於奏疏中。又分三類。首淮揚。次兵部。次刑部。曉熟諳典故。通達國體。志在經世。於韻語頗不多作。其文亦直抒所見。不以詞藻求工。前有萬歷庚子彭夢祖序。稱曉著作甚富。沒後懼累畀火。存者未及什一。其孫敬仲始爲蒐集付梓云。

【婁子敬文集六卷】浙江巡撫探進本

明婁樞撰。樞字子敬。河內人。嘉靖乙酉舉人。官廣宗縣知縣。集中雜著頗留心經世之學。其論資治通鑑。專以首篇命晉大夫爲諸侯立論。雖亦有所見。而以此一條。遂欲盡通鑑之義。未免主持太過。至於韓延壽趙廣漢考。甘陳功罪考。唐棄維州考。則皆人人意中語耳。

【海樵先生集二十一卷】安徽巡撫探進本

明陳鶴撰。鶴字鳴野。山陰人。案浙江通志。鶴嘉靖乙酉舉人。年十七襲蔭。紹興衛百戶。非其志也。遂棄官稱山人。則亦孤僻之士矣。是編賦一卷。古體詩四卷。近體詩九卷。文七卷。隆慶丁卯。其子以世職莅兵粵東。屬南海盧夢陽。番禺黎民表。校正編次。明自中葉以後。山人墨客。多以詩遨遊公卿閒。然有才者。纖詭使氣者。粗疎體格。蕪雜率同一轍。朱彝尊詩話。稱鶴才鋒雖鈍。而鑄詞差醇。似比諸家稍勝。考盧夢陽序。稱其築室飛來山麓。閉戶伏枕。手不釋卷。足不下牀者七

年蓋卷軸較多。故與枵腹拈韻者異也。其絕句頗爲清雋。不止彞尊所摘律詩數聯。然趁筆而出。往往利鈍互陳。視孫一元太白山人集。尙未足旗鼓相當焉。

【長谷集十五卷】安徽巡撫探進本。明徐獻忠撰。獻忠有吳興掌故。已著錄。是集賦一卷。詩三卷。文十一卷。嘉靖甲子。松江府知府袁汝是。與其鄉士大夫。醵金刻之。編次者其門人董宜陽也。朱彞尊詩話。稱其詩沖澹無累句。所少者警拔。足爲定評。至其論松江加耗守備錢法。水利諸書。條析利弊。皆頗詳悉。在一鄉亦足資考核焉。

【胥臺集二十卷】浙江汪汝瑛家藏本。明袁袞撰。袞有世緯。已著錄。是編詩不失體格。而特乏堅蒼。文亦俊爽。而醞釀未免少薄。初爲其嗣子尊尼所刊。詩文各十卷。題曰袁永之集。此本爲萬歷甲申衡藩所重刊。改題曰胥臺集。實則一書。故千頃堂書目載袁永之集二十卷。註作胥臺集也。前有左長史鄭復亨序。言衡府司理張炳忠爲袞之甥。以是集贄於衡王。因爲開雕云。

【趙浚谷集十六卷】浙江汪汝瑛家藏本。明趙時春撰。時春有平涼府志。已著錄。時春素以將略自命。不屑屑以詩文名。然明史本傳稱其讀書善強記。文章豪肆。與唐順之。王慎中。齊名。今觀其詩文。多慷慨自喜。不可拘以格律。胡松序所謂秦人而爲秦聲。亦其風氣然也。然則史所謂文章豪肆者。長短俱在是矣。是集詩六卷。文十卷。皆編年而不分體。徐階序稱十六卷。與此集合。李開先序則謂詩六卷。文九卷。凡十五卷。續有作者。當續入之。蓋開先序在嘉靖乙丑。而階序在萬歷庚辰。時春沒後十五年。又有所續入也。

【別本浚谷集十七卷】安徽巡撫探進本 明趙時春撰此本凡詩二卷賦及雜文十五卷有其甥周鑒序明史藝文志載時春集作十七卷即據此本也

【雲崗選彙二十卷】浙江孫仰曾家藏本 明龔用卿撰用卿字鳴治懷安人嘉靖丙戌進士第一官至南京國子監祭酒是編首賦次詞次詩次雜文考古人以詞爲詩餘今編入詩前殊乖體例所作亦大抵館閣體也

【東匯詩集十卷】兩江總督探進本 明呂希周撰希周字師旦崇德人嘉靖丙戌進士官至通政使是集編於嘉靖甲寅其子端甫志云始自乙酉迄今甲寅共詩一千二百八十九首呈於太保東湖公欣然命付之梓東湖陸炳別號也爲希周門人朱彝尊詩話云東匯於詩亦沾沾自喜其集不甚傳由其子請論定於陸武惠也同里曹秋嶽侍郎集明三百年名公手蹟裝潢成冊名至七百家東匯雜詩在焉比集中所載者較勝今詳端甫志希周家居至甲寅尚無恙曹溶所集當是其甲寅以後詩歟

【陸賓齋集十卷外集二卷】禮部尙書曹秀先家藏本 明陸垹撰垹有賓齋雜著已著錄是集爲郁天民所編外集二卷則附錄誥敕誌狀及贈送誄奠之文與士民頌德之作也徐階誌其墓稱垹讀書恥爲章句嘗曰人心與事物不相離舍事物而徒求諸心者禪學也逐事物而不求諸心者俗學也故集中有傳習錄存疑不附和陸學又有詩傳存疑亦不盡墨守朱學持論可謂篤實詩文則多近質朴蓋非所留意云

【田叔禾集十二卷】浙江汪汝琛家藏本 明田汝成撰汝成有炎徼紀聞已著錄其全彙本名豫陽集

亦名楊園集。此集乃汝成晚年令其子藝蘅所編。凡詩文三百六十九首。五十以後所作均不在是焉。汝成歸田後盤桓湖山。搜剔名勝。殊以風流自賞。其詩律隊仗修整。頗自娟娟秀出。然使逢大敵。則未足相當。文體亦頗傷平易。

【玩芳堂摘藁四卷】兩江總督採進本

明王慎中撰。慎中有遵巖文集。已著錄。此本乃嘉靖中江陵曹

忭以御史巡按江西。取篋中所有慎中之文。校而刻之。僅一百首。故以摘藁爲名。

【江午坡集四卷】江西巡撫採進本

明江以達撰。以達字于順。號午坡。貴溪人。嘉靖丙戌進士。官至湖

南提學副使。案千頃堂書目作福建提學。誤。福建去湖廣頗遠。不至忤楚藩也。以忤楚藩繫獄。後放歸病

卒。明史文苑傳附見王慎中傳中。朱彝尊靜志居詩話曰。午坡以北地文出廬陵。詹山之上。又謂昌黎詩

不逮文。尙染習氣云云。今考其語。見集中所載張東沙集序。然其與霍渭崖論文書云。模形者神遺。斷句

者氣索。景會者意脫。蕊繁者芟衰。譬諸畫地爲餅。以餒則難。刻木爲人。束之衣冠。與之酬色笑。而施揖讓

則不可。其於正嘉之時。剽竊摹擬之病。又未嘗不知之。而趨向如是何耶。

【芻蕘錄二十卷】江蘇周厚培家藏本

明馮恩撰。恩字子仁。華亭人。嘉靖丙戌進士。官南京監察御史。

以疏論張瓏。汪鏐。方獻夫三人。下獄擬死。其子行可刺血書疏請代死。謫戍雷州。越六年赦歸。隆慶初進

大理寺丞。致仕。事蹟具明史本傳。是集凡文十五卷。詩五卷。恩爲行人時。嘗奉命勞兩廣總督王守仁。因

從王守仁講學。故其詩文得守仁餘緒爲多。其最得名者。在嘉靖壬辰彗星見。應詔陳言一疏。其被禍也。

蓋坐以上言大臣德政律。固非其罪。然恩爲御史。抨擊權姦。是其職也。至於所不抨擊者。置之不論可矣。

乃一一臚舉所長。類乎薦牘。是既欲有所退。又欲有所進。卿相之簡擢。臺諫操之矣。此亦憤激一決。不暇擇言。既乖政體。又授議者以閒也。且稱禮部尙書夏言多蓄之學。不羈之才。駕馭任之。庶幾救時宰相。禮部右侍郎顧鼎臣警悟疏通。不局偏長。器足任重。核以二人本傳。亦皆不確。蓋其忠鯁之氣。足貫金石。而立言則不必盡當。是固當分別觀之者耳。

【少泉集三十三卷】浙江孫仰曾家藏本。明王格撰。格字汝化。京山人。嘉靖丙戌進士。改庶吉士。出爲

分巡河北道按察司僉事。世宗南巡。坐行宮火杖黜。隆慶初授太僕寺少卿致仕。明史文苑傳附見。王廷陳傳末。千頃堂書目載格少泉集十卷。今考此本。凡詩選十卷。詩續選八卷。詩新選六卷。文選五卷。續文選四卷。共三十三卷。黃虞稷蓋僅得其詩選著錄也。朱彝尊靜志居詩話稱其信口矢筆。合作者寡。今考王世貞序云。公於意非不能深。不欲使其淫於詩之外。於象非不能極。不欲使其游於見之表。才不可盡。則引矩以囿之。亂不勝靡。則爲質以禦之。詳其語意。殆亦微詞也歟。

【穀原文草四卷】兩江總督採進本。明蘇祐撰。祐有道旃瑣語。已著錄。是編乃其文集也。原分四卷。每卷又自分上下。詞多駢麗。規仿文選。而真氣不足以充之。在七子派中。又爲旁支矣。

【穀原集十卷】山東巡撫採進本。明蘇祐撰。此編乃其詩集。大旨宗李攀龍之說。不肖作唐以後格。而亦不能變唐以前格。故音節琅琅。都無新意。

【岳雲石集五卷】直隸總督採進本。明岳倫撰。倫字雲石。懷安衛人。嘉靖丙戌進士。官至工部郎中。卒贈太常寺少卿。是集文三卷。詩二卷。附以其子魯訟冤疏案集中最著之文。莫若劾張璁桂萼疏。疏後附

世宗諭旨曰。張璉著回家省改。桂萼革去散官。以尙書致仕。然考璉萼本傳。璉之罷也。一由給事中陸粲。再由御史譚績端廷赦。唐愈賢三由魏良弼奏。釐萼之罷也。獨由給事中陸粲。不見有倫劾罷二人之事。與史傳絕不相符。疑以傳疑可矣。

【金陵覽勝詩一卷】浙江范懋柱家天一閣藏本。明章恩撰。恩字元之。山陰人。是集刻於嘉靖丙戌。皆五七言近體。多題咏名勝之作。其所列古蹟。如桃花小峴。及虎踞關。皆志乘所未載。然才力稍弱。尙未足以摹寫江山。

【別本羅念菴集十三卷】浙江汪汝璩家藏本。明羅洪先撰。洪先有冬遊記。已著錄。是編爲嘉靖癸亥。其同年滁陽胡松所刻。凡書二卷。雜著一卷。序記傳狀銘表各一卷。祭文及雜文二卷。古律詩二卷。蓋初刊之本。非其全帙也。

【松溪集十卷】兩淮鹽政採進本。明程文德撰。文德字舜敷。永康人。嘉靖己丑進士。官至吏部左侍郎。掌詹事府。調南京工部右侍郎。疏辭忤旨。除名歸。萬歷中。追贈禮部尙書。諡文恭。事蹟具明史。儒林傳。是集第一卷爲對策講章。二卷爲頌及古體詩。三卷爲今體詩。四卷爲奏疏表。五卷爲書。六卷爲序。七卷爲記跋。八卷爲祭文。九卷爲傳誌銘。十卷爲雜著。詩非所長。奏疏內如賑濟疏。所條陳便宜諸事。頗切明季時政之弊。又所奏郊壇事例。皆明史各志及明會典。王圻續通考所未載。考文德自述。謂私淑王子蓋。亦講良知之學者。如寄諸生書。稱今古聖賢之道。不違其心。復王畿書。謂全真返初。以求放心。跋陽明文錄。謂明德新民。無外無內之疑。於禪者。非是。皆不免於回護。至其論學云。學問之道。必先立志。志旣立。則行

有定適。格致誠正。戒懼慎獨。別其塗轍。學問思辨。自不容已。是尙知以躬行實踐爲歸。史稱文德初從章懋游。後乃從王守仁。故與王畿輩之涉於禪悅者。差少異耳。

【程文恭遺藁三十一卷】浙江巡撫採進本。明程文德撰。此集二十二卷以前皆文。二十一卷以後皆詩。較松溪集爲賅備。然體格則一也。

【周漢中集四卷】內府藏本。明周顯宗撰。顯宗字子考。濮州人。嘉靖己丑進士。官至漢中府知府。是集前三卷爲自適藁。皆所著詩詞雜文。後一卷爲感寓錄。則隨筆筭記也。詩不入格。感寓錄亦多雜禪語。以空悟爲宗。

【南北奉使集二卷】浙江汪啓淑家藏本。明唐順之撰。順之有廣右戰功錄。已著錄。是編一爲北奉使集。乃其以職方郎中出覈薊鎮兵籍時所作。一爲南奉使集。乃視師江浙所作。兩集俱載其籌邊勦寇之事。先敕諭。次題疏。次啓筭。次詩篇。前後皆無序跋。

【陳后岡詩集一卷文集一卷】浙江巡撫採進本。明陳東撰。東字約之。鄆縣人。嘉靖己丑進士。官至河南提學副使。事蹟具明史文苑傳。東與唐順之爲同年。共倡爲初唐六朝之作。以矯李何之習。而所學不逮順之。又自翰林改禮部主事。逮復官編修。旋即外調。恆忽忽不樂。年僅三十餘而卒。文章亦未成就。故順之終以古文鳴。而東無稱焉。詩集爲順之所編。皆嘉靖甲午乙未丁酉三年之作。其餘僅寥寥數首。文集爲張時徹所刊。分京楚閩洛四集。以居官之地名之。初刻於蜀中。又刻於吳郡。此本乃萬歷中。其同邑林可成所校刊也。

【燕詒錄十二卷】兩江總督採進本 明孫應奎撰。應奎字文卿，號蒙泉，餘姚人。嘉靖己丑進士，官至右副都御史，總理河道。後左遷山東布政使，明史附見。建陽孫應奎傳，而以餘姚孫應奎別之。蓋與胡松傳中附載績溪胡松均以同姓名合傳也。是集前三卷皆憶言其語錄也。次書二卷，文二卷，詩三卷。次河南存彙二卷，林居續彙一卷。則詩文雜編焉。應奎受業於王守仁，講良知之學。初官禮科給事中，疏劾汪鉉，頗有直聲。然其著作，則自成其爲講學家之詩文而已。

【胡莊肅集六卷】安徽巡撫採進本 明胡松撰。松有滁州志，已著錄。是集惟第二卷末附載詩賦，餘俱雜著。考明史本傳，松初以禮部郎任山西提學副使，上邊務十二事，帝嘉其忠懇，進左參政，巡撫江西。時會討廣東寇張璉，又援閩破倭，功績甚偉。然其經世之文，惟答翟中丞邊事書及厚著實塞防邊制蠻四篇，頗見謀略。餘皆不載集中。豈別有奏議集歟？其中格物解，謂心外無事，事外無心，蓋從事於姚江之學者。其功名亦略相彷彿焉。卷首有凌約東游彙序，鄔宗源趙大綱南浮彙序，徐獻忠西游集序，田汝成徐渭浙垣彙序，殆各集別有專本。此其彙而刻之者也。

【別本胡莊肅集八卷】山東巡撫採進本 明胡松撰。是集凡文六卷，詩二卷，與六卷之本稍有增刪，而大致相同。

【鶴田草堂集十卷】浙江巡撫採進本 明蔡雲程撰。雲程字亨之，臨海人。嘉靖己丑進士，官至刑部尙書。是集詩三卷，文七卷。雲程當王李盛行之時，獨無摹擬剽竊之習，可謂不轉移於風氣。然根柢頗薄，亦不能自樹一幟。

【熊南沙文集八卷】浙江汪汝璩家藏本。明熊過撰。過有周易象旨決錄。已著錄。是集乃隆慶戊辰。其門人嚴清所刻。前四卷爲疏序書記。後四卷爲題跋引傳碑銘祭文雜著。過留心經學。其文章亦列名八才子中。然集中諸作。大抵應酬之文也。

【環溪集六卷】兩江總督採進本。

明沈愷撰。愷有夜燈管測。已著錄。是集皆所著雜文。乃其門人任子龍所編。前有徐階序。題曰鳳峯雜集序。又有文徵明序。亦題曰鳳峯子詩藁序。疑今名爲後來所追改。而又佚其詩集歟。考千頃堂書目。別載環溪集二十六卷。則此非其全也。愷文章頗尙古雅。不冝作秦漢以下語。而模仿太甚。遂與北地同歸。

【閒居集十二卷】兩江總督採進本。

明李開先撰。開先有中麓畫品。已著錄。是集詩四卷。文八卷。皆歸田後所作。其自序謂年四十罷歸田里。旣無用世之心。又無名後之志。作不必工。信口直寫。名其集曰閒居。以別居官時苦心也。嘉靖初。開先與王慎中。唐順之。熊過。陳束。任瀚。趙時春。呂高。稱八才子。其時慎中順之。倡議盡洗李何剽擬之習。而開先與時春等。復羽翼之。然開先雅以功名自負。旣廢以後。猶作塞上曲一百首。以寓其志。又末卷有蘇息民困。或問及顏神事宜。濬渠私議。潔議諸篇。亦尙汲汲於經世。不甚爭文苑之名。故所作隨筆揮灑一篇。或至數千言。其詩亦往往疊韻至百首。其持論確於李何。而終不能奪李何之壇坫。蓋有由矣。

【蔡可泉集十五卷】浙江巡撫採進本。

明蔡克廉撰。克廉字道卿。晉江人。嘉靖己丑進士。官至戶部尙書。其文每篇皆係以時地。末綴以各體詩。及案牘之文。萬歷初。其子應龍應麟。錄而梓之。克廉少與鄉人

王慎中齊名。而其文乃遠不及慎中。蘇濬序稱克廉秉樞執鉞。時慎中已陞伏故園。日尋歐曾之緒。而克廉方銳意事功。論者謂慎中闕寂邱園。故文獨工。云云。是當時已有定評矣。

【端肅公集十卷】山東巡撫探進本。明葛守禮撰。守禮字與立德。平人。嘉靖己丑進士。官至左都御史。

諡端肅。是集凡文九卷。詩一卷。邢侗爲之序。

【知白堂藁十四卷】浙江孫仰曾家藏本。明翁溥撰。溥字德宏。諸暨人。嘉靖己丑進士。官至南京刑部

尚書。諡榮靖。是集乃其門人金元立。潘季馴所編。凡詩六卷。雜文八卷。其中奏疏十五篇。乃巡撫江西。及爲吏科時所上。皆無關大計。其餘亦大抵應酬之作。

【張靜思文集十卷附錄二卷】江蘇巡撫探進本。明張選撰。選字舜舉。無錫人。嘉靖己丑進士。授蕭山

知縣。擢戶科給事中。會太廟祫祭。世宗遣勳臣代行禮選。抗疏力諫。廷杖削籍。隆慶初。復原官。終於通政司參議。事蹟具明史本傳。是集乃其曾孫纘會所編。凡文九卷。詩一卷。其末二卷。則附錄居官政績及碑

銘小傳也。

【浚濱集十卷附錄二卷】直隸總督探進本。明蔡纘撰。纘有浚濱語錄。已著錄。是集爲其門人李登雲

等所編。凡文六卷。詩四卷。銘贊之類。附於詩末。附錄二卷。則其朋友贈答。與門人稱頌之作也。纘早師真定張璠。入仕後師朝邑韓邦奇。增城湛若水。平居務講學。立朝務氣節。文章蓋非所長云。

【崔筆山文集十卷】安徽巡撫探進本。明崔涯撰。涯號筆山。太平人。嘉靖己丑進士。官至監察御史。是

集自一卷至七卷。爲奏疏及雜著。八卷爲古今體詩。九卷爲虎異。十卷爲鵲異。兩卷之末。各附以頌德詩。

文涯在當時有伉直聲而文章非其所長詩尤不入格所謂虎異者涯巡視山西時有虎自入神廟爲人所殪鵠異者涯巡視福建時有葉氏爲奴所殺憑鵠以訴冤涯皆自紀其事而所屬縉紳各歌頌之因彙刊集後昔猛虎渡河劉寬以爲偶然而涯乃以恍惚之事引爲己功人之度量相去蓋不可道里計矣。

【環碧齋詩集三卷尺牘三卷】浙江孫仰曾家藏本 明祝世祿撰世祿有環碧齋小言已著錄西江志。

稱其工詩善草書談理獨抒心得今觀其詩格調頗伉爽而簡汰未嚴尺牘更開三袁一派矣所謂談理獨抒心得者殆即指小言已訂正於雜家類中茲不具論焉。

【司勳文集八卷】兩淮鹽政採進本 明羅虞臣撰虞臣字熙載廣東順德人嘉靖己丑進士官吏部稽

勳司主事事蹟附見明史劉世毅傳虞臣以初任刑部主事提牢時寬假張延齡爲大猾劉東山所託下獄拷掠斥爲民旣歸結廬山中讀書纂述年僅三十五而卒然其他著作不傳惟是集存其生平不屑爲詩賦故集中皆散體之文自六卷以下則採錄所作家乘以足之惟以中官傳六七篇參雜其間耳其文疎快有氣然皆率其才氣縱筆一往未能範以法度也洗桂奇序以司馬遷擬之談何容易乎

【五嶽山人集二十八卷】江蘇巡撫採進本 明黃省曾撰省曾有西洋朝貢典錄已著錄是集凡賦詩

十八卷雜文二十卷王世貞序稱其古今體詩皆出自六代三唐於他文亦推許甚至及其爲藝苑卮言則云勉之詩如假山雖爾華整大費人力朱彝尊靜志居詩話亦謂其詩品太庸沙礫盈前無金可採今觀其集兩家之說不虛矣中第二十卷爲客問四十章二十一卷二十二卷爲擬詩外傳二十三卷爲黃氏家語明人亦摘出別行其客問雜論物理多臆揣之說擬詩外傳未免優孟衣冠至家語剽立篇名儼

同孔氏抑又僭矣。

【蓉山集十六卷】江西巡撫探進本 明董燧撰。燧字兆時。蓉山其號也。臨川人。嘉靖辛卯舉人。官至南

京刑部郎中。燧少從王良弼豹講良知之學。是集自首卷至六卷。皆其問答會語。七卷至十卷。爲詩十一卷。至十六卷。爲雜文。

【孔文谷詩集十四卷】山西巡撫探進本 明孔天允撰。天允字汝錫。號文谷。又號管涔山人。汾州人。嘉靖壬辰進士。第二於故事。當授編修。以藩戚。外補陝西提學僉事。官至浙江布政司參政。朱彝尊靜志居詩話云。管涔山人。如新調鸚鵡。雖復多言。舌音終強。蓋深不取之。此集爲同安洪朝選所刻。內履霜集一卷。澤鳴藁一卷。漁嬉藁以編年爲次。自隆慶丁卯至萬歷戊寅十二年所作。分十二卷。校以浙江探進之本。佚闕尙多。非其完帙。考千頃堂書目。亦載天允詩集十四卷。則黃虞稷所見。即此本矣。

【孔文谷文集十六卷續集四卷詩集二十四卷】浙江巡撫探進本 明孔天允撰。此本較其家刻。多文集二十卷。而詩則惟有履霜集。漁嬉藁。闕澤鳴藁一卷。所作霞海篇。亦不在其中。相其詩集版式。蓋隨作隨刻。故傳本多少不定也。焦竑國史經籍志。載天允集僅三卷。是即多所續增之明驗矣。

【霞海篇一卷】浙江巡撫探進本 明孔天允撰。是編乃其督學浙江時。案臨台州所作。故以霞海爲名。凡詩三十四首。力摹三謝而未成。如望司成程公詩起句曰。瞻塗脰來旌。邂逅欣遽斯。以脰字爲引領而望之意。是不止札闕鴻休矣。

【祐山文集十卷詩集四卷】江蘇周厚堉家藏本 明馮汝弼撰。汝弼有祐山雜記。已著錄。其官工科給

事中時論劾汪鏐罪狀直聲震動一時其人足以不朽其詩文則以人見重非以詞章傳也

【粵臺稟二卷】兩江總督採進本 明謝少南撰少南字與槐上元人嘉靖壬辰進士官至河南布政司

參政是集乃其提學廣西時所作詩與文各一卷詩尚不失清拔文則未之逮也千頃堂書目別載少南河垣稟一卷謫臺稟一卷今未見傳本疑其佚矣

【序芳園稟二卷】浙江巡撫採進本 明趙伊撰伊字子衡平湖人嘉靖壬辰進士官至廣西按察司副

使是集爲其甥沈懋孝所選附以劉子伯批點其詩時有清脫之致而醞釀未深

【菲泉存稟八卷】浙江汪汝璫家藏本 明來汝賢撰汝賢字子禹蕭山人嘉靖壬辰進士官至禮部主

事是集凡詩二卷文六卷末附許應元所撰墓志及姜寶所撰誣枉記蓋汝賢由丹陽知縣行取入都後同僚譖其受金爲巡按御史所論劾故作此以辯之寶即汝賢之門人也千頃堂書目載此集作十六卷疑或有續集而佚之至云汝賢字汝禹則汝字傳寫誤耳

【洛原遺稟八卷】浙江汪汝璫家藏本 明白悅撰悅字貞夫武進人嘉靖壬辰進士官至江西按察司僉事悅爲尙書昂之孫家世鼎貴而獨刻意學詩句調華瞻神理頗清視當時襍積者差勝特格律未能變化往往雷同

【蔣道林文粹九卷】兩江總督採進本 明蔣信撰信有道林諸集已著錄是集爲其門人姚學閔所編其文不事華藻惟直抒胸臆期於明暢而止蓋信嘗從王守仁於龍場驛後又從湛若水遊所重惟在於講學耳

【巾石遺編一卷】江西巡撫探進本 明呂懷撰。懷有周易卦變圖傳。已著錄。據千頃堂書目。所著巾石類彙。本三十卷。是集不知何人所編。皆掇拾於殘賸之餘。寥寥數篇。不成卷帙。疑原本散佚。此或其子孫所錄存也。

【閔午塘詩集七卷】浙江巡撫探進本 明閔如霖撰。如霖字師望。號午塘。烏程人。嘉靖壬辰進士。官至南京禮部尚書。是集為其門人吏部侍郎姚宏謨所編。詩多應酬之作。雖清圓而乏骨力。古體尤不擅長。千頃堂書目載午塘集十六卷。殆尚有文集九卷。而佚之歟。

【冰玉堂綴逸彙一卷蘭舟漫彙一卷附二餘詞一卷】浙江孫仰曾家藏本 明陳如綸撰。如綸字德宣。號午江。太倉人。嘉靖壬辰進士。官至福建布政司參議。文集為其子謙亨等所編。初彙本十卷。以弗戒於火。彙盡亡。謙亨搜求殘賸。緝為二卷。故題曰綴逸。其詩別名蘭舟漫彙。為如綸所自編。乃嘉靖甲辰服闋補江西按察司僉事時途中所作。其詩餘別名二餘詞。亦如綸自編。二餘者。如綸別號也。

【包侍御集六卷】江蘇周厚培家藏本 明包節撰。節有陝西行都司志。已著錄。是編前二卷為臺中彙。官御史時作。後四卷為滄中彙。戍莊浪時作。二編皆兼載詩文。節嘗謂文苑英華集。可以續昭明文選。因輯苑詩類選三十卷。故所作纖麗為多。大抵皆取材於是也。

【承啟堂彙二十九卷】浙江巡撫探進本 明錢薇撰。薇字懋垣。海鹽人。嘉靖壬辰進士。官至禮科給事中。隆慶初。贈太常寺少卿。事蹟具明史本傳。是集乃其門人嚴從簡所編。凡詩七卷。文二十卷。附錄誌銘行狀墓表傳誄一卷。末一卷則其曾孫嘉徵二疏。并行狀誌銘也。嘉徵字孚千。天啓辛酉副榜貢生。官松

溪縣知縣嘗劾魏忠賢十大罪其疏爲世所傳云

【自知堂集二十四卷】浙江汪汝璫家藏本 明蔡汝楫撰汝楫有說經笥記已著錄是集詩七卷文十

七卷其門人朱炳如所編明史稱汝楫初喜文章從王慎中唐順之高叔嗣顧璘皇甫淳兄弟游中年復好講學與鄒守益羅洪先相善詩格遂漸頹唐頗有壽陵餘子失其故步之譏然汝楫才地本不足鴈行王唐諸人亦不盡係於講學之後荒廢吟咏也

【涇林集八卷】江蘇周厚培家藏本 明周復俊撰復俊有東吳名賢記已著錄是集一名六梅館集凡

詩三卷雜文五卷其詩皆有楊慎評語據其孫元暉跋蓋慎成雲南之時與復俊遇於仙村草堂劇談七晝夜因爲評定其詩一梓於蜀中再梓於玉田後編入全集評亦遂仍其舊云

【龍谿全集二十卷】兩江總督採進本 明王畿撰畿字汝中號龍谿山陰人嘉靖壬辰進士官至兵部

武選司郎中事蹟具明史儒林傳畿傳王守仁良知之學而漸失其本旨如謂虛寂微密是千聖相傳之祕從此悟入乃範圍三教之宗又謂佛氏所說本是吾儒大路是不止陽儒而陰釋矣故史稱其難以禪機亦不自諱史又載畿嘗言學當致知見性而已應事有小過不足累故在官不免干請以不謹斥蓋王學末流之恣肆實自畿始明史雖收入儒林傳而稱士之浮誕不逞者率自名龍谿弟子云云深著其弊蓋有由也是集爲其子應斌應吉所編凡語錄八卷書序雜著記說共九卷詩一卷祭文誌狀表傳二卷其門人蕭良幹刊之丁賓又爲重鐫而益以大象義述一卷傳誌祭文一卷

【龍溪語錄八卷】浙江巡撫採進本 明王畿撰是編雖名語錄實即畿之文集前有李贄序謂之龍溪

集鈔蓋又經贊所品定也。合是二人以成此書。則書可知矣。

【王侍御集七卷】浙江巡撫探進本

明王瑛撰。瑛字汝玉。無錫人。嘉靖壬辰進士。官至監察御史。是編

爲其子鴻臚寺主簿同穀所刊。蓋歐大任所選定。前二卷爲古體。後五卷爲近體。前有小傳。亦大任所作。末有崔銑兩巡紀行稟跋一篇。兩巡者一出理北直隸山東河南馬政。一巡按福建也。集中無此標目。蓋其詩已散入集中。銑跋無所附麗。故綴於後。鄭啟謨序。題曰石沙漫藁。亦與此本標題不同。則瑛世居石沙山。初以名集同穀改題今名也。

【少峯草堂詩集一卷】浙江巡撫探進本

明林應亮撰。應亮字熙載。侯官人。人瑞翁春澤子也。嘉靖壬

辰進士。官至戶部右侍郎總督倉場。是集千頃堂書目作二卷。此本僅一卷。其詩皆沿七子之派。

【寒邨集四卷】浙江汪啓淑家藏本

明蘇志臯撰。志臯字德明。別號寒村。固安人。嘉靖壬辰進士。官至

副都御史。此集凡詩二卷。雜文二卷。有汪來後序。稱其尙有巡撫奏議十八卷。譯語畫跋恒言各一卷。今竝不傳。

【東白草堂集四卷】兩江總督探進本

明顧存仁撰。存仁有太僕寺志。已著錄。是編詩分四集。每集一

卷。曰使蜀初編。存仁爲給事中時作。曰居庸內編。曰居庸外編。存仁編管保安時作。別編末

答羅太史韻十首。自記作於吳中。蓋當隆慶改元。存仁將起用時也。朱彝尊靜志居詩話。稱其建言受杖

起草時。鬼近榻前。詰且鴉鳴。戶上無所畏縮。其勁直如是。故其詩亦稱心而談。罕鍛鍊之功云。

【期齋集十四卷】江蘇巡撫探進本

明呂本撰。本字汝立。號南渠。又號期齋。餘姚人。初冒姓李。晚乃歸

宗嘉靖壬辰進士官至武英殿大學士諡文安本在位不久即遭憂以歸遂不復出家居數十年以亭館花竹之勝擅名一時是編詩四卷文十卷爲其子禮部主事元所編大抵應酬之作仍沿臺閣之體

【璞岡集二卷】浙江孫仰曾家藏本

明馬汝彰撰汝彰字存美璞岡其號也汲縣人嘉靖壬辰進士官至雲南右布政使是編乃汝彰所自編垂沒之時其友人陰秉陽欲刻之汝彰不可汝彰沒其嗣子繩祖與其婿阮承謙始刻之而秉陽爲之序其始末具載序中凡文一卷詩一卷詩餘一卷皆不擅長蓋其友其子其婿均不及汝彰之自知也

【許水部臺二卷】浙江汪汝璵家藏本

明許應元撰應元字子春錢塘人嘉靖壬辰進士官至廣西布政使是集乃應元官夔州知府時所自刊以皆官郎署時所作故仍以水部名集凡詩一卷文二卷

【元光漫藁五卷】浙江巡撫探進本

明李徵撰徵字誠之湖廣桃源人嘉靖壬辰進士官至布政司參議歸田後結廬於元光洞因以名集其於律詩題曰八句而不名律詩於絕句題曰四句而不名絕句爲唐宋諸集未見之例詩多出韻又不合洪武正韻亦不知何說也前序稱六卷而其書實止五卷後餘一頁蓋殘闕之本故今以五卷著錄焉

【蓋心堂集二卷】浙江范懋柱家天一閣藏本

明王尙文撰尙文字寶江真定人嘉靖壬辰武進士累官福建總兵官挂征蠻將軍印都督同知明萬歷戊寅廣西桂林柳州苗獍煽亂馬平獍韋王朋率東甌大產諸蠻攻掠村落尙文勦平之是書所載祇當時奏疏劄啓附以贈言壽序之類故標題蓋心堂集而以征蠻紀略爲子目然韋王朋與堡兵爭鬪之由及要挾東甌大產諸蠻事實書中多不一叙又十寨先

後分合開設事宜亦未能備載均不及明史土司傳及廣西通志之詳實非紀事之書與紀略之名殊不相應今從其總名仍題曰蓋心堂集存其目於集部庶不失實焉

【白雲山房集二卷】浙江汪汝璵家藏本 明高應冕撰應冕字文中仁和人嘉靖甲午舉人官光州知

州是集序記雜文凡八十七篇中如游閒公子白雲先生羲皇上人諸傳虞秦對曹交篇諸文大抵構虛託喻游戲筆墨惟縱囚一辨差爲有見云

【求志齋言草二十卷】兩淮鹽政採進本 明陳瀚撰瀚號龍嶽秀水人嘉靖甲午舉人官至廉州府知

府是集兼載詩文詞頗質實而微嫌鈍置前有薛僑序稱所著學論十篇尤其平日所得今在第十七卷中然皆宋儒所常言無所闡發也

【孫文恪集二十卷附錄一卷】兩江總督採進本 明孫陞撰陞字志高餘姚人燧之子也嘉靖乙未進

士官至南京禮部尚書是集文十四卷詩六卷其子鑰等所編有與人論詩文書云李空同步武古人學李譬則燕途入秦車轍所歷可循而至又云空同與何大復辯論詆其好詞乖法之失何氏亦嘗詆李謂

其作疎鹵閒涉於宋總之負氣求勝各不相下觀於是言可以知其辨香所在矣附錄一卷乃其繼室楊文儷作文儷仁和人工部員外郎應獬之女諸子成進士者四人鑰鋌鑿皆至尚書鏘至太僕寺卿皆文

儷教之蓋有明一代以女子而工科舉之文者文儷一人而已詩其餘事也

【西野遺藁十四卷】兩江總督採進本 明李璣撰璣字邦在號西野豐城人嘉靖乙未進士官至南京

禮部尚書是集前有何鏜序稱璣文藁多燬於火仲孫自茂掇拾其僅存者哀爲五帙授梓此本多至十

四卷。又崇禎中其曾孫九疇所刻也。凡文十卷。詩三卷。雜著一卷。詩中以古體與五言古風分爲二目。殊乖體例。

【文肅集二十三卷】兩江總督採進本。明趙貞吉撰。貞吉字孟靜。內江人。嘉靖乙未進士。官至文淵閣大學士。謚文肅。事蹟具明史本傳。是集凡詩六卷。文十七卷。貞吉學以釋氏爲宗。姜寶爲之序曰。今世論學者多陰採二氏之微妙。而陽諱其名。公於此能言之。敢言之。又詎言之。昌言之。而不少避忌。蓋其所見真。所論當。人固莫得而訾議也。其持論可謂悍矣。

【駱兩溪集十四卷附錄一卷】江蘇周厚瑄家藏本。明駱文盛撰。文盛字質甫。武康人。嘉靖乙未進士。官翰林院編修。初蔡汝柁刻其詩集七卷。并爲之評點。卷首汝柁序。卽爲詩集而作。此集益以雜文筆記七卷。蓋楊鶴所續增也。其詩文皆於淺弱之中。時有清遠之致。蓋文盛官翰林時。以忤附嚴嵩。遂移疾不出。後貧病垂死。有以千金求居閒者。尙力揮之。至沒無以葬。事具吳尙文序。及卷末。又書事中。是其胸次本高。故吐言不俗。特編次者。欲取卷帙之富。未能盡翦其榛楛耳。

【奚囊蠹餘十八卷】安徽巡撫採進本。明張瀚撰。瀚有臺省疏藁。已著錄。是集賦一卷。詩九卷。記一卷。雜著一卷。墓誌二卷。行狀行略一卷。祭文一卷。書二卷。瀚於萬歷中以忤張居正罷歸。頗著風節。浙江通志稱其善書法。工點染。詩文莊嚴典則。歸之爾雅。然集中酬贈牽率。什居六七。雖平正無瑕。而殊少醞釀。其自序謂奔走四方三十餘年。每以一囊自隨。凡所得簡札詩帖。俱納其中。積久蠹蝕。因取其字畫稍全。章句可讀者。錄出成帙。故名曰奚囊蠹餘云。

【璉川詩集八卷】浙江汪汝璉家藏本 明施峻撰。峻字平叔，歸安人。嘉靖乙未進士，官至青州府知府。朱彝尊靜志居詩話謂平叔以七律自詡，然殊不見好。諸體過修邊幅，未免氣餒。是集有顧應祥序，亦謂唐以後詩音調格律相尙，鍛鍊益工，其氣益弱，亦似微致不滿焉。

【陳梧岡集九卷】兩江總督採進本 明陳堯撰。堯字敬甫，號梧岡，南通州人。嘉靖乙未進士，官至刑部

左侍郎。明史藝文志載堯文集五卷，詩集三卷，是集乃文二卷，詩二卷，與志不符。然首尾完具，篇次分明。志蓋偶沿千頃堂書目之誤也。其文樸直不支，而微傷太質。其詩又遜於文。

【驪山集十四卷】陝西巡撫採進本 明趙統撰。統有杜律意註，已著錄。是集乃楊光訓所編，集中自謂

嘉靖丁未，誤讎陷獄，近三十年，多爲詩。萬歷癸酉恤歸，仍歲爲一集。此本凡賦及詩九卷，文一卷，雜著二卷。詩話二卷，總題曰驪山集，似光訓有所刪汰也。前有朱勤萇序，稱其命意搜微，多出己見，大都骨力莽蒼，學殖淹博，稍稍融透，莫難鴈行獻吉。然則明譏其未融透矣，何不悟而猶刊以弁集也。

【方山文錄二十一卷】浙江孫仰曾家藏本 明薛應旂撰。應旂有四書人物考，已著錄。是集爲應旂所

自編，其學初出於邵寶，後從泰和歐陽德、德姚江派也。又從高陵呂柟、柟河東派也。故所見出入朱陸之

間，然先入爲主。宗良知者居多。集中論學之語，互有醇疵。蓋由於此。至其讖勢論中，稱黨錮興而漢社屋

元談盛而晉室傾，清流濁而唐祚移，學禁作而宋舟覆。其初文雅雍容，議論標致，不過起於一二人之獵

勝，而其究乃致怨惡沸騰於寰中，干戈相尋於海內，而潰敗不可收拾云云。若於七八十年之前，預見講

學之亡明者，則篤論也。其文章當李何崛起之時，獨毅然不變於風氣，然應旂以時文擅長，古文特自抒

胸臆。惟意所如。故往往輕快有餘。少停蓄深厚之意。如十五卷費文通傳。稱公生成化癸卯三月十四日。距卒六十有六年。初娶婁氏。以產卒。繼娶金谿吳都御史女。復卒。俱贈夫人。五子長某。次某云云。此誌狀之文。非傳之體。於文格亦多未合。所謂不踐迹。亦不入於室者歟。所作史論。如漢武帝蘇軾諸篇。特爲平允。而漢文帝論中。稱賈生不死。文帝終必用之。賈誼論中。又稱文帝終不能用之。取快筆端。自相矛盾。亦不可盡據爲典要也。

【兩城集二十卷】山東巡撫採進本。明靳學顏撰。學顏字子愚。濟寧人。嘉靖乙未進士。官至吏部左侍郎。事蹟具明史本傳。是集前有于若瀛序。稱所著有閒存集。兩城集。荒藁園志等部。沒後所存僅十之二三。其子需等復裒輯爲詩十四卷。文六卷。即此本也。其詩格律清整。而蹊徑尙存。不脫歷下流派。文則偶然揮灑而已。

【嵩陽集】無卷數。浙江朱彝尊家曝書亭藏本。明劉繪撰。繪字子素。一字少質。光州人。嘉靖乙未進士。官至重慶府知府。事蹟具明史本傳。是集首賦次詩次書次疏。復以詩賦殿後。而不分卷帙。蓋編次未定。旋作旋刊。明人文集。往往多如是也。其詩局度頗宏整。而乏深致。文不加修飾。暢所欲言。如春秋補傳序云。古之註經者務簡。後之註經者務繁。古之註經者務簡。而經益明。後之註經者務繁。而經益晦。六經之註。莫不皆然。而春秋爲甚。持論頗爲平允。至劾夏言一疏。但以不戴所賜香葉冠。激世宗之怒。則非諫臣之體。案明史夏言本傳。稱賜香葉束髮巾。言謂人臣非法服不受。帝積憤欲去言。嚴嵩因得聞之。至言得罪下獄。帝猶及前不戴香冠事。據此則繪是疏。或當有所受之歟。

【王氏存笥彙二十卷】江蘇巡撫採進本 明王維楨撰。維楨字允寧，華州人。嘉靖乙未進士，官至南京國子監祭酒。明史文苑傳附見李夢陽傳中。千頃堂書目載維楨存笥彙二十卷，又全集四十二卷。今全集未見。傳本惟此集存。乃其友餘姚孫陞所編也。前十六卷爲雜文，後四卷爲古今體詩。陞序稱其文法司馬遷，詩法漢魏，近體尤宗杜氏。朱彝尊靜志居詩話則謂七律滯鈍，五言有句無篇。今觀其集，彝尊之論爲允。胡應麟又稱其文矯健勝其詩，亦不盡然。

【天山草堂存彙八卷】浙江巡撫採進本 明何維柏撰。維柏字喬仲，南海人。嘉靖乙未進士，改庶吉士，授監察御史，坐劾嚴嵩廷杖除名。隆慶初復原官，累遷南京禮部尚書。諡端恪。事蹟具明史本傳。是集文六卷，詩二卷。文集中有講義語錄二種，皆以白沙緒論爲宗。其詩亦多講學語。蓋維柏嘗從陳獻章游也。朱彝尊明詩綜謂其乞休詩云：樂事尙饒新歲月，勝游不改舊雲山。乃侍其父與鄉人爲九老會時所作。今考乞休詩爲萬歷丙子得旨歸老之作，而和其父與九老韻七律二首，則作於嘉靖戊申。乃劾嚴嵩後削籍歸里時作。彝尊徵引偶誤，殆亦未見此集歟。

【金齋集四卷】直隸總督採進本 明宋諾撰。諾字子重，號金齋，故城人。嘉靖乙未進士，官至兗州府知府。是集文三卷，詩一卷，而別以策對書啓之類附入詩後。其歷官條教又標政績一目，體例頗爲糅雜。集中大抵宦游應酬之作。

【沈鳳岡集四卷】山西巡撫採進本 明沈良才撰。良才字鳳岡，泰州人。嘉靖乙未進士，官至兵部右侍郎。其爲吏科給事中時嘗疏劾嚴嵩，頗見風采。詩則尙未成家。

【陳文岡集二十卷】內府藏本 明陳棐撰。棐，鄢陵人。文岡其字也。嘉靖乙未進士官至甘肅巡撫。是集詩文多率筆，奏疏亦多迂論。

【省中彙一卷二臺彙二卷歸田彙十卷】兩淮鹽政採進本 明許穀撰。穀字仲貽，上元人。嘉靖乙未進士官至尚寶司卿。二臺彙歸田彙皆詩集，惟省中彙兼有雜文。詩格頗爽俊，當其合處，時得古人之意，而失於芟擇，多參以應俗之作，遂不免沙中金屑之憾。千頃堂書目載所作，尚有武林彙一卷，此本不載，或裝緝者偶佚歟。

【徐陽溪集六卷】江西巡撫採進本 明徐燦撰。燦字文華，後更字本充，號陽溪，奉新人。嘉靖丁酉舉人，嘗館於嚴嵩家。一日嵩與朝官燕，方獻酬，客皆跪受爵，燦遂慨然辭歸。蓋亦知幾之士，較賢於張翥。平生喜講良知之學，故其文皆質俚，詩亦類擊壤集派。

【見滄文集十五卷】浙江巡撫採進本 明茅瓚撰。瓚字見滄，錢塘人。嘉靖戊戌進士第一，官至吏部左侍郎。是集爲其門人趙應元所編，而其子藉吉校刊之。第一卷爲廷對策，二卷至七卷爲各體詩，八卷以下皆雜文，大抵應俗之作也。

【袁文榮詩略二卷】江蘇巡撫採進本 明袁煒撰。煒字懋中，慈谿人。嘉靖戊戌進士官至建極殿大學士。謚文榮。事蹟附見明史。嚴訥傳。史稱煒才思敏捷，帝半夜出片紙命撰青詞，舉筆立成。遇中外獻瑞，輒極詞頌美。帝畜一貓死，命儒臣撰詞以醮，煒詞有化獅作龍語，帝大喜。其詭詞媚上多類此。時謂李春芳嚴訥郭樸及煒爲青詞宰相，又稱煒自負能文，見他人所作，稍不當意，輒肆詆誚，館閣士出其門者，斥辱

尤不堪。故人皆畏而惡之。是編首題門人王穉登校。蓋穉登以山人游煒之門也。申時行序。稱煒所爲詩甚多。歲久散逸。其孫景祖景高。搜遺草得若干首。名之曰詩略。案明史藝文志。袁煒詩集八卷。是煒別有全集。此其選本。故題曰詩略耳。集中佳句寥寥。不識何以狂傲如是。又兩卷無一應制之作。殆穉登削之耶。

【愛吾廬集八卷】江西巡撫採進本。明徐良傅撰。良傅字子弼。東鄉人。嘉靖戊戌進士。官至吏科給事中。以言事斥爲民。其門人湯顯祖所作傳。載其行履頗詳。集凡八卷。詩體略近七子。氣度安雅。而風骨不足以振之。古文則序多至數十篇。而論碑記祭文。僅得六篇。第八卷中題曰瑞金楊子莊採補。疑本有散佚。而後人掇拾刊行之。非其全也。

【崇蘭館集二十卷】浙江汪汝璫家藏本。明莫如忠撰。如忠字子良。華亭人。嘉靖戊戌進士。官至浙江布政使。告歸杜門著書。年至八十餘乃卒。明史文苑傳。附載董其昌傳中。其詩頗具唐音。五言近體尤多佳句。文則應俗之作居多。惟題跋十餘則。頗爲雅令。案如忠精於賞鑒。流傳墨蹟。題識最多。此所收猶未盡也。

【陳兩湖集二十四卷】江西巡撫採進本。明陳昌積撰。昌積號兩湖。泰和人。嘉靖戊戌進士。官至尙寶司少卿。兼翰林院學士。嘗手刪其文爲龍津彙。後其子文揚文振。又益以古今體詩。合爲此集。其詩文悉才調富有。而馳驟自喜。細大不捐。

【松風軒藏彙八卷】江西巡撫採進本。明陳昌積撰。此集千頃堂書目不著錄。蓋其初刻未定之本也。

【己寬堂集四卷】浙江孫仰曾家藏本。明陳鏊撰。鏊字子兼。號雨泉。吳縣人。自署曰潁川。從郡望也。嘉靖戊戌進士官至四川提學副使。署布政使。是集所載詩。自嘉靖壬辰至萬歷乙亥。計四十四年之作。篇什雖多。頗傷蕪雜。前有岷王定燿序。言其子出己寬堂詩文二編。而此帙有詩無文。蓋不全之本也。然千頃堂書目已作四卷。則文集之佚久矣。

【錢永州集八卷】兩淮鹽政探進本。

明錢芹撰。芹字懋文。號泮泉。海鹽人。琦之次子也。嘉靖戊戌進士。

官至永州府知府。故以永州名集。首列疏奏二卷。頗切當時利弊。其斥異端一條。蓋爲陶仲文而發也。惟其學出自湛若水。後乃改從王守仁。故於姚江一派。推挹頗深。持論不無少偏云。

【華陽漫藁十四卷】浙江汪汝璫家藏本。

明章煥撰。煥有平倭四疏。已著錄。其官總督南京倉儲副都。

御史時。以赴任遲延。言者劾其怠慢。君命逮治。謫戍廣東。卷中題羅浮山人。蓋在粵時所自號也。集爲其子德基所編。凡奏疏四卷。雜文九卷。詩一卷。而以德基從戍時賦詩百餘首附於末。

【天目山齋藏編二十四卷】浙江汪汝璫家藏本。

明吳維嶽撰。維嶽字峻伯。孝豐人。嘉靖戊戌進士。官

至右都御史。巡撫貴州。明史文苑傳附見王世貞傳中。爲嘉靖廣五子之一。是集皆其讀書天目山時吟詠倡和之作。分年編次。起嘉靖己亥。訖壬戌。朱彝尊靜志居詩話。謂峻伯詩如鉛刀土花。不堪洒削。雖詆之太過。然覆核斯集。其論亦非無因也。

【白華樓藏藁十一卷續藁十五卷吟藁八卷玉芝山房藁二十二卷老年錄七卷】浙江巡撫探進本。

明茅坤撰。坤有徐海本末。已著錄。是編藏藁續藁皆其雜著之文。吟藁則皆詩也。玉芝山房藁文十六卷。

詩六卷。老年錄。則詩文雜編。不復分類。坤刻意摹司馬遷歐陽修之文。喜跌宕激射。所選史記鈔。八家文鈔。歐陽史鈔。即其生平之宗旨。然根柢少薄。摹擬有迹。秦漢文之有窠臼。自李夢陽始。唐宋文之亦有窠臼。則自坤始。故施於制義。則爲別調獨彈。而古文之品。終不能與唐順之歸有光諸人抗顏而行也。至老年錄。則精力既衰。頽唐自放。益非復壯盛之時。刻意爲文之舊矣。

【大拙堂集九卷】浙江巡撫採進本。明楊載鳴撰。載鳴字虛卿。泰和人。嘉靖戊戌進士。官至通政使。是集前六卷爲雜文。後二卷爲詩。末一卷爲雜著。載鳴爲楊士奇之裔。士奇泰和人。嘉靖戊戌題名碑錄。亦作泰和人。而卷首稱廬陵楊載鳴。蓋署古郡名也。

【大司空遺藁十卷】浙江巡撫採進本。明陳紹儒撰。紹儒字師孔。南海人。嘉靖戊戌進士。官至南京工部尚書。是集文八卷。詩二卷。詩皆嘉靖四十年以後。至萬歷八年以前之作。其文有意刻畫韓柳。而往往失之粗率。詩則音調諧美。亦學唐格。而過於摹擬者也。

【讓溪甲集四卷乙集十卷】浙江孫仰曾家藏本。明游震得撰。震得字汝潛。婺源人。嘉靖戊戌進士。授

行人。擢監察御史。以疏諫世宗好方士。廷杖謫外。後官至左副都御史。巡撫福建。以興化失守罷歸。再起督轄南京糧儲。震得少與歐陽德鄒守益諸人游。故頗講姚江之學。然與王畿書多所規正。猶異於末派之狂禪。興化之役。由指揮歐陽深孤軍戰沒。震得封疆大臣。不能不爲法受惡。且所薦譚綸劉顯威繼光諸人。卒皆有所建立。故論者或恕焉。是集其所手定。甲集四卷。皆講學之語。乙集十卷。則詩文雜著也。

【鷄土集六卷】直隸總督採進本。明劉乾撰。乾字仲坤。號易菴。保定人。嘉靖戊戌進士。官國子監丞。是

集詩詞二卷。賦記雜文四卷。其以鷄土命名者。自序爲夢入太極宮。見玉鷄。以爲文章之兆。其說頗荒唐。不經。詩文亦不入格。而夢上天詩。夢感賦。紀夢文諸篇。乃屢屢見之集中。何其好說夢歟。

【青峯存集十二卷】江西巡撫採進本

明江柏撰。柏字廷節。號青峯。浮梁人。嘉靖戊戌進士。官至光祿

寺卿。其文氣度恬雅。無剽竊摹擬之病。而微嫌其弱。詩亦學宋格而未成。蓋不囿於李何之門徑。而其力又不足以勝之也。集爲其姪思聰所刻。第一卷爲表論。第二卷爲詩歌樂府詞。三卷以下皆雜文。編次殊爲錯亂。思聰序稱柏歷官廣浙。正當海寇猖獗之時。經略海防。不啻數萬言。居常自謂應酬文字。雖蒙士大夫許可。不過空言。此則身當其事。曲中機宜。異時修海防者。吾言恐不可廢。謄寫成帙。以呈大參王公。及巡海林公。未及領回。此後無緣復取云云。則此集所存。原非柏愜意之作矣。

【同春堂遺藁四卷】江蘇巡撫採進本

明劉熠撰。熠字元麗。海鹽人。嘉靖庚子舉人。官至監察御史。是

集乃崇禎丁丑。其曾孫江南布政司參政泓所編。國朝順治中。其玄孫維棟始刻之。韻語皆非所長。古文亦不入格。

【泌園集二十七卷】浙江孫仰曾家藏本

明董份撰。份字用均。泌園其號也。烏程人。嘉靖辛丑進士。官

至禮部尚書。兼翰林學士。是集爲其孫嗣茂所編。凡詩七卷。文三十卷。

【嚴文靖公集十二卷】浙江汪啓淑家藏本

明嚴訥撰。訥有春秋國華。已著錄。明史訥本傳。稱訥入直

西苑。所撰青詞。皆稱旨。然文格未能拔俗。集中亦大抵應酬之作。末附詩四十六首。朱彝尊錄其對月一首於明詩綜。與此本頗有異同。殆有所點竄歟。

【高文襄公集四十四卷】安徽巡撫採進本

明高拱撰。拱有春秋正旨。已著錄。是編分外制集一卷。綸

扉內彙一卷。外彙一卷。獻忱集二卷。政府書荅二卷。掌銓題彙十四卷。南宮奏牘二卷。防邊紀事一卷。伏戎紀事一卷。綏廣紀事一卷。程士集二卷。本語三卷。春秋正旨一卷。大學直講一卷。中庸直講一卷。論語直講二卷。問辯錄五卷。病榻遺言二卷。每類前各有題詞。明史藝文志作獻忱集五卷。詩文集四十四卷。今獻忱集即在卷內。而四十四卷中有文無詩。殊不可解。又別本四十二冊無卷數。以問辯錄居首。內多土蠻紀事靖夷紀事二種。餘皆相同。疑爲初刻之本也。

【玉堂公草十卷】

副都御史黃登賢家藏本

明高拱撰。是編首載大學講義一卷。中庸講義一卷。論語

講義三卷。皆嘉靖閒藩邸所講。次爲程士錄二卷。載嘉靖戊午及乙丑鄉會錄序。及所撰程文三場。皆備獨無易經文。未喻其故。後爲獻忱集二卷。皆辭謝稱賀諸表奏。次爲綸扉彙一卷。則在政府時作也。皆已見全集。此蓋初刻之本。故綸扉外彙不與焉。

【外制集一卷】

安徽巡撫採進本

明高拱撰。嘉靖乙巳。世宗令輔臣舉編修二人。檢討三人。於中祕撰

文官誥敕。拱時在列。是編乃其代言之彙也。前有自序。稱掌誥敕者。初以閣學或翰詹掌貳。後乃屬之兩院供事官。至是始復翰林之舊云。

【政府書荅四卷】河南巡撫採進本

明高拱撰。皆錄其爲首輔時。與各省文武大僚尺牘。分庚午防秋

款處北邊。捷宣東塞。安綏廣東。警服貴番。各省應答。調處徐府等七目。其文大都爲籌酌時政而發。至徐階一事。則全爲自明心迹而設矣。

【萬子迂談八卷】江西巡撫探進本。明萬衣撰。衣字章甫。潯陽人。嘉靖辛丑進士。官至河南左布政使。是集內編一卷。通論天地造化之理。及古今人事之變。諸經筭記二卷。上卷專解五經之義。多雜探先儒之說。如論朱子詩集傳一條。本之王應麟。論淫詩一條。本之王柏。論春秋策書之例。十有五。而筆削之義。有八一條。本之趙汭者。不一而足。然謂六經皆厄於傳疏。其宗旨未免偏僻。下卷專論律呂。其云十分爲寸。則三分損益之法。不可行。以之規西山之誤。則頗爲明確。其迂談外篇一卷。雜論兵制屯鹽等事。又文三卷。詩一卷。書啓一卷。皆不過直抒胸臆。不復計其工拙矣。

【履菴集十二卷】浙江巡撫探進本。明萬士和撰。士和字思節。宜興人。嘉靖辛丑進士。官至禮部尙書。諡文恭。事蹟具明史本傳。是集凡詩詞三卷。雜文九卷。其官江西貴州湖廣山東。以至爲宗伯時。事蹟頗散見。其中然過任自然。罕鑄詞之功。蓋士和受業唐順之。能不染七子雕繪之習。而殫心吏事。又未能竟其業也。

【瞿文懿制敕彙一卷制科集四卷詩文集十六卷】兩淮馬裕家藏本。明瞿景淳撰。景淳字師道。號昆

湖。常熟人。嘉靖甲辰進士。官至南京吏部右侍郎。事蹟具明史本傳。是集爲其子汝稷所編。首卷制彙十一篇。敕彙二十七篇。蓋即明史藝文志所謂瞿景淳內制集也。其制科集四卷。皆應試策論。諸作詩文集十六卷。則文居其十五卷。詩賦一卷。特附見備體而已。景淳清介自持。史載其與嚴嵩論胡宗憲。及不撰陸炳妻誥詞。皆觸忤權姦。無所憚畏。其制義亦名一時。至今有王唐瞿薛之稱。古文則非所擅長也。

【石龍菴詩草四卷附刻二卷】浙江孫仰曾家藏本。明徐學詩撰。學詩字以言。別號龍川。上虞人。嘉靖

甲辰進士授刑部主事遷郎中以劾嚴嵩父子罷職隆慶初起南京通政司參議未上而卒贈大理寺少卿學詩不以詩名而所作音節頗清亮蓋嘗與李攀龍相贈答故流派與之相近遺藁多闕字邑人黃之璧爲補入以圈別之後二卷則附刻劾嵩疏藁及傳略諸篇

【山帶閣集三十三卷】浙江孫仰曾家藏本

明朱曰藩撰曰藩字子价號射陂寶應人雲南布政司參

政應登之子嘉靖甲辰進士官至九江府知府是集詩十五卷雜文十八卷應登詩做李夢陽曰藩則法楊慎嘗因所知通訊滇南慎爲選其詩七十餘首品題之其在金陵懸慎畫像於寓齋集中有人日瞻禮升菴公像詩是也然其詩穠麗僅得慎之一體王世貞藝苑卮言謂其如高座道人忽作番語則詆之太甚矣

【石室祕鈔五卷】福建巡撫採進本

明魏文煥撰文煥字德章侯官人嘉靖甲辰進士官至廣西按察

司使是集初刊於萬歷丙戌崇禎庚午其孫定海知縣汝爲又重刊之凡雜著二卷皆讀書論古之作其中如駁方孝孺之疑子華子則未覩晁公武及朱子說謂王充假蔡邕以自重則未考充爲肅宗時人不免疎舛第二卷爲詩五卷六卷爲雜文中征支羅記征龍洲記松潘備兵本末敘其戰功頗詳福州道山下有朱子所書石室清隱字文煥家近山麓遂以名其集云

【白雪樓詩集十卷】江蘇周厚培家藏本

明李攀龍撰攀龍有詩學事類已著錄此集刻於嘉靖癸亥

猶在滄溟集之前前有魏棠序又有擬古樂府序二篇一爲歷城許邦才撰一爲攀龍自序蓋當時特以樂府相誇然而後來受詬厲者亦惟樂府最甚焉

【李滄溟集選四卷】浙江巡撫採進本 明李攀龍撰。宋光庭所選。光庭莆田人。始末未詳。王李二家皆以詩擅長。文則不逮。詩遠甚。攀龍之文。尤不逮。王世貞、光庭乃獨選其文。可謂不善持擇矣。每卷之首皆題曰補註李滄溟集。而書實無註。亦不可解。

【敬所文集二十卷】江蘇巡撫採進本 明王宗沐撰。宗沐有海運詳考。已著錄。此集自一卷至十卷。爲序頌書啓。曰內編。十一卷至二十卷。爲詩論碑賦說傳書後約策問祭文行狀銘誌講義。曰別編。二十一卷至三十卷。爲奏疏雜著文移。曰外編。明史藝文志載宗沐奏疏四卷。文集三十卷。此本止三十卷。而奏疏在焉。卷首題門人張位選集。然則史所載者其全集。此爲位所編定。歟。抑其奏疏又有集外別行之本。史竝載之也。

【師暇哀言十二卷】浙江孫仰曾家藏本 明吳桂芳撰。桂芳字子實。新建人。嘉靖甲辰進士。官至工部尙書。事蹟具明史本傳。是集乃其總督兩廣時所自編。時方禦倭。故題曰師暇哀言。其文平正通達。無鉤章棘句之習。而亦無警策。蓋猶沿臺閣舊體。詩力摹唐調。亦頗宏敞。而有學步太甚者。如陳子昂有王師非樂戰之子。慎佳兵句。桂芳送張玉亭慮囚淮上。襲用其調曰。王仁非好殺之子。慎祥刑。非所謂擬議變化之道也。

【五鵠別集二卷】直隸總督採進本 明盧寧撰。寧字獻子。號冠巖。南海人。嘉靖甲辰進士。官至登州府知府。寧受業黃佐之門。佐樂典序。即所作也。是集乃其官南京刑部時。講學新泉精舍。其門人程子明所刻。及守登州。所屬黃縣知縣劉珙。又重刻之。以寧先有五鵠臺集。故此以別集名。凡詩一卷。文一卷。皆湊

泊成篇不能入格。

【崇實堂集二十卷】江西巡撫採進本

明李萬實撰。萬實字少虛。南豐人。嘉靖甲辰進士。官至浙江按

察司副使。其爲給事中時。嘗疏論權璫改官。蓋亦骨鯁之士。是集凡詩九卷。文十一卷。江西通志稱所作奏疏。別名恬仕錄。徐龍川序。而此集末亦載有奏疏三卷。蓋其初別本單行。後又編入集中也。萬實傳姚江之說。其文體平正。不事錘鎔。猶講學家之格。其詩頗學韋柳。意取清妍。雖風骨未就。而姿致可觀。則其天分之高也。

【小海存藁八卷】兩江總督採進本

明馮覲撰。覲字晉叔。別號小海。海寧人。嘉靖甲辰進士。官至廣東

按察司副使。是集詩三卷。文五卷。乃其子有翼所編。張瀚序。稱其簡易明粲。不假雕琢。頗非溢美。然才地頗弱。未足名家。集中有庚戌言兵事書。乃覲爲兵部郎時所作。以上丁汝夔者。中有請就京城外土城遺址。增築外羅城。以備不虞一條。其後竟築外城。說者謂功成於許論。而不知覲已發其端也。

【太乙詩集五卷】陝西巡撫採進本

明張鍊撰。鍊字伯純。武功人。嘉靖甲辰進士。官至湖南按察司僉

事。其集曰太乙者。太乙山名。在武功。王維所謂太乙近天都也。鍊以自號。因以名集。其詩源出長慶。而更加率易。如云一種勳庸一代賢。蜚聲滿路勢熏天。憑君回首寰中事。若個豪華過百年之類。殊不類詩格。至如能使機衡在我。從他造物弄人等句。則愈涉俗矣。

【無聞堂藁十七卷】浙江孫仰曾家藏本

明趙鈇撰。鈇有古今原始。已著錄。是集凡文十二卷。詩五卷。

乃其子鴻賜所編。林樹聲爲作墓誌。稱其幾希圖說。關方士論。講學諸說。皆闡明理道。發前人所未發。今

惟幾希圖說見集中餘皆不載。盛汝謙爲作行狀載自祭文一篇集中亦不載。蓋亦簡汰而存者也。錢學出姚江。主良知之說。文頗磊落自喜。而亦微近七子之派。

【郭東山文集七卷詩集二卷】江蘇巡撫探進本。明郭文周撰。文周字景復。號東山。福安人。嘉靖甲辰進士官至監察御史。巡按廣東。其文集多應酬之作。詩分前後二卷。前卷爲南畿稟。後卷爲菊邊閒譚集。解組稟。

【百川集十二卷】浙江巡撫探進本。明孫樓撰。樓字子虛。常熟人。嘉靖丙午舉人。官湖州府推官。工於制義。與胡友信。瞿景淳等相上下。詩古文則非專門也。

【貽安堂集十卷】兩江總督探進本。明李春芳撰。春芳字子實。號石麓。福建興化人。嘉靖丁未進士。第一官至中極殿大學士。謚文定。事蹟具明史本傳。春芳與嚴訥。郭樸。袁煒。同有青詞宰相之目。史具載於袁煒傳中。然所作皆不傳。是集爲其子茂材所編。疏表序記之文居多。詩則不滿一卷。李戴于慎行。朱廣李維楨爲之序。皆謂春芳不規。以文墨見長。是以其存草僅如此云。

【太岳集四十六卷】浙江巡撫探進本。明張居正撰。居正有書經直解。已著錄。神宗初年。居正獨持國柄。後毀譽不一。迄無定評。要其振作有爲之功。與威福自擅之罪。俱不能相掩。至文章本非所長。集中奏疏。啓劄最多。皆在廟堂時論事之作。往往縱筆而成。未嘗有所鍛鍊也。

【餘清堂稟三十二卷】江蘇周厚埶家藏本。明汪鏜撰。鏜字遠峯。鄞縣人。嘉靖丁未進士。官至禮部尙書。掌詹事府兼翰林院學士。是集詩八卷。文二十四卷。考千頃堂書目。鏜有餘清堂稟十二卷。今未見其

本又有餘清堂定彙三十二卷。即此編也。

【念初堂彙四卷續集二卷】兩淮馬裕家藏本

明陳嘉謨撰。嘉謨廬陵人。嘉靖丁未進士。官至四川按

察司副使。隆慶庚午移疾歸。召爲湖廣布政司左參政。不起。優游林下以終。其詩起於嘉靖丁未。終於萬曆癸卯。往來仕宦者二十三年。而閒居者三十三年。故多自適之言。序引邵子擊壤集自擬。而詩中屢引陳獻章語。其旨趣可知也。

【友慶堂合彙七卷】江西巡撫採進本

明王時槐撰。時槐有廣仁類編。已著錄。是集凡書二卷。序記傳

墓誌一卷。語錄一卷。說跋及石經大學略義一卷。雜著詩詞一卷。詩詞不多作。亦非所長。文皆講學之語。而兼出入於老莊之間。明季所謂心學者也。其石經大學略義。自云出於賈逵。而表章於鄭曉。且稱王守仁大學古本。一依註疏之舊。味其文字旨趣。亦未甚瑩。似不無錯簡云云。不知鄭曉所傳。乃豐坊之僞本。諸儒考證已明。譎妄畢露。時槐更噓其殘燼。誤之甚矣。

【周叔夜集十一卷】浙江孫仰曾家藏本

明周思兼撰。思兼有學道記言。已著錄。思兼以循吏著。然史

稱其少有文名。是集爲王世貞所刪定。文頗學三蘇。詩則七子之流派也。

【鳳洲筆記二十四卷續集四卷後集四卷】兩淮鹽政採進本

明王世貞撰。世貞有弇山堂別集。已著

錄。是集乃隆慶己巳黃美中所編。前有美中序。稱世貞著作不能盡見。會從其姪孫少川子得此集。因編刻以公天下。蓋當時摘選之本也。然命詩文曰筆記。其稱名可謂不倫矣。

【弇州彙選十六卷】兩淮鹽政採進本

明王世貞撰。沈一貫選。一貫有易學。已著錄。世貞才大學博。自

謂靡所不有。方成大家。故其正續四部彙。頗傷蕪雜。晚年悔其少作。而未及手自刪定。一貫是編。別裁澄汰。意在擷其菁華。而宗旨所歸。仍尊秦漢。而薄唐宋。終未能棄短取長也。

【文恪集二十二卷】兩淮鹽政採進本。明林懃撰。懃字貞恆。閩縣人。嘉靖丁未進士。官至南京禮部尙書。諡文恪。事蹟附見明史。林瀚傳。是集詩六卷。文十六卷。末附王世貞。王穉登所撰傳二篇。千頃堂書目。

載林懃學士文集十六卷。詩集六卷。集名不同。然卷數皆相合。蓋即此本。疑懃沒後重刻。改題其諡也。

【三洲詩贈八卷】浙江孫仰曾家藏本。明沈淮撰。淮字激伯。仁和人。嘉靖丁未進士。是集前後無序跋。

亦無目錄。其完闕不可考。詩則體格尙未成就。累句亦多。

【金輿山房彙十四卷】江蘇巡撫採進本。明殷士儋撰。士儋字正夫。號棠川。歷城人。嘉靖丁未進士。官

至武英殿大學士。諡文莊。事蹟附見明史。趙貞吉傳。是集爲其門人于慎行所編。凡詩頌二卷。文十一卷。講義一卷。士儋與李攀龍游。今觀其詩文。蓋直以鄉曲之誼相周旋耳。其投契不在文章也。

【道峯集六卷】浙江汪汝璫家藏本。明章适撰。适字景南。道峯其號也。蘭谿人。嘉靖丁未進士。官至禮

科給事中。以疏請景裕二王出閣講讀。忤旨告歸。是集乃适沒之後。其鄉人所刊。凡詩五卷。雜著一卷。而奏疏一篇。冠於首。蓋當時以此一事重之也。詩頗娟雅。而醞釀不深。王世貞序稱其在陶韋之間。則過矣。

【彭比部集八卷】浙江巡撫採進本。明彭輅撰。輅字子殷。海鹽人。嘉靖丁未進士。官南京刑部主事。以

察典罷歸。集爲其子潤宏所編。焦竑稱其於七子盛時。意氣高簡。不少貶以就俗。今觀集中。多與王世貞酬答之作。體格亦近七子。竑所言不盡然也。

【華陽館文集十七卷續集二卷】江西巡撫探進本 明宋儀望撰。儀望字望之，永豐人。嘉靖丁未進士。

授吳縣知縣，徵拜御史，以劾胡宗憲、阮鶚、忤嚴嵩，貶夷陵州判。嵩敗，擢霸州兵備僉事。後官至大理寺卿。卒，以忤張居正被劾歸。事蹟具明史本傳。儀望少師聶豹，故其學以王守仁爲宗。集中如刻陽明文集、文粹等序，足以見其大旨。其從祀或問，亦即爲守仁配享事作。故史稱守仁從祀，儀望有力焉。其集凡文十二卷，詩五卷，續集第一卷，題曰內篇，即從祀或問。第二卷，則其督學福建時訓飭士子條規。其文本名華陽館集，其詩則別名河東集。此本合爲一編，總題曰華陽館文集，殆其後人所併歟。

【華陽文集十二卷】浙江汪汝璫家藏本 明宋儀望撰。千頃堂書目載華陽館文集十二卷，又詩集十四卷。此集皆其雜文，卷數亦相合。蓋猶儀望之原本。惟許宗魯、張獻翼諸人所作詩集序，皆附錄集末。未喻何故。或裝輯者誤歟。然重編之本，僅有詩五卷，則十四卷之本，久佚矣。又疑以諸序無所附麗，故綴之文集末也。

【太函集一百二十卷】安徽巡撫探進本 明汪道昆撰。道昆有五車、霏玉，已著錄。是編刻於萬曆辛卯。

凡文一百六卷，詩十四卷。卷首有自序及目錄六卷。道昆名在後五子中，最高自標置。因樹屋書影曰：廣陵陸弼記。嘉靖閒，汪伯玉以襄陽守遷臬副，丹陽姜寶以翰林出提學四川，道經楚省，三人會飲於黃鶴樓。伯玉舉杯大言曰：蜀人如蘇軾者，文章一字不通，當以劣等處之。衆皆睥睨云云。其狂誕殊甚。然文章實皆僞體。沈德符敝帚軒刺語云：王李初起，道昆尙未得與其列。後以張居正心膺驟貴，其副墨行世，暴得時名。世貞力引之。世遂稱元美、伯玉。汪文刻意摹古，時援古語以證今事，往往扞格不暢。其病大抵與

歷下同。世貞晚年甚不服之。嘗云：予心服江陵之功，而不敢言。以世曹所好也。無奈此二屏事何？云云。其論頗爲切中。德符又稱張居正父七十，世貞道昆俱有幃詞。世貞刻集中六七年，居正敗遂削去。道昆垂沒，自刻全集。在居正身後十年，而全載此文，不竄去一字。稍存雅道云云。今案封柱國少師張公七十壽序一首，見此集第十二卷中，則德符之言爲信。然以居正父爲衆父，父至比之於蒼蒼，之不言，究不可以爲訓也。

【副墨五卷】內府藏本

明汪道昆撰。是集刻於太函集之前。千頃堂書目載作二十四卷。此本五卷，殆非完帙。又載道昆尙有太函遺書二卷，今亦未見傳本。

【汪次公集十二卷】浙江汪汝璫家藏本

明汪道貫撰。道貫字仲淹，休寧人。道昆弟也。其名因道昆而著。故李維楨作序以汪世懋爲比。然道昆固不及世貞。道貫才力亦不及世懋也。

【江右詩藁二卷】浙江汪汝璫家藏本

明李先芳撰。先芳有讀書私記，已著錄。宋弼山左明詩鈔稱其有李氏山房詩錄，不著卷數。邢侗來禽館集有先芳行狀，稱所著東岱山房藁三十卷。此集總題爲東岱

山房詩錄，而子目則作江右詩藁。蓋其集中之一種。嘉靖戊申，知新喻縣時作也。嘉隆詩社先芳首倡，厥

後王李踵興，遂擯斥先芳，不與七子之列。繼以先芳憤激，乃收之廣五子中。于慎行稱其詩與李攀龍異

曲同工。邢侗亦稱歷下名愈高，濮陽苦爲所掩。然修戈恃繡，未嘗一日忘于鱗。今觀其詩，才力實出攀龍

下。慎行等以鄉曲情，均不欲分左右袒耳。明未攻七子者，遂欲以躋攀龍之上，非篤論也。

【李氏山房詩選六卷】江蘇周厚堉家藏本

明李先芳撰。此本乃皇甫汈所選，分體編次，亦間有評語。

蓋非其全集也。

卷一百七十八

集部三十一

別集類存目五

【北虞先生遺文八卷】安徽巡撫採進本。明邵圭潔撰。圭潔字伯如。一字茂齊。號北虞。常熟人。嘉靖己酉舉人。其詩妥適而乏警策。惟散文筆力頗縱宕。然史論諸篇。縱橫曼衍。已啓後來顧大韶等之風。是集爲其子兵部主事釐所編。分爲二帙。前一帙凡六卷。繕寫多脫誤。後一帙凡二卷。與前帙間有重複。豈編次未定之本歟。

【平山文集八卷詩集八卷】直隸總督採進本。明何濤撰。濤字仲平。江西廣昌人。嘉靖己酉舉人。據集中所言。蓋嘗官於安慶。不知爲安慶何官也。詩文皆率其所欲言。詩集第五卷有讀白集卒業一首。可以知其宗尙矣。

【子威集三十二卷】兩淮馬裕家藏本。明劉鳳撰。鳳有續吳中先賢贊。已著錄。其文皆僻字奧句。尤澀體之餽釘者。江左脛談。載劉侍御子威好爲詰屈聱牙之文。吳人推服之。無敢後。袁卜士景休字孟逸。每向人抉摘其字句鉤棘。文義紕繆者。以爲爛笑。子威聞之。怒訴於邑尉。攝而笞之。尉數之曰。若復敢爛笑。劉侍御文章耶。景休仰而對曰。民寧再受笞數十。終不能改口。杳舌妄諛。劉侍御也。是亦可資笑噓者矣。

【素園存藁十八卷】浙江巡撫採進本 明方宏靜撰。宏靜字定之，歙縣人。嘉靖庚戌進士。朱彝尊明詩綜載其官至南京戶部右侍郎。千頃堂書目亦同。江南通志則載其奉使入浙擊水寨寇，論功當敘中。語歸卒贈工部尚書。據集內山中藁小序稱自撫浙待命凡十載，自留京歸田經廿載，葉向高序亦云然。是宏靜實自南京罷歸。通志所記偶誤也。是集目錄祇十六卷，而書實十八卷。其目錄之次序前後參互，亦與卷內不合，皆校刊之疎漏。又千頃堂書目載是集作二十卷，殆初刻十六卷，後增至十八卷，又增至二十卷，而目則未改歟。

【雲山堂集六卷】浙江孫仰曾家藏本 明魏裳撰。裳字順甫，蒲圻人。嘉靖庚戌進士。官至濟南府知府。明史文苑傳附載王世貞傳中，是集前三卷皆詩，後三卷爲雜文。當嘉隆之際，李攀龍、王世貞方負盛名，而裳與南昌余曰德、德甫、銅梁張佳允、肖甫、新蔡張九一、助甫、實左右之。當時稱爲四甫，裳才地稍弱，尤爲墨守不變。集首佳允序，謂其文非左國兩司馬詩，非建安大歷，則不以寓目。此即其力持王李餘論之證。故世貞藝苑卮言亦稱其不失門宗云。

【大雅堂摘藁】無卷數 江西巡撫採進本 明況叔祺撰。叔祺有考古詞綜，已著錄。是集千頃堂書目不載。江西通志亦稱是時王李之學盛行，有後五子、廣五子等目，而不及叔祺。大雅堂集世亦罕有傳者。則明代已不行於世矣。此本題云摘藁，則尚非叔祺之全集。詩止近體，無古體。叔祺尤不應若是之陋。或選錄者不諳古體，惟取其所能解耶。

【居來山房集六十五卷】江蘇巡撫採進本 明張佳允撰。佳允字肖甫，銅梁人。初號嶺山，以其家在居

來兩山之間。更號居來山人。案居來一作嶠嶠。蓋字之別體。嘉靖庚戌進士。官至兵部尚書總督薊遼。事蹟具明史本傳。佳允爲郎時。與王世貞諸人相酬和。七子仕宦多不達。而佳允鎮雄邊。定大變。以功名始終。論者謂其詩文才氣縱橫。而頗乏深致。蓋雄心大略。不耐研思於字句間也。是集賦一卷。詩二十八卷。雜文三十五卷。末一卷附錄行狀墓誌。後又載同時諸人所作序記等文十一篇。

【天目山堂集二十卷附錄一卷】兩淮鹽政採進本。明徐中行撰。中行字子與。號龍灣。長興人。讀書天

目山下。故自稱天目山人。嘉靖庚戌進士。官至江西左布政使。明史文苑傳附見李攀龍傳中。中行爲後七子之一。王世貞藝苑卮言亟稱之。以爲左準右繩。靡所不合。胡應麟詩數。則惜其少深沈之致。陳子龍明詩選復有摹古太似之譏。是非恩怨。輾轉相爭。要之或褒或貶。各有所常。合而觀之。則中之定評出矣。雜文亦有意矯揉。頗失渾雅。蓋當時風尚。七子同一軌轍。非如是不能預壇坫也。

【青羅館詩六卷】兩江總督採進本。明徐中行撰。是集乃隆慶中其壻汪時元所刻。其守汝寧以後之詩。居三分之一。汰其古文。又汰其少作。較前集爲精簡。然中行於北地之學。漸染旣深。時元能刪其枝蔓。不能變其根柢也。

【余德甫集十四卷】江蘇周厚堦家藏本。明余曰德撰。曰德初名應舉。字德甫。南昌人。嘉靖庚戌進士。官至福建按察司副使。明史文苑傳附見王世貞傳中。與魏裳汪道昆張佳允張九一。所謂嘉靖後五子也。世貞稱其詩古近體無所不佳。近體獨超。近體五七言無所不超。七言獨妙。靜志居詩話。則謂其詩尙未見門戶。元美冠諸後五子之首。未免阿其所好。今觀是集。彝尊所論公矣。

【豐陽集十二卷】浙江巡撫採進本 明馮臯謨撰。臯謨字明卿，海鹽人。嘉靖庚戌進士，官至福建布政司參政。是集凡詩四卷，文八卷。臯謨在粵平大盜張璉，擊敗倭寇，皆有功。又創議立條鞭投櫃之法，至今稱便。其經濟頗可觀，而詩文則但有浮聲，殊乏切響。許聞造行狀，稱臯謨官刑部時，與梁有譽、宗臣、吳國倫、徐中行相善，切劘爲詩，故其趨向亦相近云。

【采薇集四卷、幽貞集二卷、邕歛集六卷】兩江總督採進本 明董傳策撰。傳策有奏疏輯略，已著錄。此三集乃傳策以嘉靖戊午遣戍，至隆慶丁卯召還，前後十年之詩也。采薇集爲四言樂府歌行絕句等體，幽貞集爲五言古體，邕歛集爲七言律體，詩多激烈，如其爲人。案千頃堂書目，采薇集作十四卷，幽貞集作十一卷，邕歛集作七卷，與此互異。明人集多隨作隨刊，卷帙無定，未知爲此本不完，或黃虞稷誤載。又有廓然子藁二卷、蘧廬藁七卷，此本不載，殆偶佚矣。

【甌瓚洞藁五十四卷、續藁二十七卷】山東巡撫採進本 明吳國倫撰。國倫有陳張本末略，已著錄。初國倫爲兵科給事中，時以倡衆賻楊繼盛，忤嚴嵩左遷。世稱其義。在後七子中，最爲老壽。初與王世貞、李攀龍唱和，後與李維禎、汪道昆輩狎主詩盟。其著述頗富，然在當時，胡元瑞作詩數，已譏其用句多同一篇而外，不耐多讀。國朝朱彝尊靜志居詩話，亦謂王李旣沒，甌瓚幾與四部爭富，而海內之爲真詩者寡。則文章不逮其行誼矣。此甌瓚洞藁，國倫所手定，續藁則其子士良所校刊。明史藝文志，此二集外，又載其詩藁十五卷，今未之見，意其散佚歟。

【蘇山集二十卷】兩淮鹽政採進本 明陳柏撰。柏字子堅，一字憲卿，沔陽人。嘉靖庚戌進士，官至井陘。

兵備副使。是集凡詩十卷。文十卷。詩頗宕逸有姿。而失於薄弱。文又不及其詩。千頃堂書目。別載柏見南山集八卷。不載此集。殆偶未見歟。

【蘇山選集七卷】浙江巡撫探進本。明陳柏撰。是集爲莆田黃謙所選定。凡詩四卷。文三卷。千頃堂書目作五卷。傳寫誤也。

【小漁遺藁十二卷】浙江巡撫探進本。明唐汝楫撰。汝楫字思濟。蘭谿人。吏部尙書龍之子。龍號漁石。故汝楫自號小漁。嘉靖庚戌進士。第一官。至左春坊左諭德。事蹟附見明史龍傳。史稱龍與嚴嵩相善。汝楫又以素附嵩得第一人。及第後坐嵩黨奪官。則其人不足重。其文章亦不爲世所稱。是集爲萬歷乙卯蘭谿知縣莊起元所編。皆應俗之文。起元稱其著作甚夥。散佚不傳。僅從其孫宗本曾孫明照索得殘藁。就而編次云。

【春明彙十四卷】浙江汪汝璫家藏本。明徐學謨撰。學謨有春秋億。已著錄。是編皆其以尙書召起再入都時所作。故以春明爲名。凡文編十卷。詩編三卷。續編一卷。文編末四卷爲齊語。皆所著雜說。千頃堂書目作八卷。蓋除齊語計之也。其論詩一條云。近來作者綴成數十豔語。如黃金白雪紫氣中原。居庸碣石之類。不顧本題應否。強以竄入。專愚聾瞽。自以爲前無古人。小兒效顰。引爲同調。南北傳染。終作癘風。詩道幾絕。其語蓋爲王李而發。學謨與王世貞里閭相近。而立論如此。頗不爲習俗所染。然詩多懦響。終不能副所言也。

【徐氏海隅集四十卷】浙江孫仰曾家藏本。明徐學謨撰。明史藝文志載學謨文集四十三卷。千頃堂

書目亦載學謨海隅集四十三卷。此本僅四十卷。前無序目。蓋姦黠書賈以殘闕之本。割去序目。冒爲完書也。開卷卽列寶殿玉芝諸頌。蓋當時風氣類然。至其書易名始末一篇。與世傳學謨初名學詩。以其時有上虞徐學詩疏劾嚴嵩懼以同名罹禍。故改名學謨者。說又不同。蓋莫得而詳焉。

【歸有園臺二十九卷】江蘇巡撫採進本

明徐學謨撰。是集文二十二卷。詩七卷。乃其歸田後所作。學謨嘗謂昔人有云。近世士大夫以官爲家。罷則無所於歸。故自早歲罷荊州守。卽構一園。名曰歸有。因以

名其詩文。中多酬應之筆。其雜著中塵諧鏡戒二卷。尤未免失之於俚。

【畱餘堂集四卷】浙江巡撫採進本

明潘季馴撰。季馴平生功業。著於治河。所作河防一覽。已著錄。是集詩一卷。文三卷。皆不見所長。千頃室書目作五卷。或尙佚一卷歟。

【李溫陵集二十卷】江蘇周厚墳家藏本

明李贄撰。贄有九正易因。已著錄。是集一卷。至十三卷爲答書雜述。卽焚書也。十四卷至十七卷爲讀史。卽摘錄藏書史論也。十八十九二卷爲道原錄。卽說書也。第

二十卷。則以所爲之詩終焉。前有自序。蓋因刻說書。而併摘焚書藏書。合爲此集也。贄非聖無法。取爲異

論。雖以妖言逮治。懼而自剄。而焦竑等盛相推重。頗熒衆聽。遂使鄉塾陋儒。翕然尊信。至今爲人心風俗

之害。故其人可誅。其書可燬。而仍存其目。以明正其爲名教之罪人。誣民之邪說。庶無識之士。不至怵於

虛名。而受其簧鼓。是亦彰瘡之義也。

【周禹川集五卷】直隸總督採進本

明周大章撰。大章字章之。號禹川。吳江人。嘉靖壬子舉人。官至瑞安縣知縣。是編爲文藝集二卷。皆所作雜文。禦倭武略三卷。前二卷載防倭方略。後一卷附錄投贈詩文。

嘉靖中江以南屢被倭寇。大章以書生佐守吏調兵食。所至克捷。鄉里實受其利。然生平本不以文章名。其禦倭武略中多載公移笏付之類。尤爲叢雜。

【羽王先生集略】無卷數。兩江總督採進本。明張鳴鳳撰。鳴鳳有桂故。已著錄。是集爲僧超撥所刻。

超撥即鳴鳳之孫也。自稱家遺鐫集七種。值兵火幸存。因從全臺內錄其十分之二。付之剞劂。然桂故等三書亦在其內。惟詩文集及漕書八論。世無別行之本。而超撥刪削無識。往往去其菁華。奪其蕭艾。已非復鳴鳳之舊矣。

【子相文選五卷】江西巡撫採進本。明宗臣撰。臣有宗子相集。已著錄。是編止詩一卷。文四卷。爲鄭二陽所選評。姜承宗姜纘宗所編輯。於集外別行者也。

【九愚山房詩集十二卷】山西巡撫採進本。明何東序撰。東序字崇教。號肖山。猗氏人。嘉靖癸丑進士。官至右僉都御史。巡撫延綏。其詩未能入格。而尤喜作古樂府。凡郭茂倩樂府詩集古題。擬之幾遍。甚至郊廟樂章。亦仿爲之。然唐人已不能擬漢魏。而東序欲爲唐人所不能。不亦難乎。

【惺堂文集十四卷】江西巡撫採進本。明史桂芳撰。桂芳字景實。號惺堂。鄱陽人。嘉靖癸丑進士。官至

兩浙鹽運使。桂芳與羅汝芳耿定向講學。其語錄稱誦陳獻章。未分無極源頭。在誰畫。先天樣子來。碧玉樓中閒隱几。十千川繞又山迴之句。謂數十年不似今夕了悟。其宗旨可見。而文章頗朴實。不爲虛渺之談。集末附書經補說三卷。多與先儒立異。其謂周武王無封箕子事。說亦甚辯然。史傳炳然。古無異論。安可懸斷其誣也。

【曹太史含齋集十六卷】浙江孫仰曾家藏本。明曹大章撰。大章字一呈，號含齋，金壇人。嘉靖癸丑進士，官翰林院編修，以廢疾罷。是集凡文十三卷，詩三卷，多慶祝哀輓之篇，應試策論亦悉載焉。

【姜鳳阿文集二十八卷】江西巡撫採進本。

明姜寶撰。寶有周易傳義補疑，已著錄。是集分十彙，初彙

一卷，中祕彙一卷，讀禮彙一卷，史館彙三卷，西川彙二卷，周南彙二卷，八閩彙二卷，銀臺彙二卷，南雍彙二卷，家居彙十一卷，留部彙十一卷。寶少從學於唐順之，其行文步驟開闔，頗得力於師說，而學力根柢不及順之之深厚，故論明代之文者不及焉。王世貞序謂宏正而後士大夫禰檀左而曩先秦，及其流弊而爲似龍，出之無所自，施之無所當，六季之習巧者猴棘，端侈者繡土木，而極推寶之學，爲能深造自得。蓋世貞晚年亦深厭字剽句竊之病，而折服於歸有光諸人，故其說如此也。

【虛籟集十四卷】湖南巡撫採進本。

明劉堯誨撰。堯誨號凝齋，臨武人。嘉靖癸丑進士，官至南京兵部

尚書。是集爲其六世孫心忠所編，凡文九卷，詩五卷，詞三首，偈四首，共爲一卷。其論性論格物，頗拾姚江緒餘。書啓序記中皆贈答應酬之作，標題多稱父母郡祖都臺乃堂之類，亦頗嫌太質。

【綠波樓詩集十四卷】河南巡撫採進本。

明張九一撰。九一字助甫，號周田，新蔡人。嘉靖癸丑進士，官

至右僉都御史，巡撫寧夏。明史文苑傳附見。王世貞傳中世貞詩亦謂吾黨有三甫，蓋余曰德字德甫，張佳允字肖甫，與九一字助甫，爲三甫也。案此與四甫之說不同，蓋作詩之時，魏裳猶未入社也。論者謂其詩高華雄爽，振宕不羈，於七子齊盟風氣雷同之時，自稱拔俗。然今觀其集，實未能於七子之外，別開門徑。蓋九一服膺王世貞，曾因世貞父忤故觸忤嚴嵩，遭遷謫而不悔，即其生平規橛可知矣。九一官湖廣

參議時嘗構綠波樓後遂以名其集舊版已燬此本國朝康熙中新蔡知縣呂民服所重鐫也

【學孔精言舍彙纂十二卷】兩江總督採進本 明孫應鼈撰應鼈有淮海易談已著錄明史藝文志載

應鼈彙纂十六卷此本十二卷前有萬歷己卯劉伯燮序言集首奏疏終於古風絕律今第十二卷止於五言律詩而絕句七言律詩皆闕知非足本矣

【百可亭摘彙九卷】浙江巡撫採進本 明龐尙鵬撰尙鵬字少南南海人嘉靖癸丑進士官至副都御

史巡撫福建天啓初追諡惠敏事蹟具明史本傳是集奏疏四卷雜文三卷詩二卷凡分三編千頃堂書目作三卷蓋僅據其雜文一種也詩文皆朴實惟奏議頗爲明暢其與張居正小簡尤切直居正復書附焉蓋論萬歷四年九月居正奪情事也史稱居正深銜之嗾吏科給事中陳三謨以給由歲月有誤劾之遂罷去家居四年而卒云

【石泉山房集十卷】江西巡撫採進本 明郭汝霖撰汝霖字時望號一厓永豐人嘉靖癸丑進士官至

南京太常寺卿汝霖從鄒守益歐陽德諸人講學故其議論與羅汝芳一派相近古詩頗規模陳子昂李白諸人得其形似近體則又次焉

【李子田文集四卷】兩江總督採進本 明李菱撰菱有黃谷瑣談已著錄所選宋元藝圃集頗有別裁

而文章沿歷城太倉之派未能自闢門庭其持論務合儒釋爲一遂併孟子而非之如曰孟子非排告子也排告子而自異於孔氏諸聖人也諸儒非尊孟氏也尊孟氏而自別於孔氏諸聖人也可云大繆

【近溪子文集五卷】江蘇巡撫採進本 明羅汝芳撰汝芳有孝經宗旨已著錄其學出於顏均承姚江

之末流而極於泛濫。故其說放誕自如。敢爲高論。著述最易成編。多至四五十種。即其集亦非一刻。有近溪子集。其門人杜應奎編。有近溪子全集。其孫懷祖刊。有批點近溪子集。耿定向所編。有批點近溪子續集。楊起元所編。有明德公文集。近溪先生詩集。近溪子附集。近溪子外編。有從姑山集。續集。竝其孫懷智所編。有明德詩集。其門人左宗郢刊。今多散佚。此集則其曾孫萬先所刊也。

【愧非集十四卷】山東巡撫採進本

明馬攀龍撰。攀龍字冲霄。號愧非子。陽信人。嘉靖乙卯舉人。官禮

部主事。是編凡談略四卷。乾坤逆旅集一卷。漫藁一卷。遊涉藁一卷。遊林藁一卷。邯鄲學步集四卷。忙忙亭藁二卷。明詩統。稱其博學雄才。著述甚富。惜年不稱壽。今以集考之。攀龍爲學官時。有院試詩云。五老文學低頭竊。自羞自註云。余赴試許州。自傷老大。猶滯學博云云。其後遷邯鄲令。轉京邑。入爲主事。有早春入朝詩句云。書生慶際遇。白首得爲郎。又長安除夕。有爲客已三載。壯志灰頽齡等句。則年不稱壽之說非也。談略所引。多小說俚語。詩用洪武正韻。又與詩餘雜編亦乖體例。

【震堂集六卷】江蘇巡撫採進本

明王養端撰。養端字茂成。遂昌人。嘉靖乙卯舉人。是集爲其鄉人何

鏗所刪定。而遂昌知縣池明刻之。其時王李竝馳海內。響應故。養端所作。亦沿二家之波。大都一字一句。必似古人。而意趣則罕所自得。冠以擬古樂府一卷。望其標目古色斑然。核其文章。乃多無取。如李延年歌。漢武帝李夫人歌。皆偶爾神來。遂成絕調。即作者亦不能再爲。而皆衍爲長篇。味如嚼蠟。焦仲卿妻詩。木蘭詩。正以委曲瑣屑入妙。而縮爲數句。又似斷鶴。至於樂府諸篇。古詞僅在。如曰。摹其音節。則無詔伶人事。謝絲管。劉纓言之矣。非夔非曠。誰能於千百年後。得其律呂。如曰。闡其意義。則標名旣每難詳。詞句

尤多譌闕。吳兢所解已多在影響之間。今安得知其本旨。鈞竿朱鷺之類。尚可緣題成文。至東光翁離諸篇。題既不明。詞又不解。一概描摹不已。實不知何所見而云然矣。

【潛學臺十二卷】浙江巡撫採進本 明鄧元錫撰。元錫有三禮釋。已著錄。此其所作雜文及語錄也。其

語錄力關心學。在當時尙爲篤實文章。則頗爲朴儉。未足擅長。

【耿天臺文集二十卷】湖北巡撫採進本 明耿定向撰。定向有碩輔寶鑑要覽。已著錄。是集爲其門人

劉元卿所編。凡詩賦一卷。雜文十九卷。末一卷爲時藝。蓋用宋文鑑收張才叔經義例也。定向之學。歸宿在王守仁。故集中第十三卷。以薛瑄諸人爲列傳。而以守仁爲世家。此蓋陰用史記孔子世家之例。不但以守仁封新建伯也。黃宗羲明儒學案。列之泰州王良派下。摘其與張居正論趙用賢吳中行等書。以爲雖欲少殺其禍。亦近於誦六藝以文姦言。又摘其劾御史王藩臣疏。以爲鉗制言官。考與居正書在第六卷中。核其詞意。蓋求寬言者之罰。不得不先解居正之怒。求解其怒。不得不先順其意。而使之喜。於是借伊尹之任。以獻諛頌。遂爲天下口實。案明史定向本傳。稱居正奪情。定向貽書友人。譽爲伊尹。而貶言者。時譏嘗之。蓋偶未檢此集。誤以與居正爲與友人。謹附識於此。糾王藩臣疏。今在第二卷中。大旨愠藩臣刻巡撫周繼。未以揭帖送都御史。使藩臣所劾不實。定向糾其妄奏可也。乃因遺誤送揭。閱一月之後。始糾其不實。此爭私憤。非爭公論矣。願允成作客問。以詰定向。定向不能答。厥有由歟。大抵定向之學。兼講作用。觀其全集。大略可知。宗羲所論。雖責備賢者之言。要不可謂之無因。

【濟美堂集八卷】福建巡撫採進本 明吳文華撰。文華有粵西疏稟。已著錄。是集凡詩文四卷。頗沿臺

閣舊體前四卷即粵西奏議及畱都奏議其初別本各行後又編入集中也

【屏居集八卷浪游集六卷耕餘集八卷】江蘇巡撫探進本 明姚汝循撰汝循字鉞卿江寧人嘉靖丙

辰進士官至大名府知府終於嘉州知州汝循自大名罷官歸田著屏居集及嘉州罷後歷遊燕趙楚蜀閒著浪遊集晚年退耕秦淮著耕餘集王穉登序其耕餘集謂其冲若陶韋然陶韋不在其貌也

【濟美堂集六卷】浙江巡撫探進本 明陳瓚撰案世宗時有兩陳瓚其一獻縣人嘉靖丁未進士官至

南京吏部尚書即嘗爲楊繼盛奏請卹典者此陳瓚字廷祿常熟人嘉靖丙辰進士官至刑部左侍郎諡莊靖事蹟附見明史魏時亮傳是編首列疏一卷詞頗伉直餘多酬應之文六卷之末附詩二十八首詞一首亦非所長

【蘭暉堂集四卷】浙江汪汝璫家藏本 明屠應峻撰應峻字文升刑部尚書勳之子嘉靖丙辰進士官

至左春坊左諭德明史文苑傳附載王慎中傳中應峻爲文善比事屬辭詩法汎濫諸家時有獨造一時名出其父右然牽於華藻蘊蓄未深是編凡詩二卷文二卷與其父集本別行後其曾孫繩德等又取勳所著太和堂集與是集合刻名曰屠氏家藏二集云

【怡雲堂集十卷】江西巡撫探進本 明蔡國珍撰國珍字汝聘奉新人嘉靖丙辰進士官至吏部尚書

諡恭靖事蹟具明史本傳是集乃其從曾孫尙才所編凡詩四卷文六卷詩皆近體尙才序謂從敗篋中得其歸田後所作詩一帙以類編次蓋非全藁也卷四後附其子若孫之詩卷五卷六乃國珍所作奏疏序記諸文又卷七卷八附以敕命墓表及壽文祭文卷九又爲國珍所作書啓小詞卷十又附刻他人書

啓編次殊爲無緒。且詩實四卷。而序云二卷。尤爲不檢矣。

【心泉集二十五卷】浙江孫仰曾家藏本。明何源撰。源字仲深。號心泉。江西廣昌人。嘉靖己未進士。官

至刑部左侍郎。謚靖惠。源官吏部文選司主事時。張居正以親故託之。拒弗應。緣是引疾歸。及爲南京吏部侍郎。京察黜陟公允。爲海瑞所稱。以爲士人致身報主當如是。後卒於官。貧幾不能殮。蓋亦氣節自負者。是集爲其子孔賢孔賓所編。凡文二十二卷。詩賦歌詞三卷。大抵非公牘。即應酬之作。然源之足以不朽者。固不在此也。

【張濟東集十四卷】河南巡撫採進本。明張鹵撰。鹵字召和。號濟東。儀封人。嘉靖己未進士。官至右副

都御史。巡撫保定。以忤張居正。馮保。左遷南京太常寺卿。旋乞休歸。終於家。是集凡詩六卷。文八卷。初刻於天啓五年。爲其子永忠及門人王安仁所訂定。版久燬。此本爲其後人重刊。其中如慶成宴代巡贈別諸作。本五言長律。而雜之古體中。題鹿鳴宴圖。本七言古詩。而列之詞內。編次頗爲舛誤。且考鹵在諫垣時。陳奏頗爲侃直。其後三領節鉞。能殲叛卒。修邊備。與中朝權貴相抗。多有政績可紀。而集中章疏。乃無一篇。意者尙別有奏議。自爲一集乎。

【華陽洞稟二十一卷】兩江總督採進本。明張祥鶯撰。祥鶯字道卿。別號虛齋。金壇人。嘉靖己未進士。

官至雲南府知府。是編文十三卷。詩九卷。祥鶯多與嘉靖七子相往還。而詩能不涉其窠臼。然所造則尙未深也。

【王奉常集六十九卷】江蘇周厚埴家藏本。明王世懋撰。世懋有卻金傳。已著錄。是集賦詩詞十五卷。

文五十四卷。第五十二卷曰澹思子。第五十三卷曰藝圃擷餘。第五十四卷曰經子臆解易爻解。皆所作雜說筆記。附編集內者也。世懋名亞於其兄世貞。而澹於聲氣。持論較世貞爲謹嚴。厥後藝苑卮言爲世口實。而藝圃擷餘論者乃無異議。高明沈潛之別也。但天姿學力。皆不及世貞。故所作未能相抗耳。朱彝尊靜志居詩話云。敬美才雖不逮哲昆。習氣猶未陷溺。斯持平之論也。

【關洛記游藁二卷】兩淮鹽政採進本。明王世懋撰。是集乃萬曆辛巳。世懋官陝西提學副使。旋以曇

陽子事。爲臺諫所彈。乃移疾自洛陽東歸時作。上卷游記三篇。下卷詩七十七首。屠隆爲之序。亦全作二氏支離語。蓋一時士大夫習氣如斯也。

【賜閒堂集四十卷】兩淮鹽政採進本。明申時行撰。時行有書經講義會編。已著錄。是集賦詩共六卷。文及雜著共三十四卷。其相業無咎無譽。詩文亦如其爲人。

【王文肅集五十二卷附錄二卷】檢討蕭芝家藏本。明王錫爵撰。錫爵有王文肅奏草。已著錄。是集爲其孫時敏所編。凡雜文十二卷。書十八卷。奏疏二十二卷。附載榮哀錄一卷。誌狀碑傳一卷。前有申時行序。然時行乃序其奏疏。非序其全集。時敏刊刻之時。取以冠編耳。時敏跋稱彙集文藁。不能十之五六。詩藁經年廣搜。未能成帙。又稱入閣以後。參軍代筆。奉有先命。不敢混入云。

【觀我堂摘藁十一卷】安徽巡撫採進本。明李材撰。材有李見羅書。已著錄。其學出於姚江。而稍變其說。遂開止修一派。與良知一派竝傳。然制行頗率。意自恣。官巡撫時。毀參將署爲書院。致激兵變。後雲南巡按御史劾其破蠻冒功。逮問坐繫十餘年。謫戍福建。乃仍用巡撫儀。從以往。爲當時所怪。黃宗羲明儒

學案謂其以師道自任。不因患難而改。不知者謂其不忘開府門面。則失之。然師道尊嚴。豈在鼓吹張蓋。宗義以姚江一派門戶相同。從而爲之曲說耳。是集凡大學古本義一卷。書問十卷。雜著一卷。皆其講學之文也。

【敬和堂集八卷】浙江巡撫探進本 明許孚遠撰。孚遠字孟中。德清人。嘉靖壬戌進士。官至兵部左侍

郎。事蹟具明史儒林傳。孚遠之學。雖出於唐樞。然史稱其篤信良知。而惡夫援良知以入佛者。故與羅汝芳楊起元周汝登斷斷相爭。在姚江末派之中。最爲篤實。馮從吾劉宗周丁元薦傳其所學。皆能有所樹立。是集前有葉向高序。蓋萬歷甲午。孚遠爲福建巡撫時所刊。每卷之首。尙空其次第未鐫。以版心號數計之。凡序一卷。記一卷。雜著一卷。書一卷。疏二卷。公移二卷云。

【衛陽集十四卷】直隸總督探進本 明周世選撰。世選字文賢。故城人。嘉靖壬戌進士。官至南京兵部

尙書。是集以衛陽爲名。蓋故城在衛河之陽。世選以自號。因以名集也。世選以風節著。文章非所畱意。然集中章奏。如諫穆宗馳馬於禁掖。神宗講武於宮中。皆不知明之積弱。由於朝廷之宴安。朝廷之宴安。由於諸帝之不知兵事。持論殊爲迂闊。又姚希孟序。謂大學士高拱搆禍。華亭將引世選劾指臂。弗應。遂被逐去。復引其祭拱文中。隱顯參商語。以證之。然世選出拱之門。不受指喉。具見特立之操。乃拱既卒。而必特彰其事於祭文。是又不如置之不辨之爲厚矣。

【海亭集四卷】福建巡撫探進本 明鄭普撰。普字汝德。海亭其號也。南安人。嘉靖壬戌進士。官至雲南府知府。是集文三卷。皆應酬之作。詩一卷。僅二十餘首。亦殊寥寥。據王慎中所作墓誌。謂普精於經學。觀

集中復林次崖二書亦憑虛理斷之學非元元本本之學也。

【覆甌草六卷】浙江汪汝琛家藏本

明林煒撰煒字貞耀閩縣人嘉靖壬戌進士官至南京工部尚書

事蹟附見明史林瀚傳集首有王穉登序言煒官未踰藩鎮既告歸幾二十年乃以薦爲太僕俄復請歸與史不合蓋史舉其所終之官穉登所稱則其刻集時官也穉登序極論七子末流之弊而獨稱煒詩爲有道之言然是集爲胡應麟所編應麟故依附七子者集中所錄大抵舊調居多新意殊少仍七子之支派而已。

【逍遙園集二十卷】江蘇周厚堦家藏本

明穆文熙撰文熙有七雄策纂已著錄是集爲南師仲所編

凡詩十卷文十卷明史藝文志作逍遙園集十卷疑刊本誤脫二字也。

【處實堂集八卷】江蘇周厚堦家藏本

明張鳳翼撰鳳翼有夢占類考已著錄是編詩四卷文三卷末

一卷曰談輅則其筆記也鳳翼才氣亞於其弟獻翼故不似獻翼之狂誕而詞采亦復少遜生平好填詞集中多論傳奇之語千頃堂書目載鳳翼處實堂前集十二卷後集六卷與此本皆不符未喻其故。

【文起堂集十卷】兩淮馬裕家藏本

明張獻翼撰獻翼有讀易紀聞已著錄是集凡賦一卷詩六卷雜

文三卷其詩文多參以俳偶蓋獻翼雖頗與李攀龍筆札往還而與皇甫涪尤契故學其含咀魏晉而未

能成家云。

【紈綺集一卷】安徽巡撫採進本

明張獻翼撰乃自錄其早歲所作於文起堂集外別行者也。

【狎鷗子摘藁一卷】江蘇巡撫採進本

明吳崇節撰崇節有古史要評已著錄此其爲武岡知縣罷歸

後所爲文也。前有狎鷗亭賦及霞塘八景絕句。後則雜文寥寥。僅十數篇。皆詞意淺薄。中有悟蘧生傳。詳其詞意。乃崇節自謂。而其狎鷗亭賦。又自稱豫石子。隨地易號。殆仿元結之例歟。

【魯望集十二卷】兩淮馬裕家藏本。明袁尊尼撰。尊尼字魯望。吳縣人。僉事泰之子。嘉靖乙丑進士。官至山東提學副使。是集純爲七子之體。故王世貞序極稱之。

【天池草二十六卷】編修吳典家藏本。明王宏誨撰。宏誨字紹傳。瓊州安定人。嘉靖乙丑進士。官至南京禮部尙書。宏誨初釋褐時。值海瑞廷杖下詔獄。力調護之。張居正當國。又嘗作火樹篇。春雪歌。以諷。爲居正所銜。蓋亦介特之士也。是集文二十卷。詩六卷。集首載諭祭文及本傳。猶古人附錄之例。又載其三世誥命。已爲破格。至以萬歷己丑宏誨爲會試副總裁。遂并載是科題名錄。則從來編別集者。無此變體矣。

【謝山存藁十卷】江蘇巡撫採進本。明陳吾德撰。吾德字有齋。廣東新會人。嘉靖乙丑進士。官至浙江

按察司僉事。吾德傳陳獻章之學。居官忤張居正。屢遭貶謫。其氣節亦錚錚者。詩文則直述胸臆而已。

【震川文集初本三十二卷】安徽巡撫採進本。明歸有光撰。有光有易經淵旨。已著錄。是編爲其子子

祐子寧所輯。前有萬歷三年周詩序。所謂崑山本者是也。其中漏略尙多。故其曾孫莊又哀輯爲四十卷。而有光之文始全。相傳子寧改竄父書。有光見夢於賈人童姓。其事雖不足信。而字句之譌舛。誠有如莊所指摘者。未載行述一篇。子祐所作。又序略一篇。子寧所作也。

【二酉園詩集十二卷文集十四卷續集二十三卷】湖北巡撫採進本。明陳文燭撰。文燭字玉叔。沔陽

人嘉靖乙丑進士官至南京大理寺卿其詩分八集曰漢陰詩曰廷中詩曰淮上詩曰嵩和詩曰西蜀詩曰東岱詩曰金焦詩曰黃蓬詩陳思育王喬桂皇甫袁福徵黃貫曾沈明臣李先芳孫斯億任瀚高啓愚熊敦朴陳宗虞曾可耕吳國倫方沈黃一正李維楨屠隆周光鎬十九人序之文曰五岳山人前集五岳山人後集王世貞歸有光汪道昆茅坤序之後總編爲二西園文集道昆世貞又序之續集則文燭身後其孫之邁所輯皆文無詩亦無當時名士序惟之邁自序之又與文燭之壻龍膺各爲一跋而已斯亦生死之際交遊盛衰之驗而文壇標榜其不足盡據可知矣

【楊端潔集】無卷數 江西巡撫採進本 明楊時喬撰時喬有周易古今文全書已著錄是集爲其子

聖踐所編江右之學惟時喬一本程朱故集中大學周易諸序及孔朱二像碑皆力關心學之誤云

【洪洲類彙四卷】浙江汪啓淑家藏本 明王圻撰圻有東吳水利考已著錄是集凡詩一卷文三卷乃

其提學湖廣時所自編其孫謨又爲重刻圻所著述如續文獻通考三才圖會稗史類編諸書皆篇帙浩繁動至一二百卷雖龐雜割裂利鈍互陳其採輯編排用力亦云勤篤計其平日殆無時不考古研今其於詩文殆以餘事視之故寥寥如此存而不論可矣

【寶善堂彙二卷】兩淮鹽政採進本 舊本題慶成王宗川撰不著其名考明史晉王櫛第四子濟炫封

慶成王其子孫襲封者無宗川之名集中孔天允序稱王纂世十葉趙訥跋亦云王祖考安穆王以世次推之宗川蓋即榮懿王慎鍾之號穆文熙詩話稱榮懿王以賢孝稱器質敦厚詩亦有體裁足相證也然明詩綜載有慎鍾夏日登萬佛樓次朱使君韻詩一首而此集中不載則又未詳其故矣

【山居集八卷】浙江范懋柱家天一閣藏本 明栗應宏撰。應宏字道甫。長子人。嘉靖中舉人。屢試不第。

耕讀太行山中。祥符高叔嗣謝病歸。應宏往與訂交。叔嗣作紫園山人歌贈之。是集即叔嗣所序也。集中惟五言近體。頗有隱秀之致。餘體則自鄙無譏。千頃堂書目載是集作六卷。疑字之誤。又載有太行集十六卷。今未見傳本。

【吾野漫筆十二卷】浙江巡撫採進本 明許炯撰。炯字吾野。新會人。嘉靖中舉人。是集凡文七卷。詩六

卷。前有自序。謂少時不慧。從羣兒騎竹馬。黏蜻蜓捕鳥雀爲戲。未幾病疴。忽劇夢一父老。出袖中書授之。俄墜而覺。自是遂能把筆作詩。其一卷首篇述戒。稱有通元先生過而誨之。云云。蓋才高而無所師法者。故其漫書各篇內。謂范仲淹揚雄之流也。胥於僭矣。蘇洵荀卿之流也。隣於詐矣。又謂蘇洵辨姦。訾王安石也。吾以爲洵亦安石之徒。云云。皆率意一往。不復絜以規矧者也。

【俞仲蔚集二十四卷】浙江汪汝璫家藏本 明俞允文撰。允文初名允執。仲蔚其字也。崑山人。嘉靖中

諸生。年四十即棄去舉子業。一意爲詩。明史文苑傳附載王穉登傳中。允文與王世貞善。故與盧柟李先芳吳維岳區大任世貞。目爲廣五子。然允文論詩。乃深不滿李攀龍。特才地差弱。終不能與之抗衡耳。大抵廣五子中。柟最挺出。大任次之。先芳維岳及允文。又其次也。

【天隱子遺藁十七卷】浙江巡撫採進本 明嚴果撰。果字毅之。震澤人。嘉靖時布衣。是集詩七卷。文十

卷。首有王思任序。云弇州盱衡海內才子。俱上贊賞。所不能致者。會稽徐文長。臨川湯若士。其鄉則嚴毅之。可謂卓然自立之士。然其詩文。則尚非徐渭湯顯祖匹也。

【汪山人集十八卷】浙江孫仰曾家藏本。明汪少廉撰。少廉字古矜。休寧人。嘉靖中布衣。其集第一卷爲賦。二卷至十六卷爲詩。末二卷爲雜文。詩於分體中又各分類。名目繁細。每類中又註編年於其下。叢碎彌甚。所作音節高亢。而神理不具。往往失之蹈襲。其邊憤一詩。朱彝尊明詩綜獨取之。然究不出少陵諸將蹊徑也。

【大鄆山人集五十三卷】安徽巡撫探進本。明吳子玉撰。子玉字瑞穀。休寧人。嘉靖中貢生。其文規撫李攀龍。集中分體二十。皆以某部爲題。其敘事志略說譜等目。竝出臆造。

【何翰林集二十一卷】兩淮鹽政探進本。明何良俊撰。良俊有四友齋叢說。已著錄。是集乃其詩文雜著。竝語林之小序亦載焉。朱彝尊明詩綜載其有清森閣集。千頃堂書目載良俊清森閣集無卷數。又載其柘湖集二十八卷。據集首莫如忠序。稱是集二十八卷。蓋即所謂柘湖集者。此本僅二十二卷。目錄亦復殘闕。則已非完書矣。良俊在當時頗有文名。所作縱橫跌宕。亦時有六朝遺意。而落筆微傷太快。殆亦才人輕脫之習歟。

【芸暉館稟十四卷】浙江巡撫探進本。明茅翁積撰。翁積字穉延。歸安人。副使坤之子也。豪蕩不羈。以任俠自負。故所作多文酒讌會之詞。是集凡詩十卷。文二卷。樂府二卷。而以行狀墓誌銘小傳附其後。

【兔園草六卷】江蘇巡撫探進本。明曹乾學撰。乾學字叔驥。太倉人。與王世貞爲婣家。又與趙宦光輩友善。故集中多遊覽酬贈之作。其詩不盡落婁東窠臼。然邊幅窘束。則才地限之也。

【黃說仲詩草十八卷】浙江孫仰曾家藏本。明黃惟楫撰。惟楫字說仲。天台人。其詩多與王世貞區大

任等唱酬之作。蓋亦沿七子之流波者。

【被褐先生稟十七卷】江蘇巡撫探進本 明華善述撰。善述字仲達。無錫人。是集惟末一卷爲雜文。餘卷皆詩也。王世貞爲作序云。其詩或并比興而忘之。大概不可爲典要。是深不滿之矣。

【童子鳴集六卷】浙江汪汝璫家藏本 明童佩撰。佩字子鳴。龍游人。世爲書賈。佩獨以詩文遊公卿間。嘗受業於歸有光。其歿也。王世貞爲作傳。王穉登爲作墓誌。蓋亦宋陳起之流也。詩格清越。不失古音。而時有累句。如讀李博士集。繞屋梅花然句。蓋用沈約詩。山櫻紅欲然語。以之品梅。殊不類。又如觀魏知古告身歌。高齋試展竹滿牆句。上四字下三字。邈不相貫。他如囊琴挾水流。客鬢帶山蒼之類。皆失之纖巧。公牘無盈案。私錢不入囊之類。皆失之拙俚。川原呈伎倆之類。尤失之儂佻。舊序稱其閉戶屬草。必屢易而後出。出則使人彈射其疵。往往未愜。併其稟削之。不留一字。殊不盡然也。

【松韻堂集十二卷】浙江孫仰曾家藏本 明孫七政撰。七政字齊之。常熟人。與王世貞諸人遊。故詩亦類七子之體。而字句時傷於笨滯。

【王世周集二十卷】江蘇巡撫探進本 明王伯稠撰。伯稠字世周。崑山人。是集卷首有王世貞兄弟序。頗相推許。然考其所作。似過於標榜。

【壯遊編三卷】浙江巡撫探進本 明王叔承撰。叔承初名光允。以字行。更字承父。晚更字子幻。自號崑崙山人。吳江人。明史文苑傳附載。王穉登傳中。叔承早棄舉子業。縱遊齊魯燕趙。又入閩入楚。其在鄴下。鄭若庸薦之趙康王。叔承以王無下士實意。賦詩以行。有壯心欲別逢知己。羞向侯門待晚餐之句。又客

大學士李春芳家亦以使酒偃蹇謝去。史稱其與王錫爵爲布衣交。錫爵再召時有建三王竝封議者。叔承遺書數千言。謂當引大義以去就爭。不當依違兩端。負主恩辜物望。蓋其氣節懷抱亦非當時山人墨客以詩句爲市者比。最後從顧養謙於塞上。無所成就而歸。乃不復出。此集即其初入都時作也。

【吳越游八卷】浙江孫仰曾家藏本。明王叔承撰。是集前六卷爲詩。無錫陳以忠所刻。後二卷爲雜文。

烏程范應期所刻。千頃堂書目作十卷。與此本不合。或字誤歟。

【涉江詩選七卷】浙江孫仰曾家藏本。明潘之恆撰。之恆有黃海。已著錄。之恆初以文詞受知於汪道

昆。王世貞旣而赴公車。不得志。渡江歷潯陽武昌。從公安袁宏道兄弟游。宏道稱其出汪王之門。而能不入其蹊徑。然當時論者。又謂之恆依傍汪王。終不能有所解駁。宏道徒以其論與己合而收之。迹其生平。蓋始終隨人作計者也。集本二十卷。宏道刪定爲此本。凡甲乙集各三卷。丙集一卷。

【寥寥集四十卷】浙江孫仰曾家藏本。明俞安期撰。安期有唐類函。已著錄。是集騷一卷。賦二卷。詩三十七卷。雜文一卷。安期之名。本由依附七子而成。故詩亦不出其流派。朱彝尊靜志居詩話稱其賦景有餘。言情不足。如觀翦綵花。青紅碧綠。非不爛然。即而視之。總與根株不相符。可謂定評矣。

【江山人集七卷】浙江汪汝璉家藏本。明江瓘撰。瓘有名醫類案。已著錄。是集凡詩五卷。文二卷。汪道昆爲作傳。稱其少補諸生。以病謝舉子業。專事吟咏。故其詩較勝於文。特稍嫌薄弱。別有武夷游臺游金陵詩二集。今皆未見。獨此集之末。附存其原序二篇而已。

【尙元草八卷咏物詩二卷】浙江巡撫採進本。明姚寬撰。寬字叔信。號元岳。秀水人。何三畏爲作小傳。

稱其少以事繫獄。與詩僧同羈。因得其詩法。蓋其派出自山林。故所作終無俗氣。王穉登序。稱其詩清真古淡。不事藻績。猶春岫孤霞。寒林片月。則稍過其實矣。

【少嶽集四卷】

浙江巡撫探進本

明項元淇撰。元淇字子瞻。秀水人。以貲爲光祿寺署丞。是集乃其弟

元汴所刊。凡元汴與元淇唱和諸作。亦附入焉。近體頗妥適。古所則力不逮矣。

【蛭蛻集八卷】

兩淮鹽政探進本

明鄭若庸撰。若庸有類雋。已著錄。蛭蛻生其所自號。因以名集。凡文

七卷。詩一卷。其詩與謝榛齊名。然材力遜榛之富健。文又其餘事矣。

【北遊漫藁二卷】

兩江總督探進本

明鄭若庸撰。是集爲歙人汪良迪所輯。前有王錫爵序。稱山人今

年已八十。遠趙而居清源。又已數年。故今集中清源之詩。不一而足。乃其晚年作也。明詩綜載若庸有蛭

蛻集。不及此藁。然所錄諸詩。具在茲集。蓋蛭蛻集詩止一卷。良迪併入此藁耳。

【越草一卷】

浙江范懋柱家天一閣藏本

明沈明臣撰。明臣有通州志。已著錄。明臣屢試不第。與山陰

徐渭同入胡宗憲幕。宗憲逮繫。卒於獄。賓客星散。獨明臣持所作誄詞。遍爲訟冤。其行誼爲世所重。詩則

才氣至涌。得之太易。此集乃萬歷己卯。明臣適鹽官時所作。留其藁於錢氏者。鹽官地近禦兒。故越境也。

因以越草爲名。元日以下數首。乃其家居所作。以同爲是年之詩。故竝附錄焉。

【豐對樓詩選四十二卷】

浙江巡撫探進本

明沈明臣撰。明臣生平所作詩。凡七千篇。屬其猶子九疇

選定爲四百篇。今未見傳本。是集爲廣陵陳大科所校梓。凡爲詩四千四百八十九首。較九疇所選增十

倍。白居易詩。尚以所存太富。有沙中金屑之憾。則不及居易者可知矣。

【徐文長集三十卷】兩江總督採進本。明徐渭撰。渭有筆元要旨已著錄。陶望齡作渭小傳。載渭嘗自言書第一。詩二文三。畫四。今其書畫流傳者。逸氣縱橫。片楮尺縑。人以爲寶。其詩欲出入李白李賀之間。而才高識僻。流爲魔趣。選言失雅。纖佻居多。譬之急管。絃淒清幽渺。足以感蕩心靈。而揆以中聲。終爲別調。觀袁宏道之激賞。知其臭味所近矣。其文則源出蘇軾。頗勝其詩。故唐順之茅坤諸人。皆相推挹。中多代胡宗憲之作。進白鹿前後二表。尤世所豔稱。其代宗憲謝嚴嵩啓云。凡人有疾痛疴癢。必求免於天地父母。然天地能覆載之。而不能起於顛擠。父母能保全之。而未必如斯委曲。伏惟兼德。無可竝名。名且不能。報何爲計云云。雖身居幕府。指縱惟人。然使申謝朝廷。更作何語。錄之於集。豈止白圭之玷乎。蓋渭本俊才。又受業於季本。傳姚江縱恣之派。案渭師季本。見明史文苑傳。不幸而學問未充。聲名太早。一爲權貴所知。遂侈然不復檢束。及乎時移事易。侘傺窮愁。自知決不見用於時。益憤激無聊。放言高論。不復問古人法度爲何物。故其詩遂爲公安一派之先鞭。而其文亦爲金人瑞等濫觴之始。蘇軾曰。非才之難處。才之難諒矣。渭所著有文長集。闕篇櫻桃館集三種。鍾瑞先合刻之。以成此集。又有商濬所刻。題曰徐文長三集者。亦即此本。前有陶望齡袁宏道所作二傳。宏道以爲一掃近代蕪穢之習。其言太過。望齡以爲文長負才性。惟不能謹防節目。跡其初終。蓋有處士之氣。其詩與文亦然。雖未免瑕類。咸成其爲文長而已。是則平心之論也。

【徐文長逸稿二十四卷】江蘇周厚堉家藏本。明徐渭撰。此本爲其鄉人張汝霖王思任所同選。如末卷所載優人謔。喫酸梨。偈放鷓鴣。偈對聯。燈謎諸作。鄙俚猥雜。豈可入之集中。鮑照集中載字謎。恐非當

時舊本未可援以爲例。況照詞猶雅。不似渭所作。摸著無節。看著有節。兩頭冰冷。中間火熱之類也。

【朱邦憲集十五卷】江蘇巡撫採進本

明朱察卿撰。察卿上海人。福州知府豹之子。邦憲其字也。爲太

學生。慷慨任俠。與沈明臣王穉登友善。集凡詩二百五十四首。文一百五十六首。即明臣所訂定也。

【白陽集】無卷數

江蘇巡撫採進本

明陳淳撰。淳字道復。後以字行。別字復甫。號白陽山人。長洲人。

以諸生援例入北監。卒業歸。不復就選。明史文苑傳附見。文徵明傳中。淳少從徵明游。以書畫擅名。爲世寶重。詩則寄意而已。非其所長。是集其五世從孫仁錫所編。以同時贈荅之篇附之。卷末與沈周集合刻之。以兩人之詩皆爲畫掩也。

【隆池山樵集二卷】

浙江孫仰曾家藏本

明彭年撰。年字孔嘉。長洲人。隆池山樵其號也。明史文苑傳

附見。文徵明傳中年書名亞於徵明。然當時鮮有稱其詩者。獨王世貞序稱徵明詩以韻勝。而年詩以邊幅勝。其詞亦頗有抑揚矣。又據世貞序稱徵明孫子忬。乃年女婿。年死後。其家取其詩文草鬻於某甲。得緡錢以資葬。後有永嘉王公者。從某甲購得之。然已佚其大半。其存者僅十之三。故此編有詩無文。明史藝文志載隆池山樵集三卷。與此不合。疑刊本偶誤二字爲三云。

【止止堂集五卷】

浙江孫仰曾家藏本

明戚繼光撰。繼光有練兵實紀。已著錄。千頃堂書目載繼光止

止堂集無卷數。又橫槊稟三卷。愚愚稟一卷。今此本橫槊稟亦三卷。愚愚稟則多一卷。編首總題止止堂集。前有萬歷二年工部尙書郭朝賓序。而集中有萬歷庚辰紀年。在朝賓作序之後。蓋又嘗續有增益。知虞稷所見愚愚稟一卷。乃初刻之本。非著錄之誤也。繼光有平倭功。當時推爲良將。詩亦伉健。近燕趙之

音而雜說中乃多及陰隲果報神怪之事。不免偏駁。考繼光有登盤山絕頂七律一首。格律頗壯。今石刻尙存。而兩集中皆不收。殆作於刻集之後歟。

【句漏集四卷】浙江范懋柱家天一閣藏本

明顧起綸撰。起綸字更生。號元名。無錫人。官鬱林州州判。是集即在鬱林所作。前二卷皆游覽詩。三四卷名感知篇。乃歷敘素所相知者。各賦一詩。繫以小序。凡四十首。中間人品亦甚爲雜糅。如於趙文華。乃稱其雅志豪邁。名冠英流。序其罪廢事。則曰感激罷官去。而於方士陶仲文。亦以風神端恪。恭誠一至稱之。皆不免阿私所好也。

【赤城集三卷】浙江范懋柱家天一閣藏本

明顧起綸撰。是集乃萬歷戊寅。起綸游赤城時所作。上卷爲詩六十一首。下卷爲游記一篇。而以贈荅倡和之作。閒於上下卷之間。別爲中卷。似別集而非別集。似總集而非總集。體例頗爲未善。然中卷有附錄字。知以起綸爲主矣。故仍入之別集類焉。

【卯洞集四卷】浙江汪汝璣家藏本

明徐珊撰。珊號三溪。餘姚人。官辰州府同知。卯洞在盤順中里。介於楚蜀之交。嘉靖間。珊以廟工採木。於是積其二年中所作公牘雜文爲二卷。詩歌爲二卷。因以其地名。集中有讀高蘇門集詩。蓋宗法所在。大致不失風格。而深微則不及叔嗣也。

【傅山人集三卷】浙江范懋柱家天一閣藏本

明傅汝舟撰。汝舟本名舟。字虛木。號丁戊山人。一曰磊老侯。官人。晚慕仙家服食之術。舍鄉井。遨遊山水。其詩刻意學鄭善夫。喜爲荒誕詭譎之語。王世貞比之言法華作風語。凡多聖少。然奇崛處亦頗能獨造。特劬門曲徑。不入正宗耳。

【包參軍集六卷】浙江巡撫採進本

明包大中撰。大中字庸之。別號三川。寧波人。官建陽縣縣丞。以嘗

預征倭之役。故稱曰參軍。是集隨事立名。曰薄游集。曰武夷集。曰歸來集。曰台鴈集。各一卷。曰東征漫藁。二卷。然薄游集題卷之一。則當有佚卷矣。

【滄溟集八卷】江蘇周厚培家藏本。明張重華撰。重華字虞侯。華亭人。是編前有張位姜寶二序。位序稱其有集百卷。先梓八卷。寶序稱其文言言欲奇。其詩首首欲出塵清新。然大抵拉雜不入格。如稱九峰三泖曰九三。雖絳守居園池記。亦不至於斯矣。

【栗齋文集十一卷】安徽巡撫採進本。明金瑤撰。瑤有六爻原意。已著錄。是集乃其外孫江從龍所梓。文頗有軼宕之致。其闡發經義之作。大抵空言多而實際少。蓋其說易說周禮。即多以臆斷云。

【槩菴集二卷】編修汪如藻家藏本。明汪禔撰。禔字介夫。別號槩菴。祁門人。江南通志稱所著有家禮。砭俗投壺儀節。其學蓋深於禮。故集中與胡天敘書論王生二書。與汪子立書。贈葉生新娶序。胡氏初堂記。新居告祖文。奉主還宗子祠文。宗法議。皆本禮以立言。惟卷端上學使者一書。猶明代學校之舊習。可以不作耳。其詩則全作擊壤集體。不以聲律論矣。

【湛然堂詩藁】無卷數。江西巡撫採進本。明陳汝瑒撰。汝瑒字席珍。高安人。官廣昌縣知縣。其自敘詩註云。望五貢薦。蓋由貢生起家也。是集爲其子邦綸屬陳起元所選定。格意頗爲平實。然不足自名家。

【龜川詩集四卷】江西巡撫採進本。明董緒撰。緒字禹方。樂安人。少從鄒守益。聶豹游。講良知之學。故其詩不求工於聲律。以理趣爲主。蓋濂洛風雅之流派也。其子刑部尚書裕。初刻於東莞。歲久版漶。其裔

孫又爲重刻。然此本亦字多殘闕。殆難卒讀。據其目錄。尙有附錄誌狀之屬。亦佚之矣。

【田子藝集二十一卷】浙江汪汝璫家藏本。明田藝蘅撰。藝蘅有大明同文集。已著錄。此爲文選詩選。

十八卷。乃其爲諸生時所刊。北觀初稟二稟三卷。則以歲貢入京。廷試時所作。藝蘅在嘉隆閒。猶爲博洽。而詩格頗嫌冗漫。

【方建元詩集十二卷續集一卷】浙江孫仰曾家藏本。明方于魯撰。于魯有方氏墨譜。已著錄。是編前集。以各體分編。總名佳日樓集。續集僅詩二十九首。文一首。題曰師心草。則其子嘉樹所續刻也。于魯初以製墨名。後與汪道昆唱和。遂招入豐干社中。然世終稱其墨也。

【石西集八卷附崇禮堂詩一卷】編修汪如藻家藏本。明汪子祐撰。子祐字受夫。別號石西。石門人。性喜爲詩。自二十歲至七十歲。皆編年爲集。後其玄孫宗豫。蒐輯遺稟。屬汪懋麟等定爲是編。凡詩六卷。賦一卷。文一卷。後附崇禮堂詩一卷。則宗豫父伯薦之作。伯薦字士倩。崇禎戊辰恩貢生。

【石孟集十七卷】兩江總督採進本。明汪坦撰。坦字仲安。號誠環。鄞縣人。是集爲其子長文所刊。凡詩賦十卷。雜文七卷。前有屠隆序。稱其詩自二百篇。騷選漢魏六朝。唐宋文自左馬班揚。崔蔡韓柳。蘇王諸體。靡所不詣。然核其所作。不出七子之體。

【石門詩集一卷】福建巡撫採進本。一名霞居集。明高澂撰。澂字宗呂。號石門。又號髯仙。侯官人。朱彝尊靜志居詩話云。少谷鄭善夫。居鼇峯北。從之遊者九人。鄉黨目爲十才子。澂居首。傳汝舟次之。今卷首林向哲序。稱其俊而不刻。清而不矯。亦非虛語。然竟以爲與少谷相伯仲。則溢美矣。澂詩向未付梓。流傳

俱屬鈔本。明詩綜載其岳陽樓一詩。有殘雨數聲。衡岳曉句。今檢原集。數聲實作數峯。較聲字爲工。考徐燧晉安風雅所載亦同。蓋詩綜刊本偶誤耳。

【東厓遺集二卷】浙江汪汝璩家藏本

明王襜撰。襜字宗順。自號天南逸叟。泰州安豐場人。是集其門

人林訥所輯。上卷爲像贊墓圖年譜語錄。及同時贈答雜文。下卷爲所作詩賦。附載行狀銘誌祭文。世系門人姓氏。刊集始末。襜少從其父王良。至會稽。傳王守仁之學。沈桐贈之詩云。念子賢者後。至理早已融。譬彼三世醫。指授寧無從。蓋其父子皆刻意講學。非以文章爲事者。朱彝尊靜志居詩話。謂襜詩如一室風過雨。三更月到窗。好雨應宜早。秋花不恨遲。坐雨新亭曉。聞潮落月時。老攜杖屨歸山谷。閒看兒孫種水田等句。亦有活脫之趣。然終非專門也。

【儼寮集一卷】浙江巡撫探進本

舊本題古杭月堂宗賢撰。不著時代。考之志乘。亦不載其名氏。據其

題名。似乎衲子。故所與唱和者。亦衲子爲多。集中有和沈石田鵲橋仙詞。知爲正嘉閒人也。詩筆清曠。頗近自然。特邊幅少狹。不免傷於寒瘦。

【松菊堂集二十四卷】浙江孫仰曾家藏本

明孫鑿撰。鑿字端峯。餘姚人。江西巡撫燧之孫。工部尙書

陞之子也。官上林苑丞。是集凡詩二十卷。雜文四卷。詩句清雋。不入前後七子之派。文則不免於平衍。鑿晚歸燭湖。於宅東構漆園。居之作漆園供事別傳。如滕六司農。玉羽仙翁。食萃仙子。秦大夫。清修子。姑射仙。諸傳皆以文爲戲之筆也。

【鄭京兆集十二卷外集二卷】浙江巡撫探進本

明鄭心材撰。心材字敬仲。號思泉。海鹽人。刑部尙書

曉之孫光祿寺少卿履淳之子。以蔭生官。至應天府治中。是集爲其壻項臯謨所校。凡詩文雜著十二卷。其外集二卷。則附錄墓碑行實之類也。考其子端允所作行實中。稱所著文集以外。有昭明文選鈔。唐人列傳。見聞紀鈔三書。今本唐人列傳。乃編在第六卷。其外集別題曰葬錄。與目錄不相應。蓋隨意編次。故無體例也。心材老於場屋。必欲一第。而卒不可得。年五十始就銓。平生精銳之氣。已消磨於時文中。詩古文特偶試爲之耳。

【冬谿集二卷】浙江巡撫採進本

明釋方澤撰。方澤字雲望。號冬谿。嘉善人。秀水精嚴寺僧也。明詩選

本載方澤詩。俱作冬谿內外集。據此本實作冬谿外內集。上卷爲外集。下卷爲內集。以詩爲外。以文爲內。蓋詩多涉文字。而文皆關禪義。故其下卷之詩。亦不謂之詩。而謂之偈。則其外內之義。即程氏之外學內學。作內外者誤也。集中文章。恂率不出方丈語錄之格。詩稍近雅。而亦不工。

【徐花潭集二卷】浙江巡撫採進本

明嘉靖中朝鮮生員徐敬德撰。敬德貧居講學。年五十六。其國提

學金安國。以遺逸薦授奉參。力辭不就。居於花潭。因以爲號。是集雜文雜詩共二卷。其文中。原理想一篇。末有附記。稱曰先生鬼神生死論一篇。末亦有附記。稱以上四篇。皆先生病亟時作。詩中次申企齋韻一首。附錄原作。稱企齋贈先生詩。蓋其門人所編也。敬德之學。一以宋儒爲宗。而尤究心於周子太極圖說。邵子皇極經世集中雜著。皆發揮二書之旨。其送沈教授序。全然邵子之學也。其論喪制。疏荅朴枝華書。亦頗究心於禮制。蓋東士之務正學者。詩則強爲擊壤集派。又多雜其國方音。如所謂窮秋盛節。換木落天地瘦。體近郊島者。不多見也。他如無弦琴銘。不用其弦。用其弦。律外宮商。吾得其天。非樂之以音樂。

其音音非聽之以耳聽之以心彼哉子期曷耳吾琴稍得蘇黃意者亦偶一遇之然朝鮮文士大抵以吟咏聞於上國其卓然傳濂洛關閩之說以教其鄉者自敬德始亦可謂豪傑之士矣故詩文雖不入格特存其目以表其人焉

上海图书馆藏书



A541 212 0003 4391B

